


〔重刊訂正本〕

中國醫學大成

錢若利題



【二一四】

〔重刊訂正本〕

中國醫學大成

〔二四〕

上海科學技術出版社

中國醫學大成（全套共五十冊）

上海科學技術出版社出版

（上海瑞金二路四五〇號）

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二二,七九〇,〇〇〇

總印張八六二

一九九〇年六月第一版 一九九〇年六月第一次印刷

口齒類要

〔明〕薛己 著

尤氏喉科秘書

〔清〕尤乘 撰

咽喉脈證通論

〔清〕許樾 著

喉舌備要秘旨

〔清〕佚名

包氏喉證家寶

〔清〕包三鈔 述

重訂囊秘喉書

〔清〕楊龍九 著

原 編 曹炳章

總審定 裘沛然

總審閱 蕭敏材 朱邦賢 沈麗君

重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尙浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤

其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內

容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有之巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之

年，未嘗釋卷；葉香岩以不讀破萬卷，不敢輕言醫。茲三人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於
上海中醫學院

〔明〕薛己著

口齒類要

中國醫學大成

口齒類要提要

明薛己撰。己字新甫。號立齋。吳縣人。首列繭唇、口瘡、齒痛、舌症、喉痺、喉間雜症、諸骨、稻穀、髮、鯁、治諸鯁、咒法、誤吞水蛭、諸蟲入耳、蛇入竅及蟲咬傷、男女體氣。凡一十二類。首詳證狀。次列治驗醫案。以證明實驗。後附藥方。集證雖未完備。所採類別。皆屬必要。喉科專家。允宜參考者也。

口齒類要目錄

繭脣第一	一
口瘡第二	五
齒痛第三	九
舌症第四	一四
喉痺諸症第五	一八
喉痛第六	二二
諸骨稻穀髮鯁第七	二七
治諸鯁咒法第八	二八
誤吞水蛭第九	二九

諸蟲入耳第十……………二九

蛇入七竅及蟲咬傷第十一……………三〇

男女體氣第十二……………三〇

附方并註……………三一

口齒類要

明 古吳 薛 己立齋著

鄞縣 曹赤電炳章校

繭脣第一

內經云。脾氣開於口。又云。脾之榮在脣。蓋燥則乾。熱則裂。風則潤。寒則揭。若脣腫起白皮。皴裂如蠶繭。名曰繭脣。有脣腫重出如繭者。有本細末大如繭如瘤者。或因七情動火傷血。或因心火傳授脾經。或因厚味積熱傷脾。大要審本症。察兼症。補脾氣。生脾血。則燥自潤。火自除。風自息。腫自消。若患者忽略。治者不察。妄用清熱消毒之藥。或用藥線結去。反爲翻花敗症矣。

治驗

州守劉克新患齒齦。時出血水。內熱口乾。吐痰。體瘦腎虛之症悉具。用濟陰地黃丸。年許而愈。

一儒者因勞役感暑。脣生瘡。或用四物加黃柏、知母之類而愈。後復作。彼仍用前藥益甚。腹中陰冷。余用補中益氣湯加茯苓、半夏。治之而愈。

儒者楊國華因怒。脣口兩耳腫痛。寒熱。余謂怒生熱。熱生風。用柴胡山梔散。數劑而愈。

一男子素善怒。脣腫脹。服清胃等藥。時出血水。形體骨立。余用補中益氣加半夏、茯苓、桔梗。月餘脣腫漸消。元氣漸復。又以四物加柴胡、炒梔、丹皮、升麻、甘草。數劑乃去梔。加參、朮而痊。

一婦人懷抱久鬱。或時胃口嘈辣。胸膈不利。月水不調而衰少。日晡發熱。食少體倦。脣腫年餘矣。余用歸脾湯。加薑汁、炒黃連、山梔。少佐吳茱萸。嘈辣頓去。飲食少進。乃去黃連。加貝母、遠志。胸膈通利。飲食如常。又用加味逍遙散。歸脾湯。間服百餘劑。月水調而脣方愈。

一婦人懷抱久鬱。患繭脣。雜用消食降火。虛症悉具。盜汗如雨。此氣血虛而有熱也。用當歸六黃湯。內黃芩、連、柏俱炒黑。二劑而盜汗頓止。乃用歸脾湯。八珍散兼服。元氣漸復。更以逍遙散。歸脾湯間服百餘劑。而脣亦瘥。

一婦人脣裂。內熱二年矣。每作服寒涼之劑。時出血水。益增他症。余用加味清胃散而愈。後因怒脣口腫脹。寒熱而嘔。用小柴胡加山梔、茯苓、桔梗。諸症頓愈。復用加味逍遙散而康。

一婦人善怒。下脣微腫。內熱體倦。用化痰藥。食少作嘔。大便不實。脣出血水。用理

氣消導。胸膈痞滿。頭目不清。脣腫經閉。用清胃行血。肢體愈倦。發熱煩躁。涎水湧出。余曰。此七情損傷肝脾。誤行剋伐所致。遂用濟生歸脾湯。食進便實。用加味逍遙散。腫消熱退。用補中益氣湯。脾健涎止。後因怒寒熱耳痛。胸膈脹悶。脣焮腫甚。此怒動肝火而傷陰血。用四物合小柴胡。加山梔頓愈。又因怒。脇乳作脹。肚腹作痛。嘔吐酸涎。飲食不入。小水不利。此怒動肝木而剋脾土。用補中益氣。加川芎、芍藥而愈。又勞役怒氣。飲食失節。發熱喘渴。體倦不食。下血如崩。脣腫熾甚。此肝經有火。不能藏血。脾經氣虛。不能攝血。用補中益氣。加炒黑山梔、芍藥、丹皮而愈。

一男子內熱作渴。咳唾痰涎。大便乾澀。自喜壯實。問治於余。余曰。此脾腎陰虛陽旺之症。當壯水之主。不信。自服二陳、芩、連之類。次年下脣漸腫。小便赤澀。執守前藥。脣出血水。大便黑塊。小便淋瀝。請余往治。余曰。大便結黑。小便淋瀝。肝腎

敗也。脣口腫白。脾氣敗也。辭不赴。竟歿。

一婦人月經不調。兩足發熱。年餘後而身亦熱。勞則足腿酸疼。又年餘。脣腫痛裂。又半年。脣裂血出。形體瘦倦。飲食無味。月水不通。脣下腫如黑棗。余曰。此肝脾血虛火症。彼不信。用通經等藥而死。

一婦人善怒脣腫。或用消毒之藥。脣脹出血年餘矣。余曰。須養脾胃。滋化源。方可愈。彼執用前藥。狀如翻花瘤而死。

口瘡第二

口瘡上焦實熱。中焦虛寒。下焦陰火。各經傳變所致。當分別而治之。如發熱作渴。飲冷。實熱也。輕則用補中益氣湯。重則六君子湯。飲食少思。大便不實。中氣虛也。用人參理中湯。手足逆冷。肚腹作痛。中氣虛寒也。用附子理中湯。晡熱內熱。不時

而熱。血虛也。用八物加丹皮、五味、麥門。發熱作渴唾痰。小便頻數。腎水虧也。用加減八味丸。食少便滑。面黃肢冷。火衰土虛也。用八味丸。日晡發熱。或從腹起。陰虛也。用四物、參朮、五味、麥門。不應。用加減八味丸。若熱來復去。晝見夜伏。夜見晝伏。不時而動。或無定處。或從脚起。乃無根之火也。亦用前丸。及十全大補。加麥門、五味。更以附子末。唾津調搽湧泉穴。若概用寒涼。損傷生氣。爲害匪輕。

治驗

秋官趙君言口舌生瘡。勞則體倦。發熱惡寒。此內傷氣血之症。用補中益氣。加五味、麥門而愈。

進士劉華甫口舌生瘡。午前熱甚。脈數而有力。用清心蓮子飲稍愈。更以四物二連湯全愈。後因勞役。日晡發熱。脈數而無力。用四物加參朮、柴胡少瘥。但體倦

口乾。再用補中益氣湯而愈。

武庫劉君口舌生瘡。口乾飲湯。乃胃氣虛而不能化生津液也。用七味白朮散而痊。

延評曲汝爲口內如無皮狀。或咽喉作痛。喜熱飲食。此中氣真寒。而外虛熱也。用加減八味丸而愈。

儒者費懷德發熱。口舌狀如無皮。用寒涼降火藥。面赤發熱。作嘔少食。痰涎自出。此脾胃復傷。虛寒而作也。用附子理中湯。以溫補脾胃。用八味丸補命門火。乃愈。

一男子口糜爛。脈數無力。此血虛而有火。用四物加茯苓、白朮。少用黃柏、知母。治之而痊。

地官李孟卿子新婚。口舌糜爛。日晡益甚。用八珍湯加五味、麥門而口瘡愈。更用

加減八味丸而元氣實。

一男子脣舌生瘡。口苦作嘔。小便淋瀝。此肝脾火動。以小柴胡加山梔、酸棗仁、遠志、麥門。諸症漸愈。但晡熱體倦。用四物、柴胡、山梔而愈。又加白朮、茯苓、炙草而安。

一儒者口苦而辣。此肺肝火症。先以小柴胡加山梔、膽草、茯苓、桑皮而漸愈。更以六君加山梔、芍藥而全瘥。若口苦脇脹。小便淋瀝。此亦肝經之病。用六味丸以滋化源。

一男子口臭。牙齦赤爛。腿膝痿軟。或用黃柏等藥益甚。時或口鹹。此腎經虛熱。余用六味丸悉瘥。

一婦人口苦脇脹。用小柴胡、山梔、黃連少愈。更以四君子加芍藥、當歸、柴胡而瘥。一婦人每怒。口苦發熱。晡甚。以小柴胡合四物二劑。更以四物加柴胡、白朮、茯苓、

丹皮而愈。

一婦人每怒。則口苦兼辣。頭痛脇脹。乳內刺痛。此肝肺之火。用小柴胡加山梔青皮、芎、歸、桑皮而安。後勞兼怒。口復苦。經水頓至。用四物加炒梔炒膽草一劑。更以加味逍遙散而康。

齒痛第三

齒者、腎之標。口者、脾之竅。諸經多有會於口者。齒牙是也。徐用誠先生云。齒惡寒熱等症。本手足陽明經。其動搖脫落。本足少陰經。其蟲疳齕腫出血痛穢。皆濕熱胃火。或諸經錯雜之邪。與外因爲患。治法濕熱甚而痛者。承氣湯下之。輕者清胃散調之。大腸熱而齕腫痛者。清胃散治之。重則調胃丸清之。六鬱而痛者。越鞠丸解之。中氣虛而痛者。補中益氣湯補之。思慮傷脾而痛者。歸脾湯調之。腎經虛熱

而痛者。六味丸補之。腎經虛寒而痛者。還少丹補之。重則八味丸主之。其屬風熱者。獨活散。大寒犯腦者。白芷散。風寒入腦者。羌活附子湯。病症多端。當臨症制宜。

治驗

宗伯毛三江胃經虛熱。齒牙作痛。用補中益氣加熟地、丹皮、茯苓、芍藥。尋愈。

廷尉張中梁齒動。或用清胃散。肢體倦怠。飲食少思。牙齒作痛。余曰。此脾腎虧損。用安腎丸、補中益氣湯兼服。外用羌活散而愈。或牙根潰爛。如喜寒惡熱者。乃胃血傷也。用清胃散。若惡寒喜熱者。胃氣傷也。用補中益氣湯。

楊考功齒痛作渴。屬脾胃虛弱。陰火熾盛。用補中益氣。加酒炒黑黃柏四劑。又服加減八味丸。諸症頓愈。又用補中益氣湯而全愈。

王侍御齒搖齦露。喜冷飲食。此胃經濕熱。先用承氣湯以退火。又用清胃散以調

理而齒固。繼用六味丸以補腎水。羌活散以祛外邪而尋愈。

王吏部患齒痛。或用祛風等劑。更加寒熱體倦。懶食欲嘔。彼以爲火盛。余曰。病因元氣不足。前藥復傷。遂用補中益氣加茯苓、半夏。元氣復而諸症愈。

郭職方善飲齒痛。腮頰焮腫。此胃經濕熱。用清胃散加乾葛、荊防而愈。

鄭吏部仲冬牙痛連腦。此腎經風寒所犯。用羌活附子湯。一服卽愈。此症不問冬夏。腎虛者多患之。急用此藥可瘳。緩則不救。

朱工部午後有熱。遇勞遺精。其齒卽痛。此脾腎虛熱。先用補中益氣送六味丸。更以十全大補湯而愈。

黨吏部齒根腫痛。焮連頤頰。此胃經風熱。用犀角升麻湯卽愈。

表兄顏僉憲牙痛。右寸後半指脈洪而有力。余曰。此大腸積熱。當用寒涼之劑。自泥年高。服補陰之藥。呻吟徹夜。余與同舟赴京。煎涼膈散加荊防、石膏。與服一

鍾卽愈。

大尹余時正素善飲。齒常浮痛。腹痛作瀉。此酒積傷脾。食後用清胃散。食前解醒湯而愈。

膳部鍾復齋。每勞心則齒縫脹而不能咀嚼。此元氣虛弱。先用補中益氣湯而痊。更用十全大補湯。雖勞不作。

儒者柴濟美善飲。牙蛀不生。或時作痛。用桃仁承氣湯二劑。又以清胃散加山梔、葛根。外搽升麻散。其牙復出。

一男子晡熱。內熱牙痛齧潰。常取小蟲。此足三陰虛火。足陽明經濕熱。先用桃仁承氣湯二劑。又用六味地黃丸而愈。

一男子患齒痛。飲食難化。大便不實。此脾腎不足。用還少丹而愈。

一男子每足發熱。牙卽浮痛。此足三陰虛火。用加減八味丸而不復作。

一男子齒浮作痛。耳面鰲色。口乾作渴。日晡則劇。此脾虛弱也。用補中益氣湯。加減八味丸而愈。

一婦人因怒齒痛。寒熱作嘔。用清胃等藥益甚。此肝火傷胃。寒藥復傷。用六君子加芍藥、柴胡、山梔而愈。

一婦人胃中嘈辣。甚則熱痛。後患齒痛。此胃火生痰也。用二陳加芩、連。下越鞠丸而瘳。

一婦人發熱齒痛。日晡益甚。月水不調。此脾經血虛所致。用逍遙散加升麻尋愈。後因怒復痛。仍以前藥加川芎而痊。

一婦人因怒。牙痛寒熱。用小柴胡加芩、歸、苓、朮、山梔而疼痛止。用加味逍遙散而寒熱退。

荆婦每產後齒根皆動。必踰日乃止。後復懷妊。臨月時立齋翁偶至。言及此症。留

十全大補湯二劑。令產後煎服。齒不復動矣。果如言。愚竒其神異。敢綴數言。附之卷末。後有作者。皆得觀法焉。則先生之德垂之永久矣。後學吳江史羊生頓首謹書。

貌云。叔父芝巖先生。齒根浮腫。痛不可忍。命貌求治於立翁先生。翁曰。齒痛齦浮而不動。屬於坤土。乃足陽明脈所貫絡也。因胃有濕熱故爾。用清胃散加山梔、玄參。進一服。應手而瘥。貌謹記其梗概。以附醫錄。將俾後之學醫者有所準則云。嘉靖丁未仲秋晚眷生郁貌頓首拜書。

舌症第四

經言舌乃心之苗。此以竅言也。以部分言之。五臟皆有所屬。以症言之。五臟皆有所主。如口舌腫痛。或狀如無皮。或發熱作渴。爲中氣虛熱。若眼如烟觸。體倦少食。

或午後益甚。爲陰血虛熱。若咽痛舌瘡。口乾足熱。日晡益甚。爲腎經虛火。若四肢逆冷。惡寒飲食。或痰甚眼赤。爲命門火衰。若發熱作渴。飲冷便閉。爲腸胃實火。若發熱惡寒。口乾喜湯。食少體倦。爲脾經虛熱。若舌本作強。頰頰腫痛。爲脾經濕熱。若痰盛作渴。口舌腫痛。爲上焦有熱。若思慮過度。口舌生瘡。咽喉不利。爲脾經血傷火動。若恚怒過度。寒熱口苦。而舌腫痛。爲肝經血傷火動。病因多端。當臨時制宜。凡舌腫脹甚。宜先刺舌尖。或舌上。或邊傍。出血泄毒。以救其急。惟舌下廉泉穴。此屬腎經。雖宜出血。亦當禁針。慎之。

治驗

工部徐檢齋口舌生瘡。喜冷飲食。或咽喉作痛。大便秘結。此實熱也。用清涼飲治之而愈。

仲侍御多思慮。舌作痛。用苦寒降火藥。發熱便血。盜汗口乾。肢體日瘦。此脾氣虧損。血虛之熱。用加味歸脾湯而愈。

一男子不慎酒色。冬喜飲冷。舌常作痛。小便頻數。舌裂痰盛。此腎水枯涸。陰火無制。名下消。用加減八味丸而愈。若寸脈洪數有力。多飲少食。大便如常。口舌生瘡。大渴引飲者。名上消。是心移熱於肺。用白虎湯加人參治之。若關脈洪數有力。喜飲冷。小便黃。大便硬而有汗者。名中消。調胃承氣湯下之。

學士吳北川過飲。舌本強痛。言語不清。痰氣湧盛。肢體不遂。余作脾經濕痰治之而愈。

秋官鄭□□過飲。舌本強腫。言語不清。此脾虛濕熱。用補中益氣加神麴、麥芽、乾葛、澤瀉而愈。

一膏梁之人。患舌痛。敷服皆消毒之藥。舌腫勢急。余刺舌尖及兩傍。出紫血杯許。

腫消一二。更服犀角地黃湯一劑。翌早復腫脹。仍刺出紫血杯許。亦消一二。仍服前湯良久。舌大腫。又刺出黑血二杯許。腫漸消。忽寒熱作嘔。頭痛作暈。脈洪浮而數。此邪雖去而真氣愈傷。與補中益氣。倍用參、耆、歸、朮。四劑而安。又數劑而愈。

一婦人善怒。舌痛煩熱。用降火化痰等藥。前症益甚。兩脇作脹。服流氣飲。肚腹亦脹。經行不止。此肝虛不能藏血。脾虛不能統血。用加味歸脾加麥門、五味而愈。若因暴怒而患前症。用小柴胡加丹皮、山梔。血虛者。用八珍加參、朮、柴胡、山梔、丹皮。虛甚須加炮薑。

一男子舌下牽強。手大指次指不仁。或大便秘結。或皮膚赤暈。此大腸血虛風熱。用逍遙散加槐角、秦艽而愈。

一婦人冬患腦疽。腫痛熱渴。脈洪數實。余用清熱消毒散潰之而愈。次年三月。其

舌腫大。遍身患紫疔如葡萄。不計其數。手足尤多。各刺出黑血。服奪命丹七粒。出臭汗。瘡熱益甚。便秘二日。與大黃、芩、連各三錢。升麻、白芷、山梔、薄荷、連翹各二錢。生草一錢。水煎三五沸服。大小便出臭血甚多。下體稍退。乃磨入犀角汁再服。舌本及齒縫出臭血。諸毒乃消。更與犀角地黃湯而愈。

一婦人善怒。舌本強。手臂麻。余曰。舌本屬脾土。肝木剋之故耳。治以六君子。加柴胡、芍藥而愈。

先兄口舌糜爛。痰涎上壅。飲食如常。遇大風。欲仆地。用補中益氣湯及八味丸即愈。間藥數日仍作。每勞苦則痰盛目赤。漱以冷水。舌稍愈。頃間舌益甚。用附子片噙之即愈。服前二藥。諸症方痊。

喉痺諸症第五

喉痺。謂喉中呼吸不通。語言不出。而天氣閉塞也。咽痛。噤痛者。謂咽喉不能納唾與食。而地氣閉塞也。喉痺咽噤痛者。謂咽喉俱病。天地之氣皆閉塞也。當辨內外表裏虛實而治之。若鄉村所患相同者。屬天行運氣之邪。治法當先表散。大忌酸藥。搽點寒藥下之。恐鬱其邪於內。而不得出也。其病有二。

其一屬火。經云。少陽所致爲喉痺。又云。少陽司天之政。三之氣。炎暑至。民病喉痺。用仲景桔梗湯。或面赤斑者。屬陽毒。用陽毒諸方。汗之可也。

其二屬陰濕。經云。太陰之勝。火氣內鬱成喉痺。又云。太陰在泉。濕淫所勝。病噤腫喉痺。用活人半夏桂枝甘草湯。或面青黑者。屬陰毒。法可汗之。

蕭山先生云。喉痺不惡寒。及寸脈大滑實於關尺者。皆屬下症。宜硝石、青黛等寒藥降之。或膽礬等酸劑收之。韓祗和先生云。寸脈大於關尺者。宜消陽助陰。東垣先生云。兩寸脈實爲陽盛陰虛。下之則愈。故予遵此法以治前症。如鼓應桴也。

陳無擇治喉痺不語。用小續命加杏仁七個。煎服甚效。本草治中氣急。喉痺欲死。白殭蠶爲末。薑汁調下立愈。丹溪云。殭蠶屬火而有土與水。得金氣而成。治喉痺者。取其火中清化之氣。以從治相火散濁逆結滯之痰。

陳藏器每治臟寒咽閉。吞吐不利。用附子去皮臍炮裂。以蜜塗炙。蜜入內。含之勿嚥云云。

孫押班治都知潘元從喉閉。孫以藥半錢。吹入喉中。少頃吐出膿血立愈。潘詣孫謝曰。大急之患。非明公不能救。救人之急。非藥不能療。贈金百兩。願求方以濟非常之急。孫曰。用猪牙皂角、白礬、黃連各等分。置新瓦上焙乾爲末。既授其方。不受所贈。

謙甫云。戊辰春。鄉村病喉痺者甚衆。蓋前年終之氣。及當年初之氣。二火之邪也。用甘桔湯加芩、連、半夏、殭蠶、鼠粘子、葛根等劑發之。虛加參、耆、當歸之類。水漿不

入。先用解毒雄黃丸。醋化灌之。痰出更灌薑汁。服前藥無不神驗。若用膽礬酸寒點過者。皆不治。蓋邪鬱不出故也。以上治法。內經祕旨救生之良法。故錄之。見醫學綱目。

治驗

廷評張汝翰患喉痛。日晡益甚。此氣血虛而有熱。用八珍湯而愈。後每入房。發熱頭痛。用補中益氣。加麥門、五味。及六味丸常服。後不復作。

秋官葉□□素陰虛。因怒忽喉腫。寒熱頭痛。項強目直。小便自出。此皆肝火之症。肝主筋膜。火主腫脹。火旺則血涸筋攣。目係緊急。頸項如拔。陰挺痿痺。則小便自遺。遂刺患處出毒血。用四物柴胡、山梔、玄參、甘草而甦。再用六味丸料。以生肝血。滋腎水。諸症悉愈。

大守葉□□咽喉腫痛。痰涎不利。手足發熱。喜冷飲食。用清咽利膈湯二劑。不應。刺少商穴。喉少寬。痰從鼻出如膠。患處出紫血稍寬。至七日咳出穢膿而愈。一儒者。三場畢。忽咽喉腫閉。不省人事。喘促痰湧。汗出如水。肢體痿軟。脈浮大而數。此飲食勞役。無根虛火上炎。用補中益氣加肉桂一劑頓甦。義士顧克明。咽喉作痛。至夜發熱。此肝腎陰虛之熱。用四物加酒炒黑黃柏、知母、麥門、五味治之而愈。後因勞咽喉腫閉。刺患處出血。用桔梗湯吐痰而消。至仲夏乾咳聲嘶。作渴發熱。日晡足熱。用滋腎丸加減八味丸。間服三月餘。喜其年富。謹疾得愈。

喉痛第六

附乳蛾懸癰楊梅瘡

丹溪先生云。咽痛屬血虛。用四物加竹瀝。陰虛火上炎者。必用玄參。氣虛加人參、

竹瀝。又云。咽喉腫痛。有陰虛陽氣飛越。痰結在上者。脈必浮大。重取必澀。去死爲近。宜人參一味濃煎。細細飲之。如作實症治之。禍在反掌。此發前人未發。救無窮之夭枉。余更以上焦風熱積熱。及膀胱陰虛等症一二於後云云。

治驗

通府李朝用咽喉腫痛。口舌生瘡。此上焦風熱。先用荆防敗毒散二劑。喉痛漸愈。又以玄參升麻湯。口舌遂愈。

地官黃北盤喉痛。作渴飲冷。大便不通。此上下表裏實熱。用防風通聖散治之。頓愈。

地官胡誠甫咽喉燥痛。此腎經膀胱虛熱。用四物加黃柏、知母、玄參。四劑少愈。更以人參固本丸一劑。不復發。

職方盧抑齋咽喉腫痛。兩目矇昧。小便赤澀。此膀胱濕熱。用四苓散加黃柏、黃連、知母、茵陳、防己治之而頓愈。又用六味地黃丸而痊。

儒者王文遠咽喉腫痛。口舌生瘡。勞則愈甚。余爲脾肺氣虛。膀胱有熱。以補中益氣加玄參。酒炒黑黃柏、知母稍愈。乃去黃柏、知母。加山茱、山藥乃痊。

一儒者年踰五十。咽喉痛。服涼藥。或過勞。痛愈甚。此中氣虛熱。以補中益氣。加炒黑芩、連。四劑而愈。乃去芩、連。又數劑全愈。

一儒者脚發熱。則咽喉作痛。內熱口乾。痰涎上湧。此腎經虧損。火不歸經。用補中益氣加麥門、五味。及加減八味丸而全愈。

一老人咽喉痛。小便數而赤。日晡尤甚。此膀胱陰虛。當滋化源。以補中益氣。加酒炒黑黃柏、知母二味。四劑咽痛稍可。乃去二味。加以山茱、山藥、麥門、五味。頓愈。一男子咽喉腫痛。藥不能下。針患處。出紫血少愈。以破棺丹噙化。更用清咽利膈。

散而愈。

一男子素善飲。咽喉作痛。內熱作渴。小便不利。飲食如常。此膀胱積熱。用四苓散加茵陳、大黃。四劑諸症漸退。又用清心蓮子飲而安。

一星士勞而入房。喉痛漸閉。痰涎上湧。四肢乍熱。此陰虛。陽氣飛揚。用補中益氣加附子煎灌而愈。

憲副姜時川。癸卯冬。就診於余。右寸浮數有力。口中有瘡。余曰。此胃火傳於肺也。當薄滋味。慎起居。甲辰秋。復就診。尺脈洪數而無力。余曰。此肺金不能生腎水。宜靜養以滋化源。彼云。今喉間及耳內不時燥痛。肢體不時發熱。若無根之火。殞無疑矣。後謂劉古峽云。立齋謂我之病可疑。至乙巳孟春。古峽謂余曰。姜公之病已如尊料。遂同余往視。喉果腫潰。脈愈洪大。或用瀉火之藥。反速其歿。雲間吳上舍年踰五十。咽喉腫痛。或針去血。神思雖清。尺脈洪數而無倫次。按之

微細如無。余曰。有形而無痛。陽之類也。當峻補其陰。今反傷陰血。必死。已而果歿。蓋此症乃腎氣虧損。無根之火。炎上爲患。惟加減八味丸料煎服。使火歸源。庶幾可救。

府庠歸雲橋之內。產後患喉痛。服清熱等劑。益甚。余診之。屬膀胱經血虛也。蓋膀胱之內。脈上行至頸而還。用八珍湯加牡丹皮、柴胡、酒炒黑黃柏。二劑而愈。嘉靖辛丑仲秋。大方凭几執筆就書。咽喉間偶有痰涎。遂左顧吐之。口未及合。而頸骨如摧。莫能轉視。至夜增劇。夜發盜汗。手足麻冷。臥起必藉人扶持。稍動則痛連心腹。苦楚萬狀。不可勝數。如是者三四日。得立齋先生視之。曰。此怒動肝火。膽得火而筋攣縮。以六味地黃丸料。加山梔、柴胡。以清肝火。生膽血。一劑未竟日。而談笑舉動。一一如常矣。接見賓從。俱以爲前日之病者罔也。先生之神妙。類多若此。惜乎不肖疎怠。蹇拙不能盡述。姑以其親試者筆之。以爲明驗耳。

吳門晚學生沈大方履文再頓首謹錄。

一婦人喉間作痛。兩月後而潰。遍身筋骨作痛。余以爲楊梅瘡毒。先以萆薢湯數劑而平。更以四物加萆薢、黃耆。二十餘劑。諸症悉退。

一彌月小兒口內患之。後延遍身。年餘不愈。以萆薢爲末。乳汁調服。母以白湯調服。月餘而愈。餘見保嬰粹要。

一男子先患喉痛。後發楊梅瘡。用輕粉等劑。愈而復發。仍服前藥。後又大發。上顎潰爛。與鼻相通。臂腕數顆。其狀如桃大。潰年餘不斂。虛症悉見。余以萆薢湯爲主。兼以健脾之劑。月餘而安。餘見外科樞要。

諸骨稻穀髮鯁第七

治諸骨鯁。用葶麻根杵爛。丸彈子大。將所鯁物煎湯化下。

一方。魚骨鯁。用細茶。五倍子等分爲末。吹入咽喉立愈。

一方。以犬弔一足。取其涎。徐徐嚥之。卽消。

又方。白萼花根搗爛取汁。徐徐嚥之。不可着牙。

治稻芒糠穀鯁喉。將鵝弔一足取涎。徐徐嚥下卽消。

治吞釘鐵金銀銅錢等物。但多食肥羊脂。諸般肥肉等味。隨大便而下。

一方。吞錢燒炭末。白湯調服。數匙卽出。或服蜜升許。或食茱萸。其錢自化。

治吞髮繞喉不出。取自亂髮作灰。白湯調服一錢。

治吞鐵或針。用錫糖半斤。濃煎艾汁。調和服之。

一方。磁石磨如棗核大。鑽眼以線穿。令吞喉間。針自引出。或吞銀錢金銅鐵。磁石

須陰陽家用驗者。

治諸鯁咒法第八

子和云。大凡魚骨麥芒。一切竹木刺鯁於喉間。及髮絆不能下。用道藏經中一咒法。取東方無根水一碗。先以左手結三台印。將水置印上。後將右手持一劍。訣於水上。虛書一龍字。密咒九遍。咒曰。吾從東方來。路傍一池水。水裏一條龍。九頭十八尾。問君治何物。專用此間水。連誦九遍。患者飲之即愈。

誤吞水蛭第九

治誤吞水蛭。食蜜即愈。試以活蛭投蜜中。即化爲水。屢驗。一書云。井中生蛭。以白馬骨投之。即無。試之亦驗。夫蛭即螞蝗也。雖死爲末。見水復活。人吞之爲害不小。治以前法。無不愈者。

諸蟲入耳第十

治百蟲入耳。用藍汁灌之。或葱汁尤良。或豬肉少許。炙香置耳孔邊亦出。或用細蘆管入耳內。口吸之。蟲隨出。

蜒蚰入耳。以鹽少許捺耳內。卽化爲水。

蜈蚣入耳。以雞肉置耳邊自出。凡蟲毒入腹作脹。飲好酪二升許。蟲化爲水。而毒亦消矣。

蛇入七竅及蟲咬傷第十一

凡蛇入七竅。劈開蛇尾納川椒數粒。以紙封之。其蛇自出。更以人參湯飲之。或飲酒食蒜。以解內毒。如被蛇咬。食蒜飲酒。更用蒜杵爛塗患處。加艾於蒜上灸之。其毒自解。凡毒蟲傷並效。

男女體氣第十二

治腋氣。五更時用精猪肉二大片。以甘遂末一兩拌之。挾腋下。至天明。以生甘草一兩煎湯飲之。良久瀉出穢物。須在荒野之處則可。恐穢氣傳人故也。依法三五次即愈。虛弱者。間日爲之。其他蜜陀僧、胡粉之類。皆塞竅以治其末耳。

附方并註

清胃散 治胃火血燥脣裂。或爲繭脣。或牙齦潰爛作痛。

黃連炒

生地黄

升麻各一錢

牡丹皮八分

當歸一錢二分

右水煎服。

加味清胃散 即前散加芍藥、柴胡。治脾胃肝膽經熱。

柴胡清肝散 治肝經怒火。風熱傳脾。脣腫裂。或患繭脣。

柴胡

黃芩炒各一錢

黃連炒

山梔炒各七分

當歸一錢

川芎六分

生地黃一錢

升麻八分

牡丹皮一錢

甘草三分

右水煎服。若脾胃弱。去芩連。加白朮、茯苓。

濟陰地黃丸 治陰虛火燥。脣裂如繭。

五味子

麥門冬

當歸

熟地黃自製枲膏

肉苁蓉

山茱萸去核

乾山藥

枸杞子

甘州菊花

巴戟肉各等分

右爲末。煉蜜丸。桐子大。每服七八十丸。空心食前。白湯送下。

歸脾湯一名濟生

治思慮傷脾。血耗脣皸。及氣鬱生瘡。咽喉不利。發熱便血。盜

汗。晡熱等症。

人參

白朮

茯苓

黃耆炒

當歸

龍眼肉

遠志

酸棗仁炒各錢一

木香

甘草各三分

右水煎服。

加味歸脾湯 卽前方加柴胡、丹皮、山梔。治思慮動脾火。元氣損傷。體倦發熱。飲食不思。失血牙疼等症。

補中益氣湯 治中氣傷損。脣口生瘡。或齒牙作痛。惡寒發熱。肢體倦怠。食少自汗。或頭痛身熱煩躁作渴。氣喘脈大而虛。或微細軟弱。

人參

黃耆炒

甘草各錢五分

白朮

當歸

橘紅各錢一

柴胡

升麻各錢五分

右薑棗水煎服。

羌活散 治風熱傳脾。脣口潤皺。或頭痛目眩。或四肢浮腫如風狀。

羌活

茯苓

薏苡仁各等分

右每服三五錢。水煎入竹瀝一匙服。

人參理中湯 治口舌生瘡。飲食少思。大便不實。或畏寒惡熱作嘔。腹痞。此中氣不足。虛火上炎。

人參

白朮

乾薑炮

甘草炙各等分

右每服五七錢。或一兩。水煎服。

附子理中湯 治症同上。但四肢逆冷。或嘔吐泄瀉。

附子

人參各三錢

茯苓

白芍藥各三錢

白朮四錢

右水煎服。

香砂六君子湯 治口舌生瘡。服涼藥過多。以致食少作嘔。或中氣虛熱所致。

人參

白朮

茯苓

半夏

陳皮錢各一

甘草炒六分

藿香

縮砂仁炒各八分

右薑水煎。

人參安胃散 治胃經虛熱。口舌生瘡。喜熱飲食。

甘草炙

陳皮各五分

人參

白茯苓錢各一

黃芩二錢

黃連三分

芍藥七分

右水煎服。

七味白朮散 治虛熱。口舌生瘡。不喜飲冷。吐瀉口乾。

人參

白朮

木香

白茯苓

甘草炙

藿香各五分

乾葛一錢

右水煎服。

四君子湯 治口舌生瘡。脾胃虛弱。飲食少思。肚腹不利。

人參

白朮

茯苓錢各一

甘草炙五分

右薑棗水煎服。

六君子湯 治胃氣虛熱。口舌生瘡。或寒涼剋伐。食少吐瀉。

人參

白朮

茯苓錢各半

陳皮

半夏

甘草錢各一

右薑棗水煎服。

二陳湯 治脾胃虛弱。口舌生瘡。或中脘停痰。嘔吐惡心。飲食少思等症。

陳皮

茯苓

半夏錢各半

甘草炙五分

右薑棗水煎服。

葛花解酲湯 治酒積口舌生瘡。或嘔吐泄瀉。

白豆蔻

縮砂仁

葛花各五

木香二分

青皮二分

陳皮

茯苓

猪苓

人參

白朮

神麴炒

澤瀉

乾薑各三分

右水煎服。得微汗。酒病去矣。

龍膽瀉肝湯 治口苦或生瘡。

柴胡一錢

黃芩七分

甘草

人參

天門冬去心

黃連炒

山梔炒

龍膽草酒拌炒焦

麥門冬

知母各五分

五味子二分

右水煎服。

小柴胡湯 治肝膽經風熱侮脾土。脣口腫痛。或寒熱往來。或日晡發熱。或潮熱身熱。或怒而發熱。脇痛甚者。轉側不便。兩脇痞滿。或瀉利咳嗽。或吐酸苦水。

柴胡

黃連半錢

半夏

人參各一錢

甘草炙五分

右薑棗水煎服。怒動肝火。牙齒痛。寒熱。加山梔、黃連。

梔子清肝散 治三焦及足少陽經風熱。口舌生瘡。或耳內作痒。出水疼痛。或胸間作痛。或寒熱往來。

柴胡

山梔

丹皮各一錢

茯苓

川芎

芍藥

牛蒡子炒

當歸各七分

甘草五分

右水煎服。

人參敗毒散加防風荆芥名

治一切表症。瘡瘍愀痛。發寒熱。或拘急頭痛。脈細

有力者。

人參

羌活

獨活

柴胡

前胡

茯苓

川芎

桔梗

枳殼

甘草

各一錢

右水煎服。

奪命丹 治喉閉。或疔瘡發大毒。或麻木。或嘔吐。重者昏憤。若疔毒牙關緊急。用

三五丸為末。水調灌下。有奪命之功。

蟾

酥乾者酒化

輕

粉各五分

枯白礬

寒水石

煨

銅綠

乳香

沒藥

麝香

各一錢

硃

砂三錢

蝸

牛二十個另研無亦效

右爲細末。用蝸牛或酒糊爲丸。如菉豆大。每服一二丸。溫酒或葱湯下。

東垣白芷散 治大寒犯腦。牙齒疼痛。

麻黃

草豆蔻錢各一

黃耆

升麻錢各二

吳茱萸

白芷各四分

當歸

熟地黃各五分

藁本三分

桂枝二分

羌活八分

右另爲末。和勻搽之。

東垣牢齒散 治牙齦露肉。牙疳腫痛。或牙齒動搖欲落。或牙齒不長。牙黃口臭。

升麻四分

羌活

地骨皮各一兩

膽草一兩半酒浸

右爲末。以溫水漱口。每用少許擦之。

獨活散 治風毒牙痛。或齒齦腫痛。

獨活

羌活

川芎

防風各五分

細辛

荊芥

薄荷

生地黄各二錢

右每服三五錢。水煎漱嚥。

謙甫加減瀉白散 治膏粱醇酒。勞心過度。肺氣有傷。以致氣出腥臭。涕唾稠粘。咽嗌不利。口苦乾燥。

桑白皮二錢

地骨皮

片黃芩

甘草炙各一錢

知母七分

五味子十粒

麥門冬五分

桔梗一錢

右薑棗水煎服。

犀角升麻湯 治陽明經風熱牙疼。或脣頰腫痛。

犀角鎊

升麻

防風

羌活各一錢

白附子五分

川芎

白芷

黃芩各七分

甘草三分

右水煎熟。入犀末服。

玄參升麻湯 治心脾壅熱。口舌生瘡。或木舌重舌。或兩頰腫痛。

玄參

赤芍藥

升麻

犀角鎊

桔梗

貫衆

黃芩一錢各

甘草五分

右水煎服。

三黃丸 治實熱。口舌生瘡。作渴喜冷。或齒齦腫痛等症。

黃芩

黃連

黃柏各等分

右爲末。水糊丸桐子大。每服七八十丸。白湯下。

安腎丸 治腎虛牙痛腰疼。

補骨脂炒

葫蘆巴炒

茴香炒

川棟子肉炒

續斷炒各兩

桃仁

杏仁炒

山藥

扶苓各二兩

右爲末。蜜丸桐子大。每服五十丸。空心鹽湯下。

八味丸 治腎氣虛寒。牙齒作痛。面色黧黑。精神憔悴。脚膝無力。飲食少思。或痰氣上升。小便頻數。齒不堅固。或口舌糜爛。畏飲冷水。卽後方每料加肉桂、附子各一兩。

六味丸

加五味肉桂各一兩
減八味丸

治腎經虛熱。齒不固密。或作疼痛。或發熱渴淋。痰氣

壅嗽。頭暈眼花。咽燥脣裂。腰腿痿軟。自汗盜汗。便血諸血失痞。水泛。爲痰之聖藥。血虛發熱之神劑。

扶苓四兩

熟

地八兩
枰膏

山茱萸肉

乾山藥各四兩

牡丹皮

澤

瀉各三兩

右爲末。入地黃。煉蜜丸桐子大。每服七八十丸。空心食前滾湯下。地黃須自製。

滋腎丸 治腎經陰虛齒痛。或蘇蝕色黑。日晡發熱。脚膝無力。小便不利。肚腹脹

滿。詳見內科摘要

肉桂二錢

知母

黃柏各酒炒二兩

右爲末。水丸桐子大。每服二百丸。空心白滾湯下。

清心蓮子飲 治口舌生瘡。煩躁作渴。小便赤澀。口乾便濁。夜間安靜。晝則舉發。

此熱在血分。

黃芩

石蓮

茯苓

黃耆炒

柴胡

人參各一錢

麥門冬

地骨皮

車前子炒

甘草各半錢

右水煎服。

還少丹 治脾腎虛弱。牙齒作痛。或不堅固。又補虛損。生肌體。進飲食之聖藥。

肉蓯蓉

遠志去心

茴香

巴戟去心

乾山藥

枸杞子

熟地黃

石菖蒲

山茱萸去核

杜仲去皮製

牛膝

楮實子炒

五味子

白茯苓各等分

右爲末。棗肉并蜜丸桐子大。每服七十丸。溫酒日三服。

羌活附子湯 治冬月大寒犯腦。令人腦齒連痛。名曰腦風。爲害甚速。非此莫能救。

麻黃去節

黑附子炮各三分

羌活

蒼朮各五分

黃耆一分

防風

甘草

升麻

白殭蠶炒

黃柏

白芷各三分

佛耳草有寒嗽者用之如無不用

右水煎服。

十全大補湯 治氣血俱虛。牙齒腫痛。或口舌生瘡。或惡寒發熱。自汗盜汗。食少體倦。或寒熱作渴。頭痛眩暈。或似中風之症。

白茯苓

人參

當歸

白朮

黃耆

川芎

白芍藥炒

熟地黃生者自製

甘草炙各一錢

肉桂五分

右薑棗水煎服。

八珍湯 治氣血俱虛。口舌生瘡。或齒齦腫潰。惡寒發熱。或煩躁作渴。胸脇作脹。或便血吐血。盜汗自汗等症。

人參

白朮

白茯苓

當歸

川芎

白芍藥

熟地錢各一

甘草炙五分

右薑棗水煎服。

越鞠丸 治六鬱牙齒痛口瘡。或胸滿吐酸。飲食少思。

蒼朮炒

神麴炒

香附子

山查

山梔炒

撫芎

麥芽等炒各分

右爲末。水調神麴糊丸。桐子大。每服五七十丸。滾湯下。

四物湯

加牡丹皮柴胡山梔名加味四物湯

治血虛發熱。口舌生瘡。或牙齦腫潰。或日晡發熱。煩

躁不安。或因怒而致。

當歸

熟地錢各三

芍藥

川芎錢各一

右水煎服。

當歸補血湯 治口舌生瘡。血氣俱虛。熱渴引飲。目赤面紅。其脈洪大而虛。重按

全無。

黃耆錢炙一

當歸酒製二錢

右水煎服。

元戎四物二連湯 治血虛發熱。口舌生瘡。或晝寒夜熱。

當歸

生地黃

白芍藥

川芎

黃連

胡黃連各一錢

右水煎服。

犀角地黃湯 治火盛血妄行。或吐衄。或下血。

犀角鎊

生地黃

白芍藥

黃芩

牡丹皮

黃連各一錢

右水煎熟。入犀末服。若因怒而患。加柴胡、山梔。

當歸六黃湯 治陰虛內熱盜汗。

當歸

熟地黃自製

生地黃

黃耆炒

黃連炒黑

黃芩炒黑

黃柏炒黑各一錢

右水煎服。

逍遙散 治血虛有熱。口舌生瘡。或口燥咽乾。發熱盜汗。食少嗜臥。

甘草炙

當歸

芍藥炒

茯苓

白朮炒

柴胡各二錢

右水煎服。

加味逍遙散 治肝脾有火。血虛。即前方加山梔、丹皮。

謙甫解毒雄黃丸 治纏喉風腫閉。或卒倒死。牙關緊急。

雄黃一錢

鬱金一分

巴豆十四粒去油皮

右爲末。醋糊丸菉豆大。用熱茶送下七丸。吐頑痰立甦。未吐再服。若死而心頭猶熱。灌下更生。

謙甫龍麝聚聖丹 治心脾客熱。咽喉腫痛。或成癰不消。或舌本腫脹。口舌生瘡。

川芎一兩

生地黄

犀角鎊

羚羊角

琥珀

玄參

連翹各五錢

人參

赤茯苓

馬牙硝

片腦

麝香各三錢

桔梗

升麻各五錢

鉛白霜五錢

硃砂

牛黃各二錢

南礪砂一兩

金箔五十片

右爲末。蜜丸龍眼大。金箔爲衣。薄荷湯化下。或噙嚥之。

拔萃桔梗湯 治熱腫喉痺。

桔梗

甘草

連翹

山梔

薄荷

黃芩各一錢

右入竹葉水煎服。

無擇玉屑無憂散 治喉風痰壅。或口舌生瘡。或骨鯁不下。

玄參

貫衆

滑石

縮砂仁

黃連

甘草

茯苓

山豆根

荊芥穗

各五錢

寒水石

煨

硼砂

各三錢

右爲末。每服一錢。清水調下。此藥又去邪辟瘟止渴。

甘桔湯 治咽喉腫痛。

甘草

六錢

桔梗

三錢

右水煎服。

白虎湯 治胃熱作渴。暑熱尤效。

知母

石膏

各二錢

粳米

半合

右水煎服。

調胃承氣湯 治中熱。大便不通。咽喉腫痛。或口舌生瘡。

大黃一兩 甘草五分 芒硝四分

右每服五七錢。水煎。

桃仁承氣湯 加當歸一錢名

治瘀血停滯。腹內作痛。或發熱發狂。大便秘結。

桂枝 芒硝 甘草炙各一錢 大黃二錢

桃仁五十粒去皮尖研

右水煎空心服。

清熱補氣湯 治中氣虛熱。口舌如無皮狀。或發熱作渴。

人參 白朮 茯苓 當歸酒拌

芍藥炒各一錢 升麻 五味子 麥門冬

玄參 甘草炙各五分

右水煎服。如不應。加炮薑。更不應。加附子。

清熱補血湯 治口舌生瘡。體倦少食。日晡益甚。或目瀼。

當歸酒拌

川芎

芍藥錢各一

熟地黃酒拌一錢

黃柏

知母

五味子

麥門冬各五分

玄參七分

柴胡

牡丹皮各五分

右水煎服。如不應。用補中益氣湯。加五味治之。

清熱化痰湯 治上焦有熱。痰盛作渴。口舌腫痛。

貝母

天花粉

枳實炒

桔梗錢各一

黃芩

黃連各錢二分

玄參

升麻各七分

甘草五分

右水煎服。

升麻柴胡湯

芍藥

柴胡

山梔子

升麻

木通各一兩

黃芩

大青

杏仁各五錢

石膏

右每服四五錢。水煎。

涼膈散 治實熱。口舌生瘡。牙齒作痛。或喉舌腫痛。便溺祕赤。或狂言妄語。大便秘結。

大黃

朴硝

甘草各一兩

連翹四兩

山梔

黃芩

薄荷葉各一兩

右爲末。每服五七錢。水煎服。如未應。當加之。

防風通聖散 治風熱熾盛。口舌生瘡。大便秘結。或發熱煩躁。瘡毒作痒等症。

防風

當歸

川芎

芍藥

大黃

芒硝

連翹

薄荷

麻黃

桔梗

石膏

黃芩各一兩

白朮

山梔子

荊芥各二錢半

甘草二兩

滑石三兩

右每服五七錢。水煎。或爲末。白湯調下。

清咽利膈湯 治積熱。咽喉腫痛。痰涎壅盛。煩躁飲冷。大便秘結。

金銀花

防風

荊芥

薄荷

桔梗炒

黃芩炒

黃連各半錢炒

山梔子炒研

連翹各一錢

玄參

大黃煨

朴硝

牛蒡子研

甘草各七分

右水煎服。

金鑰匙 治喉閉喉風。痰涎壅塞。

焰硝五錢兩

硼砂五錢

腦子一字

白殭蠶一錢

雄黃二錢

右各爲末。以竹管吹患處。痰涎即出。如痰雖出。咽喉不利。急針患處。以去惡血。

潤喉散 治氣鬱咽喉閉塞。

桔梗五錢兩

粉草四錢

草紫河車四錢

香附三錢

百藥煎五錢

右爲末。敷口內。

又方 薄荷葉、蓬沙各五錢。冰片一錢。爲末。吹患處甚效。

破棺丹一名通關散

治咽喉腫痛。水穀不下。

青鹽

白礬

礪砂各等分

右爲末。吹患處。有痰吐出。

小續命湯 治陰毒喉痺。

麻黃五分

防風

芍藥

白朮

人參

川芎

附子生

防己

黃芩各二分

桂枝

甘草各五分

右水煎服。

仲景半夏湯 治傷寒喉中生瘡。不能發聲。

半夏

桂枝

甘草各等分

右每服七八錢。水煎候冷。細細嚥之。

葶藶散一名換肌清毒散

治楊梅瘡。不拘初起潰爛。或發於舌間喉間並效。

草

薛一名土扶苓又一名冷飯團三錢

當歸

白芷

皂角刺

薏苡仁錢各二

白薛皮

木瓜不犯鐵器

木通

金銀花分各七

甘草五分

右水煎服。

清咽消毒散

治咽喉瘡腫。痰涎壅盛。或口舌生瘡。大便秘結。卽荆防敗毒散加

芩、連、硝、黃。

人參固本丸

治肺氣燥熱。小便虛赤。或肺氣虛熱。小便澀滯如淋。此治虛有火

之聖藥也。

生地黃酒拌

熟地黃用生者酒拌銅器蒸半日

天門冬去心

麥門冬去心各一兩

人參五錢

右除人參爲末。餘藥搗膏。加煉蜜少許。丸桐子大。每服五十丸。空心鹽湯或溫

酒下。中寒人不可服。

刺少商穴法 穴在手大指內側。去爪針如韭葉。刺入二分許。以手自臂勒至刺處。出血卽消。若膿成者。必須針患處。否則不治。

口齒類要終

口齒類要附方并註

〔清〕 尤 乘 撰

尤氏喉科秘書

中國醫學大成

尤氏喉科祕書提要

清、尤乘撰。無錫人。東山陳在豐鈔藏。慈谿馮暑峰。於乾隆乙卯年授傳手錄。首列喉症總論及看法。次列咽喉門各證。次列治法。次列製藥法則。喉症應用主方。牙症應用主方。外治用藥法。加減良方等類。外吹各藥製法。確有師傳祕授。慎勿輕視。內服諸方。加減別有經驗特識。可法可傳。實爲喉科祕書之一種。

尤氏喉科秘書 提要

序

醫道之小焉者也。於小道中。而以喉科著。抑又小矣。然玉霜一點。紅粉半塵。遽爾既危於俄頃。起沉疴於斯須。人巧極天工。錯卽未窺全豹。而小中見大。施濟之功在焉。予添列鑾宮。未暇問岐黃術。而習見夫庸醫之誤人也。貪夫之徇利也。早無以爲鑒。夕無以爲飧者之鳴號焉。而莫如引手救也。慨然念士生當世。不獲身名民社。以宏輔相。或得一術以濟人於危急。何莫非立達之初心。奈役役半生。願莫之遂。今年秋。假館東山之麓。陳生在豐。以五十金得是編於梁溪尤氏。予叨一日長。得晏然有之。此固生之雅意。抑亦予之急想。世手而鬼神通之者歟。而予於此。竊自念也。傳曰。正其誼。不謀其利。明其道。不計其功。聖賢其事。日月爲昭。人能本此意以行之。內省可無慚矣。人有裨益。道雖小也。利實溥焉。此世上齷齪小夫。措

爲利事耳。道於何有哉。爰述數語以自警。且使後之子孫。勿視爲尋常方藥。而傳之非人。抑知此爲明道之書。而勿開利竇也。

乾隆歲次辛丑中秋後余假館於蠡河之南惠氏深想數年借得私時祕錄
乾隆乙卯年浙慈馮晷峰授傳手錄

尤氏喉科祕書目錄

喉症總論	一—三
咽喉門	
喉菌	四
喉癰	四
喉癰	五
種舌喉癰	五
喉關	五
纏喉風	五
喉刺	六

口牙舌頸面腮門	
牙癰	七
牙齦	七
牙腫	七
牙宣	七
牙菌並挂	八
穿牙疔	八
走馬牙疳	八
崩砂疳口風	九

舌癰	九
木舌	九
舌菌	九
懸癰	〇
糜疳	〇
鵝口	〇
馬牙	〇
頸癰	一
托腮癰	一
連珠口疳風	一
繭脣風症	一

喉症治法	一二一
製藥法則	一七
取百草霜法	一八
製黃柏法	一八
製人中白法	一九
製牙皂法	一九
製殭蠶法	一九
製燈草灰法	一九
製鎗硝法	二〇
碧丹配合法	二一
金丹配合法	二一

喉症煎藥主方	二三
舌症煎藥主方	二三
牙症煎藥主方	二四
製三黃散法	二五
製梅礬法	二五
用藥法	二六—三一
喉症驗方	
綠袍散	三二
蘆薈散	三二
冰黃散	三二
十寶丹	三三

又方	三三
上清丸	三四
清咽消腫飲	三四
玉鎖匙	三五
蘇子降氣方	三五
加減良方	三五
驅腐丹	三六
吹喉散	三六
吹口方	三六
消腫代刀散	三七
又方	三七

口疳藥方……………三八

尤氏喉科祕書

喉症總論

咽喉爲人身呼吸飲食門戶。方寸之地。受病危險。其症甚繁。大約其要總歸於火。蓋少陰、少陽。君相二火。其脈並絡於咽喉。故往往爲火症之所結聚。君火勢緩。則結而爲疼。爲腫。相火勢速。則腫甚不仁而爲痺。痺甚不通。則痰塞以死。經云。一陰一陽。結爲喉痺。火者痰之本。痰者火之標。火有虛實。實火應過食煎炒炙博。蘊結積毒。其症煩渴。二便秘塞。風痰上壅。將發喉痺。症先胸隔不利。脈弦而數。治宜先去風痰。後解熱毒。虛火。或應飲酒太過。或應忿怒。或應色慾。火炎上攻。咽喉乾燥。必二便如常。少陰心脈微。治宜補虛降火。凡用藥。不宜純用寒涼。取效目前。上熱未

除。中寒復起。毒氣乘虛入腹。胸前高腫。上喘下泄。手足指甲青黑。七日以後。全不
進食。口如魚口者死。且治喉症。最忌發汗。誤人不淺。或針砭出血。已具汗意。但凡
寒傷於腎。及帝中腫者。切不宜針。至如內傷虛損。咽喉失音。無法可治矣。帝中即
喉嚨花柳
喉症初起。一日寒戰即生者。發後身涼。口不碎。又無重舌。或二便俱利。不可認作
熱症。皆因陰虛寒而發。其痰不可吊盡。蓋此痰即身中津液所化。與熱症乳鵝腫
舌之痰。以流盡而愈者不同。若亦流盡。則精神竭而必斃。先以藥吹。或用水渙之
法。使喉一通。即便服藥。初劑發散和解。第二劑即施溫補資養之藥。設三四日後。
再發寒戰。或心痛。骨痛。脇疼等症。皆屬難治。發時牙關緊閉。舌喉俱腫。口碎而臭。
或有重舌。及舌上有黃屑。發屑者。發後下午再發寒熱。二便秘塞者。即作熱症。用
石膏敗毒散主之。然易愈之症。如漸起之症。三四日後。而發寒熱者。雖凶。亦不爲
害。惟有症未減。而牙關反不緊閉。脣口不腫。而紋如好人者。不治。舌腫口滿者不

治。色如胡桃、茄子、砂紙者不治。或連重舌發寒熱。猶可治也。舌以筋按之。其色雪白。起筋即紅紫色。此身內之血已死。然口臭者猶可或生。尤忌口渴氣急痰多而稠如桃膠者。死其至矣。一頸俱紅腫者。亦極危也。面紅帶紫。面青帶白。神氣少者俱不治。不語者死。略能語者。尙有可生之機。面色少神。喜坐低處者。亦極難治。夫帝中性命所關。舌下紫腫爲舌系。下通於腎。白腫不治。傷者必死。

凡看喉症。必先看當心之中。有紅色者不治。如紫黑者尤危。俱不可下藥。記之慎之。

凡喉看法。必先刺所發一邊手之少商穴。如血流不出者。必死在頃刻。即好處一邊流出血紫黑色者。亦死之症。業是者。貴辨之審也。

咽喉門

喉痺屬痰。屬風。屬熱。皆應鬱火而兼熱毒。腫甚不仁。乃咽喉之重症。喉痺者。總名也。要去風痰。解毒。開鬱悶。其症自愈。乳鵝有單。有雙。有連珠。多應酒色。鬱結而生。初起一日痛。二日紅腫。三日有形。細白星。即無細星發寒熱者凶。四日勢定。治之四五日可愈。其症生於喉旁。一邊生者為單鵝。左右生者為雙鵝。單輕雙重。連珠尤重。左右為胎。二白星上下相連。狀如纏袋者。為連珠鵝。

喉菌

病屬憂鬱。血熱氣滯。婦人多患之。形如浮萍。略高而厚。紫色。生於喉旁。輕則半月二十日。重則徑月月餘。要在治之得法。及患者守慾忌口。

喉癰

虛火上炎。肺金火旺。致攻喉間。生如絲。如景窰紋樣。又如秋海棠葉背後紅絲一般。飲食阻礙。嚥痛。雖不傷命。久則喉啞失音。而不能救矣。

喉癰

此因過食辛辣、炙燂、厚味、醇酒。感熱而生。屬肺病。喉間無形。但紅腫而痛。重者亦發寒熱頭痛。四五日可愈。

腫舌喉癰

腫舌病也音殺

肥人感熱性躁者。多患此症。凡舌下生如小舌樣者。爲腫舌。如連喉腫痛者。卽爲喉癰。不痛者。非是。大抵腫舌兼喉癰者。勢凶。

喉關

傷寒後發難治。爲氣閉不通。無形無聲。

纏喉風

因心中躁急而發。先二日必胸膈氣緊。出氣短促。然咽喉腫痛。手足厥冷。頸如絞轉。熱結於內。腫繞於外。且麻且痒。喉內紅絲纏繞。手指甲白色。手心壯熱。喉腫而

大風痰壅盛。如曳鋸聲。是其候也。最爲忌症。初起一日。卽治可治。若過一日夜。目直視。喉間如雷聲者。不治。燈火近患人吹滅者。不治。若喘急額汗者。危在旦夕。又云。纏者。自頤纏繞。赤色寒熱。又口開而不闔者。是其候。必待過一週時無恙。方可用藥。宜極早回頭。

喉刺

多因先患勞病。重症旣久。虛火上升。榮血已枯。其喉上頸。有紅點密密如蚊蟲咬斑樣。此係危篤將殂。勿治。

口牙舌頸面腮門

牙槽風初起。先齒痛不已。後卽牙齦肉浮腫。紫黑色。或出血。久則腐爛。牙漏。卽前症久而不愈。齒縫中出白膿。極難調治。甚則齒落。如上左邊門牙落者。

不治。以上二症。皆屬胃火腎虛。

牙癰

一名牙棋風。初起有一小塊。生於牙根肉上。或上或下。或內或外。其狀高硬。牙癰、牙腫、牙菌三病。大同小異。治法亦不難。

牙齦

生於牙盡齦中。齒不能開。牙關緊閉。此症初起。勢重。甚至夜尤甚。然亦不難治。亦不妨命。

牙腫

字典無此腫字

屬胃火。如豆大。生無定處。或內。或外。

牙宣

齒縫出血。上屬脾。下屬胃。實火上攻所致。亦有胃虛火動。腐爛牙根。以致淡血時

時滲漏不已。

牙菌並挂

生於牙根。其狀紫黑色。高低如菌狀。此系火盛血熱而兼氣滯。

穿牙疔

先三日牙痛。發寒熱。後痛不可忍。牙根上發紫塊者是也。穿牙毒。即前症。初起者未破爲疔。已破卽爲穿牙毒。其色紅者可治。青者不可治。疔毒又與牙槽風牙漏相是。治法亦相仿。

走馬牙疳

或因胎毒痘毒後。發致牙根腐爛成疳。殺人最速。鼻梁上發紅點者。不治。其色如乾醬。一日爛一分。二日爛一寸。故名走馬。以喻速也。有齒者落盡而死。上牙左邊門牙爲牙之主。此牙一落。其餘盡落。若此牙不落。餘牙雖落。可能爲治。小兒走馬

疳。及大人牙槽風。均皆如是看法。

崩砂疳口風

自舌下牙根上腫赤。口內作痛如燙熱。牙根漸爛。亦以脫牙爲患。方見舌症

舌癰

舌紅而腫大。屬心經火盛。地角亦紅腫。舌黃。舌上黃。生腫痛。亦屬心火。方見舌症

木舌

舌頭腫大。如煮熟猪肝。不能轉動憂鬱所致。又有一種。生舌根下。如白棗。有青紫筋。不能速愈。初起不痛。不發寒熱。漸至腫大。初起易愈。遲則難痊。亦以憂鬱所致。即是重舌。方見舌症

舌菌

屬心經火多。因氣鬱而生。生舌上。或如木耳。或如菌狀。其色紅紫。方見舌症

懸癰

口裏顎上紫泡。如荳大者是。紫舌脹。屬心火。內必煩躁悶亂。

糜疳

滿口糜爛。與小兒口疳同治法。

鵝口

一名雪口。初生月內小兒。滿口舌上白屑。如鵝口樣。故名。

馬牙即板牙日逐要挑破

初生小兒。胎內受過熱毒。見風即生。但看牙根上有白色如脆骨者是。此症欲發出胎即打噴嚏。含乳或吞或吐而不吮。其病已深。若不急治。入腹即死。切勿認作黃疸之類。出胎即要細看。日逐要挑。至三四日病即成。五六日堅硬難治。甚有發而再發。大約一月外。方可免此患。

頸癰

胸前紅腫。形在外亦欲內攻。甚則喉腫。閉而出膿。面癰相仿。前症屬腎。

托腮癰

生於腮下。因飲食厚味。多飲醇酒。熱毒所致。

連珠口疳風

自舌下起小泡。初起一個。又起一個。甚至多多。連珠生起。

繭脣風症

此乃陽明胃經。因搏炙所致。或兼思慮暴怒。痰隨火行。流至於脣。而結如荳大。若蠶繭突腫。堅硬作痛。飲食妨礙。或破流血。久則難治。若初起無內症。用蘇子大艾炷灸三壯。貼蟾酥膏蓋之。日久漸愈。若有內症。作渴。早服八味丸。午服甘露飲。日久流血不止。形弱面黑。虛熱痰生。腮顴紅而口渴甚者。難治。

清涼甘露飲

犀角

茵陳

石斛

枳殼

麥冬

生地

黃芩

柴胡

知母

生甘草

枇杷叶錢各一

燈草

淡竹葉

喉症治法

凡喉症至五日即重。如言前。症雖重尙未成膿。藥能消散。若至五六日。患處多成膿。隨便穿破。後必爛成一窠而難愈。爛處須用口疳藥。多用龍骨、珍珠。凡傷寒後患連珠鵝及喉閉者不治。其症喉項強硬。目睛上視。故多不治。

凡喉症非急症。一二日未必發寒熱。病尙輕緩。若至第三日發寒熱。症必加重。須

問其大便通利否。如二便利。症雖加。不過浮火上攻。服解毒消風清火之劑。即愈。若二便不通利。乃內有實火。非用降火解毒重劑。及通二便之藥。火從何而泄。病從何而解。亦即問其頭可痛否。如頭痛則兼傷寒。難治。

凡喉症。非俟其大便出後。方可望痊。若大便秘結。未可輕許其無礙。

凡喉症初起。大便秘結。宜用大黃、玄明粉通之。則火自降而易痊。即降火解毒之劑內。去前胡。加大黃、玄明粉行之。若至五六日久不食。而大便秘。用之即刻斃。蓋病久胃氣已虛。豈宜再用硝黃。只宜用蜜導法。此秘訣也。凡患喉症。無痰者不治。凡患喉症。須吹藥四五管。方可出痰。三次可以全愈。其出痰。初用必要多用金丹。爲妙。必直對喉嚨中重重吹之。即提出吹管。恐痰即嘔出。

凡喉症初起一二日。用碧丹漸加金丹。勢甚者。金丹爲君。或純用金丹。方能吊出頑痰。出痰非金丹不可。

凡喉症。至胸前紅腫。此係肺癰。用蜜調。加百藥煎服之。凡喉中鬱而紅痛者。用燈草灰吹之。

凡婦人喉中腫痛。有因經閉。致火上攻而患者。宜內服通經藥。經通則喉自愈。凡喉症凶者。面發腫。白亮無光彩。脈沉微無力。是神氣外泄無陽之症。斷不可治。若面發紅腫。脈來洪大有力。症雖重。是有元氣火盛。治之易痊。

凡腮內口內腫爛。用筴纏絲綿蘸水輕攪患處。痛者。用藥必愈。如不痛者。卽死肉。多難治。

凡舌腫脹滿口。吐舌在外。難以納藥者。用殭蠶、皂角。俱研極細末。等分和勻少許。吹入鼻中。牙關自開。痰涎自出。然後用綿纏竹筴蘸甘薑湯潤其脣口。再加用四味口疳藥多加頂高冰片。頻吹自愈。

凡吹藥。不但腫碎患處。並四圍好肉上亦要吹之。方不散開。且易愈也。至若舌上

乾甚。難於吹藥。或用蜜潤。或用湯水濕之。藥可吹上。喉內吹法。須用氣和平。用管週遍爲妙。

凡舌腫大。用生黃柏末加冰片敷之。或出血用炒柏加冰片敷之。

凡腫舌、喉癰。如大便閉。應藥內加玄明粉、大黃。小便不利。加六一散。服之甚效。一法也。

凡用碧丹。症凶者。冰片多於甘草。將愈。甘草多於冰片。

凡患牙癰。牙根紅腫。但牙關不閉。口能開闔。若患牙齦。牙根紅腫。脹肉突出。

凡牙關緊閉。口不能開者。先用金、碧二丹吹入牙根。外用黃熟香削成鑿子樣。漸挨進牙縫。則牙關漸開。即將金丹吹入患處。

凡吹喉症。或欲出痰。加皂角少許。

凡初起吹藥。須令患者低頭。溜出痰涎。唾。

凡喉癰及單雙鵝。率用碧丹。其他重症。金丹、碧丹兼用。須知先後多寡。初起碧九分金一分。吹至五管。改用碧八金二。再次用碧丹七分金丹三分。如症重。碧、金各半。用至三五次後。痰涎必上壅。然後用金六碧四。將吹管直對喉中。重吹一吹。隨手出管。即吊出痰。此要訣也。若症極重。竟用金八分碧二分尤妙。凡喉症先碎。先用長肉藥吹之。後用碧丹以治之。

通經方 孕婦忌服

當歸

赤芍

廣皮

川斷 各一錢

牛膝 一錢五分

川芎 六分

紅花 七分

甘草 五分

桔梗 一錢

血熱加大生地、丹皮。熱極再加犀角。經久不行加蘇木、五靈子、澤蘭葉。腹痛加元胡索、桃仁。股痛加杜仲、倍牛膝、膏滋藥。即蜜調青炭色。用龍腦、薄荷為君。玉

丹爲臣。川貝去心爲佐。燈草灰、百草霜、甘草、冰片爲使。先將玉丹、百草霜研和後。入燈草灰再研。再入薄荷、甘草、川貝。研極細。再入冰片。再研勻。蜜調服。喉癰喉菌。須時時嚙嚙。若症重兼服三劑。及吹藥。

製藥法則

製硝礬法。別名玉丹。又名雪霜。先用生礬一兩打碎如豆大。入銀罐。內入爐。用桴炭火煨。以食筯刺入罐底。攪之無塊爲妙。次將上好硝三錢打小塊投下。約十分之三。再次將白礬砂三錢打碎投下。亦十分之三。少頃再投入生礬。逐漸投下。候煨盡。照前投硝、礬少許。如是逐漸投完。直待浦起罐口。發如饅頭樣。方可加起炭火。燒至乾枯。然後用淨瓦一大張。覆罐口。一時取起。將牛黃少許爲細末。用清水五六匙調和。以匙超滴丹上。將罐仍入火內烘乾。卽取起。連罐覆潔淨地上。先

以紙襯地。罐上仍用碗覆之。過七日。收貯聽用。須輕鬆無監紋者佳。如有監紋者。不堪用。或留作蜜調用。亦好。算數藥。煅時初起火宜緩。然亦不可太緩。恐致礬僵。定難鎔化。後必監實有紋。中間及後。須用武火。又加礬末煆盡。即投硝、礬。必不能全化。以致監實有紋矣。須用傾過之舊罐。取其入爐不爆碎也。如用新罐。先將炭烘過。然後入爐。亦不可放濕炭上烘。使濕氣入罐。經火必碎。又說傾銀過之罐。恐猶有毒氣。此丹宜製備。愈久愈妙。

取百草霜法

須燒茅柴者。謂之百草霜。取其近底者。鍋心及鍋口邊。俱不可用。先刮去浮面一層。後刮去中一層。不可重刮。蓋着鍋第三層。又不堪用。

製黃柏法

先揀好者切片。用荆芥穗爲君。甘草爲臣。浸煎濃湯。浸至片子柔軟。取起攤瓦上。

慢火炙至金色。如焦者去之。再入白蜜湯煎過一次。晒乾聽用。

製人中白法

取多年溺器。用水灌滿。置火爐上。滾則傾出。如是數次。去淨穢氣。用鹽泥封固。大火煨之。半日取起。冷定去泥殼。取器內淡紅者。收貯用之。久置地上。出火毒氣。爲妙。

製牙皂法

取堅小不蛀者。瓦上炙至其色光明而脆。去兩頭聽用。

製殭蠶法

揀其直細而腹小者爲雄。若腹大而粗者爲雌。不用。將牙刷蘸水刷去石灰。瓦上慢炙至醬色。要折斷中間無絲連者。研細聽用。

製燈草灰法

務擇其白色者。先鋪在桌上。以清水噴濕。候心內潮潤。將竹管堅固不碎。兩頭厚薄相勻者。以水浸管內。以濕紅布團塞緊一頭。即將燈心塞入。以竹筴搥實。傾去水。如是逐漸塞滿。再用濕紅布塞實。入桴炭火煨之。觀其煙盡。及管內通紅。取出放潔淨平地上。須以水預噴濕地上。用碗覆之。待冷取起。剝去外面之灰。打開看。藥灰黑色。成團者佳。煨時勿令竹管爆碎。碎則無用。不可煨過。過則灰白。不可煨生。生則不成灰。此藥最輕。宜多備。

製鎗硝法

擇其明淨紋路鎗鎗然者。故名。又名馬牙硝。以其長白如牙而厚大者。先以溫湯蘸過。綿花搥乾。仍用紙包。放灶上椒鹽洞內五六日。收其濕氣自乾。白如霜。或如提玄明粉法。提過數次。則味淡而性平。且合藥可以久留。此要臘天製為妙。此金丹內用。玉丹內用。不必如此製。

碧丹配合法

每玉丹三分。配百草霜半匙。乳鉢研細。次入燈草灰一厘。配成如瓦灰色。再加甘草末三匙。薄荷末二分。研極細。然後入好冰片半分。多加尤妙。再研勻。入小磁罐。塞頭要深。勿令出氣。此藥須臨時配合。若五六日即無用。如遇陰雨天。一日即無用。

凡春夏薄荷多。玉丹少。藥成青色。秋冬玉丹多。薄荷少。藥成白色。此要訣也。予初得是本。云再加硼砂少許。

如要出痰。再加皂莢少許。薄荷、龍腦者佳。梗細葉小。梗粗葉大者。却不堪用。

金丹配合法

每提過鎗硝一錢八分。配蒲黃生用二分。絹篩取細末。去粗褐色者。共研細。次下殭蠶一分。牙皂一分半。共研淡黃色。加冰片一分研勻。此藥可以久用。惟冰片臨

用加入。此藥帶治消腫出痰。牙齦腫牙穿牙疔毒。用此治之。咽喉等症。則兼用碧丹。看症加減用。症重者。再加牛黃於本方內。如喉症重及瘋。加殭蠶、牙皂。輕症只用牙硝、蒲黃。蓋碧丹消痰清熱解毒驅風。故爲良劑。尙屬平緩。不如金丹消腫毒。除風熱。開喉閉。出痰涎。最爲神要。但喉症初起。金丹不宜多用。因其能直透入內。且善走散。若初起即多用之。恐輕症不能勝藥力。反與扞格不相入也。口疳藥即能長肉。每薄荷三分。配孩兒茶一分半。製柏末一釐。白龍骨二釐。白芷取堅白細小者爲末。厘半。如腫痛。用三四厘。生甘草末半分。珍珠新白製末半分。配合研末加冰片三厘。再研勻入磁瓶收貯。凡遇口碎。及各樣口疳吹之。初痛腫起而熱甚者。多薄荷。取其辛涼。能發散也。若還不腫。熱不甚。病久宜以長肉爲主。本方多用兒茶、珍珠、龍骨。配成紫色。及一切喉症碎者。亦用此長肉。如治走馬疳串牙毒及極重口疳。初生小兒胎毒口疳。本方加牛黃倍珍珠。無不奏效。惟臭腐而黑

者不治。

治痧痘後口疳。去黃柏、龍骨。加牛黃、倍珍珠。即症逆極凶。無不立效。餘症如之。無不神應。此係口疳祕訣。

喉症煎藥主方

元參

黃芩

牛蒡子

前胡

連翹殼

山梔

桔蘐根

桔梗

生甘草

薄荷

或加金銀花。如發寒熱加柴胡。頭痛加煨石膏。口乾加麥冬、知母。胸膈飽悶加枳殼。鬱熱加芍藥、貝母、竹茹。

舌症煎藥主方

山梔仁

黃

連

舌乃心之苗

木

通

連翹殼

犀角不過一錢

生地

丹皮

赤芍

麥冬

生甘草

如兼口脣。必用煨石膏。少瀉脾火。如有鬱有痰。加川貝。便閉加大黃、朴硝、枳殼。病後忌用寒涼。

牙症煎藥主方

齒乃腎之標。骨之餘。足陽明胃經之脈貫絡。牙齒齒齦。手陽明大腸之脈貫絡。下齦屬腎。有風熱。熱有腎虛。

元參

丹皮

知母

地黃

甘草梢

山梔

地骨皮

黃柏

車前

白芍

如熱加煨石膏爲君。炒黑升麻爲佐。如有風加荊芥穗。虛加熟地、杞子。如欲解

毒加黃連、連翹。若穿牙疔毒。則用消腫解毒之藥。加紫花地丁等。

製三黃散法

生地爲君。生蒲黃爲臣。牛黃爲佐。冰片爲使。共爲細末。用芭蕉根汁調敷患處。或用扁柏汁加蜜亦可。

或生大黃、蒲黃、薑黃各一錢。冰片一分。麝香三釐。白蜜調。加葱汁、薑汁三匙。或芭蕉根汁照前法。此藥治頸癰面癰。如腫硬不消。因氣凝血滯。或痰塊結而不散。則兼陰症矣。薑、葱汁爲要。此藥併治小兒丹毒。

製梅攀法

取大青梅。圓嫩而脆者。先切下殼蓋。好好去核。再研細白礬末。捺入在內。仍用蓋覆之。以竹針筌好。過一宿。明早用炭火煨之。其青梅炭。火燼則無用。其梅肉。煨過之礬。輕如膩粉。味至半酸。收貯聽用。

用藥法

一治單鵝、雙鵝、及連珠鵝。吹碧丹五分。金丹一分。後金二碧三。用吹痰。兼服煎劑。左加黃連、犀角。右加赤芍、柴胡。雙鵝兼用之。大便不通。加枳殼、玄明粉。候大便通。則症自愈。至三日。看喉內但紅腫而無細白星。卽喉癰症。

一治喉癰。金丹、碧丹少許。內服膏滋藥煎藥。

一治喉癰。用碧丹頻吹。膏滋藥不時嚥。再服煎劑。加土貝下氣。須戒忿怒憂思酒色。忌食鵝、鵪、魚、蝦、蟹、猪首、羊肉、肝腸、茄子、黃瓜。及一切辛辣炙博動氣動火等物。一月可愈。

一治喉菌初起。碧丹五分。金丹一分。後用碧三金三和吹。亦須頻嚥膏滋藥煎劑。不可間斷。

先將苡菇打汁搽上。然後吹藥則速效。

一治腫舌、喉癰。煎藥。犀角地黃湯加減。其腫舌用金丹吹至舌根。及舌下兩旁。時刻不可間斷。方能速效。喉內用碧十金一。亦須要勤吹。

一治纏喉風。最爲急症。初起即用金、碧二丹頻吹。內服煎劑可救。稍遲則不救。藥須兼牛黃。

一治牙槽風。用口疳藥加牛黃。倍珍珠、兒茶。初治五日。紫色退至白色。再五日。可長肉。再五日。方可望痊。若成牙漏。齒縫出血膿。極難調治。須戒酒色。禁食一切毒物。內服滋腎降火之劑。外用頻吹藥。耐心治之。漸愈。

一治牙癰。卽口疳藥吹之。一月愈。

一治牙齦。先用金、碧二丹。吹入牙根。外用黃熟香挾開牙。再將金、碧丹吹至齦處。腫塊自消。

一治牙腫。先用金丹。後用口疳藥。多加薄荷冰片。煎藥加石膏、連翹。
一治牙宣。內服扶脾清火之劑。外用珍珠散止之。

生地 三錢

丹皮 一錢

梔子 一錢

荊芥 八分

煅石膏 二錢

白芍 一錢

麥冬 一錢

歸頭 一錢

知母 一錢

赤苓 八分

如小便赤色。加木通。大便閉結。加玄明粉。食後服。若牙根腐爛。用長肉藥吹之。
先宜服清胃之劑。涼血之藥。外用珍珠藥吹。此指實火而言也。若胃虛火動。腐爛牙根。外用長肉膏。內用此方煎藥。此分虛實火尤為確。

珍珠散

龍骨 煨 一錢

珍珠 一錢

兒茶 五分

海螵蛸 一錢

參三七 二錢

沒藥

乳香 五分
去油各

降香 節 用 一錢
鐵器忌

象皮炙一錢

硃砂五分

冰片一厘

各爲法製細末。將新棉花如指大。捻成團。蘸藥塞患處。以指按之。勿動。二三次即止。

一治牙菌。用口疳藥吹之。兼用煎劑。

一治穿牙疔毒。未破爲疔。用金丹。略加碧丹吹之。內服涼血降火解毒消疔之劑。已破爲毒。用口疳藥。加牛黃。倍珍珠。兒茶。亦服煎藥爲妙。

一治舌癰。金、碧二丹各半。吹在舌根。加黃連、犀角、山梔。俱要多。

一治紫舌脹。單用碧丹。服犀角地黃湯加減。一二日愈。

一治木舌、重舌。初起。先用金、碧二丹。後用金丹吹之。內服煎劑。雖凶不爲害矣。

一治上顎癰。用銀針挑破。用口疳藥吹之。碧丹亦可。

一治頸癰、面癰、托腮等症。法防內攻。須用碧丹吹之。兼服煎劑。外用三黃散敷於

患處。

一治小兒走馬疳。初生胎毒、口疳、及大人糜疳。重者俱用口疳藥。加牛黃、珍珠。如痧痘後口疳。去龍骨。加牛黃、珍珠。看輕重加減。

一治雪口。先用絲綿捲筋蘸水攪去白醬。用口疳藥吹之。頻攪頻吹自愈。內服犀角汁。或犀角解毒丸亦可。

犀角	一錢	桔梗	一兩	赤芍	五錢	生地	五錢
----	----	----	----	----	----	----	----

甘草	二錢	朴硝	二錢	連翹	六錢	元參	六錢
----	----	----	----	----	----	----	----

力子	五錢	青代	二錢
----	----	----	----

共爲細末。煉蜜爲丸。如龍眼大。每服一丸。薄荷湯下。兼驚風。硃砂爲衣。并治小兒諸飛丹毒。及痧痘後餘毒。

一治小兒走馬疳。先用溫水青絹繳淨。以竹筯撥開牙關。將銀簪淺淺挑出血。繳

淨。用口疳藥吹之。立愈。

一治走馬疳。

人中白二錢

雞內脰煨

青代錢各一

白礬三分

冰片三分

牛黃二厘

共爲末。每用下吹患處。先用薄荷湯或川連湯。用綿包指頭。洗淨口內。方可吹之。

又方。陳久醬茹炙乾煨灰存性。吹之亦可。

一治口喉內結毒。

薄荷四分

珍珠二分

甘草八分

牛黃一分

冰片一分

共爲末吹之。如痰飛結毒。用上好掃盆少許。

喉症驗方

綠袍散

薄荷

荊芥錢各五

青代

製硝

月石各二錢五分

百藥煎

甘草錢各一

右爲細末和勻。乾點舌上。令其自化。或新汲水和白蜜調搽。

蘆薈散 治口鼻發疳用。

蘆薈

胡連

兒茶

薄荷各五

青代

硼砂各二分

冰片五厘

爲細末。吹患處。

冰黃散 治口疳併治小兒丹毒。

冰片三分	人中白一錢	蒲黃二錢	黃柏二錢
甘草五分	青代五分	川連二分	薄荷二錢
月石五分	朴硝五分	枯礬少許	

爲末吹之。

十寶丹 治口喉通用。

薄荷二兩	甘草五錢	梅礬一兩	珍珠三錢
兒茶一兩	滴乳石四錢	牛黃一錢	冰片四錢
血及三錢	琥珀三錢		

共爲細末。冰片後研。後加入。

又方 治牙齦、舌癰、重舌、喉蛾、喉癰。

雞內脰不落者佳水

金燈草

青代

蒲黃

白芷

六角尖炙灰

薄荷

甘草

研末。冰片另研。再和勻吹之。喉癰半月。其餘七日愈。

上清丸 治風熱上湧。頭目不清。咽喉腫痛。口舌生瘡。服之生津液。化痰涎。

薄荷 十兩

柿霜 五兩

桔梗 四兩

甘草 三兩

川芎 二兩

百藥煎 五錢

防風 一兩

砂仁 四兩

建青代 三錢

元參 二兩

冰片

硼砂

皂角 各二錢

共爲末。煉蜜爲丸。如芡實大。每服一丸。不拘時含化。

清咽消腫飲

甘草

元參

前胡

薄荷

大力子

山梔

黃連

煅石膏

連翹

防風

荊芥

桔梗

煎服。

玉鎖匙 治牙關緊閉。用巴豆壓油於紙上。取油紙捻成條子。點火。將火吹滅。以

烟熏入鼻中。

蘇子降氣湯 隨症加減。

半夏麴

蘇子各五

甘草

當歸各一

玉桂

陳皮各三

上厚朴一錢加薑棗煎服治虛火上升

加減良方 凡喉牙等症皆可治。

百草霜六錢

梅礬一錢

甘草三錢

柯子肉三錢麴裏煨

片腦不拘

若治纏喉風寒等症。梅礬一錢。甘草三錢。兒茶五錢。須嫩紅者佳。珍珠、琥珀各

六分。雄黃二錢。射香少許。薄荷一兩。又有時去雄黃加蒲黃六錢。若口碎、口疳、走馬疳、胎疳、痘後疳、糜口、雪口、一切諸症。專用黃袍散。薄荷一兩。甘草三錢。舌腫大。赤如熟猪肝色。不能轉動。川連三錢。黃柏三錢。片腦不拘。

驅腐丹

硼砂二錢

五倍子去蛀末二錢

炒黑末用。治糜口、雪口。

吹喉散

梅磬三錢

薄荷二錢

兒茶一分錢

乳石一錢五分

甘草

火硝

硼砂各一錢

冰片三分

磁器收貯。勿可出氣。

吹口方

用棗子大者。去核。入明礬、煨倍子、梔子皮、細蠟、人中白。均煨。牛矢尖。在野坎上取黃牛糞乾久者佳。各五錢。珍珠五分。冰片一分。

消腫代刀散 治喉瘡不破。用此藥吹之。咳嗽一聲即破。

火

硝 將皮紙數層包好。放在烟巨上烘。以去鹹氣。換紙再烘。研極細末。

薄 荷 此二味為君

礪 砂 為臣

大冰片 少許為佐

牙 皂 少許為使

右五味。共為細末。磁瓶收存。遇有難破喉瘡。吹之以代刀針。

又方

乳 香

沒 藥

枯 礬

五倍子 燒灰

自出蠶蛾

繭子殼

小 棗

人指甲

壁喜子窠 燒灰各一個

為末吹之。立效。

真青

百草霜半分

燈草灰一厘

薄荷一分

冰片一分

牙硝一分

硼砂五分

甘草一分

真金

蒲黃各二分

口疳藥方 較前更靈驗。

黃柏八分

黃連一錢

人中黃五分

薄荷三分

兒茶五分

龍骨三分

燈芯灰不拘

珠子一分

冰片六釐

此口疳之祕方也。不論症之輕重。吹之無不立愈。如爛至鼻根無救。如癢加飛礬。腐甚加青代。色黑加牛黃、黃連。齒落加牛黃。

尤氏喉科祕書終

〔清〕許棧 著

咽喉脈證通論

中國醫學大成

重刊咽喉脈證通論提要

清海寧許珊林得喉科書一冊於其鄉之世業是醫者題爲宋異僧所遺以其篇第考之卽所謂十八證也。先總論病態而繫以藥。後詳方證復列用藥禁忌。且以甘桔湯爲喉症所忌。確有識見。一掃俗醫誤執成方之謬。是能獨具手眼者。以喉症爲火毒上升。用藥降氣瀉火爲主。至病起何經。用何藥主治。卽內經丹溪之法也。珊林因舊刻之訛。爰精校而重刊之。茲再加圈點鉛槧行世。

咽喉腫痛論 提要

姚序

咽喉。昔人方之輿地。固險要之區也。扼之抗之。並制人之命。第其事有相背戾者。於地爭得之以制勝。至夫疾證。則隘於此者危矣。然亦未嘗不合。人居險地。以策勝之。疾得隘地。以藥瘳之。客主之形不同。攻擊者之情一也。夫治兵無常勢。而用奇者勝。姜維守劍閣。鍾會攻之未能克。鄧艾由邪徑趣涪。吳人於江陰積鐵鑠橫截。王濬火燒液之。並筏去鐵錐。咽喉之用甘桔湯。蜀人之劍閣。吳人之鑠錐也。此脈證通論一書。相傳出宋時杭千佛寺僧囊中。共十八篇。皆精要無類。吾友許子樾嘗刊之。生人不可計。世固不知其用藥禁忌一篇。昔人皆昧之。所謂吳人蜀人之蔽者也。亦猶七國之韓欲援之。而欲以折之。固必有道在矣。因續授之梓而記之。

咽喉脈證通論 姚序

二

道光二十有一年歲在辛丑閏三月吳興姚晏芳林北堂書

姚序

醫家十三科。咽喉居其一。誠以氣之出入。生死之關。事醫者不可不審求也。內經曰。喉主天氣。咽主地氣。欬論篇曰。心欬之狀。欬則心痛。喉中介介如梗狀。甚則咽腫喉痺。厥論篇曰。手陽明少陽厥逆發喉痺。噤腫瘰。脈解篇曰。厥陰所謂甚則噤乾熱中者。陰陽相薄而熱。故噤乾。骨空論篇曰。督脈生病治督脈。治在骨上。甚者在齊下。營其上氣。有音者。治其喉中央。在缺盆中者。其病上衝喉者。治其漸。漸者。上俠頤也。謬刺論篇曰。邪客於手少陽之絡。令人喉痺。邪客於足少陰之絡。令人噤痛。不可內食。又曰。噤中腫。不能內。唾時不能出唾。考內經所言喉證者。凡謂臟腑之氣。痺著於其地而已。無所謂十八證三十六證也。惟靈樞癰疽篇。岐伯曰。癰發於噤中。名曰猛疽。猛疽不治。化爲膿。膿不寫。塞喉半日死。則類喉科之乳蛾。而

屬之癰疽。仲景去先聖未遠。其金匱玉函所載雜病。並無喉證。正與內經相合。李東垣、劉河間、爲金元巨手。所著諸書。亦不載是證。獨朱丹溪有喉痺一門。第以臟腑爲主。分經施治。則亦內經之支也。海寧許珊林捷得喉科書一冊於其鄉之世業是醫者。題爲宋異僧所遺。以其篇第考之。卽所謂十八證也。先總論病態而繫以藥。後詳方證。復列用藥禁忌。且以甘桔湯爲喉證所忌。一掃俗醫誤執成方之謬。是能獨具手眼者。以其喉證爲火毒上升。用藥降氣瀉火爲主。卽靈樞猛疽之意也。其以病起何經。用何藥主治。卽內經丹溪之法也。夫善讀軒岐書者。固可隔垣洞見。何待檢閱之煩。然則此書之作。蓋爲俗醫設也。且爲無醫設也。俗醫與無醫。則此書之功偉矣。珊林因舊刻之訛。重勘而精梓之。家兄聖常惜其傳之不廣也。郵寄本重錄。因括其大凡於右。

道光辛丑閏月之望吳興姚衡書於廣州撫使者署之雨春館

許序

或曰。宋有異僧者。寓杭之千佛寺。遺一囊去。寺僧啓之。得是書。祕不欲傳。今尙有能世其術者。余曰。唯唯否否。夫方技之書。類多託於畸人異士。隱僻怪誕者流。神其說以炫人耳目。是書苟宋人作也。不應有棉花瘡云云。此疾元時始入中國。何先數百年已能言之鑿鑿如此耶。第綜其方論。凡夫喉證之虛實緩急。辨析造微。多所依據。則知非近人所能。苟非宋。亦不出元明間一巨手耳。余先後獲四五寫本。率爲庸妄人竄改塗乙。故各各不同。及見禾中刊本。益紕繆滋甚。因卽數本中排比參校。窮數月之力。如理亂絲。不啻數棼之而數析之也。今年夏手錄定本。友人楊子星泉見而韙之。星泉今俞附也。殆不至阿私所好。以貽誤後人者。還授之梓。以永厥傳。簡首仍署曰宋僧原本。亦疑以傳疑意爾。夫豈敢神其說以炫人耳。

咽喉服證通論 許序

目哉。是爲序。

道光五年乙酉六月海昌許槌撰

重刊咽喉脈證通論目錄

總論	一
通治用藥	五
用藥禁忌	六
丸散方藥	七
牛黃解毒丸	
紅內消散	
保命丹錠子	
膽冰消毒散	
冰硼散	
玉屑散	
鎖喉第一散	
加減荆防敗毒	
加減柴胡雙	
解散	一〇

重舌第二	一二
氣癰第三	一三
乳蛾第四	一四
弄舌第五	一五
纏喉第六	一六
啞瘡第七	一七
骨槽第八	一八
加減當歸	
連翹散	
懸蜚第九	一八
加減千金	
內托散	
爛喉癰第十	一九
犀角百寶丹	

熱風喉癰第十一	黃湯	涼血地	二〇
弱證喉癰第十二	四順理中	湯四逆	二一
喉閉第十三	湯四逆	湯中	二二
噎食第十四	當歸連翹	散川桂	二二
發頤第十五	南星膏		二三
懸癰第十六			二四
喉菌第十七			二四
牙癰第十八			二五

重刊咽喉脈證通論

總論

夫喉者。吾生氣機出入之門戶。瞬息存亡之際。性命係焉。偶一受病。危在須臾。迫不及待。所貴醫者能識受病之原。與夫虛實痰火風寒熱毒之異。更於望聞問中參究脈理。尤爲先務之急。自來業喉科者。全不講脈。所以治之鮮效。今試論之。假如其脈洪大而實。其人氣粗而躁。此有餘之證。用藥則以散風下氣清火消痰。散之者。荊芥、防風、羌活、獨活、紫蘇是也。下之者。枳殼、枳實、青皮、厚樸、山楂、前胡是也。清之者。山梔、黃芩、黃柏。甚則犀角、黃連。消痰則以膽星、蔓仁、杏仁爲主。若脈洪大而浮軟無力。或弦緩而澀。其人氣委而靜。此不足之證。用藥則以涼血生血滋潤

消痰。涼之者。丹皮、白芍是也。生之者。生地、當歸是也。潤之者。苡仁、知母、花粉是也。消痰則以貝母、薏仁、杏仁。兼用山梔、黃芩、黃柏、犀角、黃連。或有純是陽脈者。當以病治病。脈不與焉。卽以荊芥、防風、牛蒡、射干、黃芩、枳殼、銀花、獨活、生地、丹皮、花粉爲治。再以保命丹或紅內消同服。日用吹藥。夜用噙藥。無不見效。更有一種熱病而服熱藥。火毒熾甚。而發於喉間。大寒大熱。疼痛不止。或舌脹而木。伸縮不能。飲食難進。其脈洪實有力。大便不行。宜急下之。若脈洪弦而浮無力。宜涼血行血爲主。若過用疎風散火之劑。恐變別證。最稱難治。又有一種出外急走遠路。脫力而傷肺氣。喘息難舒。以致喉痛舌脹。地閣下腫。突如鎖喉之狀。內視之非重舌。外視之非痰毒。寒熱大作。痰涎湧。六脈洪大中空。面色發黃而浮。初以防風通聖散探之。或效一二。卽以涼血生血順氣之藥治之。又有似喉證非喉證者。其喉亦痛。牙關緊閉。胸脇疼痛。或腹脹痛。四肢攣厥作痛。此因受有重傷。

或用力太過。致瘀血凝滯。當以行血破瘀爲要。初起可救。過五六日不治。又如弱證喉癰。雖是肺經之病。亦有兼他經而起者。何以知之。假如喉間紅癰作痛。是肺經火盛之故。若頸項之筋。有時或左或右。作脹而硬。氣悶不快。此怒氣傷肝。左關脈必洪大而弦。當清肝火以舒筋。涼血爲主。用藥則以當歸、牛膝。佐以柴胡、黃芩、羚羊。若兼右關微弱而緩。乃脾胃有虧。須兼用白芍、茯苓。此肝脾與肺共病也。喉間紅癰作痛。其舌紫色。或生刺作痛。或作木乾枯。是心經受虧。無血榮養。以致虛火熾盛。且兼思慮過度。鬱氣所成。左寸脈必浮洪。當以犀角、涼血黃連、清火生薑、降火當歸、生血白芍、涼血此心與肺共病也。喉間紅癰作痛。滿脣焦裂。目熱如燒。或作乾嘔。是胃經虛火熾盛。右關脈必洪弦。且緊。當以山梔、清火黃芩爲主。佐以當歸、生血白芍、涼血山藥。此胃與肺共病也。喉間紅癰作痛。夜間舌乾口苦。湯水不進。或有咳而無痰。更兼滑精者。是腎水枯竭。虛火上炎。兩尺脈必洪數無力。當以山

藥、知母、黃柏清火爲主。佐以花粉、潤澤瀉、白芍、茯苓。此腎與肺共病也。若夫肺經獨病。或吐血而成。或嗜酒而發。或脾虛而生。氣血消散。嗽重聲啞。喘急痰多。聲如曳鋸。睡臥不得。六脈洪大而浮。肺部更甚。當以苡仁、山藥、貝母、黃芩、薏仁、牛蒡爲主。佐以當歸、白芍、熟地、茯苓、丹皮、犀角、黃柏、知母。服之喉痛雖止。然不過待日而已。更有六脈沈隱。神脫氣敗。飲食不進。步履不前。盜汗自汗如雨。脾氣滯泄。死無疑矣。若年老人喉間紅瘰作痛。或舌上生刺。或破腫。或木脹。言語不清。六脈微洪。五至有餘。飲食動靜形色神氣如常。此血少火盛。當以黃芩、丹皮、茯苓、熟地、當歸、白芍爲主。佐以元參、牛蒡、枳殼、銀花、花粉、山藥、苡仁。甚則加犀角、黃連。不同前論。若小兒痘後。或瘰後患乎此。當以犀角、黃連敗其熱毒。更以涼血補血健脾之藥爲佐。朮、草、參、耆斷不可用。此外用藥與大人相同。若女人胎前患此者。先以安胎爲主。次以涼血爲佐。紅內消。保命丹忌用。餘藥無妨。產後一月未滿者。當以熟地、

當歸補血。枳殼、青皮下氣。元參、射干、牛蒡、元胡索、銀花消腫。少加黃芩、花粉以清熱。紅內消、保命丹可用。但不宜多。吹藥、噙藥忌之。如經期適來。當以破血下氣之藥為主。涼血者少用。紅內消、保命丹噙藥服之。亦無忌。茲論其大略如此。餘詳各條。

通治用藥

夫喉證向有三十六法。今余列十八證。名目雖簡。而治法已備。要之十八證中。又可以風與痰與火概之。凡遇此證。不論緩急。只以下氣消痰為主。次則清火涼血。若不分先後。混亂用藥。貽害匪淺。今開用藥大概於左。惟高明者臨時參用可耳。藥用防風、前胡、丹皮、獨活各一錢。杏仁、薏仁、山查各三錢。車前、木通各八分。兩劑後加山梔、膽星各一錢。生地二錢。如火未息。加黃芩一錢。以保命丹、紅內消同服。

誤用黃連、半夏、生薑、桔梗之類。難以收功。照前方加羌活、獨活。服幾劑自愈。牙關難開。須加真北細辛一分。

單蛾雙蛾至八九日後。方可用鍼刺出毒血。未滿十日。萬不可刺。

或有疔瘡根脚。紅內消不可用。用之反凶。煎藥中加地丁草七八錢自愈。保命丹可服。

頸間痰毒須加象貝母、草河車、猴薑。若日久難愈。以蝦蟆一箇。研好硃砂五分。灌於中。泥裹煨。研末服之自消。

用藥禁忌

古有甘桔湯乃清喉之要劑。今人見有患喉證者。即用之而無疑。嗟乎。此猶抱薪救火。非能愈疾。而更增其疾矣。何以言之。夫喉證乃火毒上升所致。須以降氣瀉

火爲要。甘草補中而不瀉火。既受其補。則火愈熾。病愈重矣。桔梗引諸藥上行。藥既上行。則痰與火亦引之而上行。勢必喉間壅塞。於病更加重矣。故小兒驚痰。大人痰火。桔梗是最忌者。本草云。升麻引胃中清氣上升。又可代犀角。似乎可用。不知一用。其痰火與氣一齊上湧於咽喉之間。四肢逆冷。喘急異常。爲害匪淺。若在他證。猶或可用。如鎖喉服之。則不治矣。半夏雖消痰。若喉證痰重者。誤用之。禍不旋踵。蓋此乃治脾家溼滯之痰。至於喉證有痰。總不外肺中熱火。何可以半夏之燥烈治之乎。老薑辛辣發散。雖喉證亦以發散爲主。然過用辛辣之味。則以火益火。大非所宜。此五者與喉證關係甚重。故特表而出之。至別藥之中。亦多禁忌。惟業醫者審擇用之。茲不多贅。

丸散方藥

牛黃解毒丸即噙藥

治一切喉風痺閉。咳嗽喘急。痰涎壅塞。胸膈迷悶。竝口舌等證。無不見效。

牛黃五分

青黛飛一兩

冰片五分

雄黃五錢

兒茶三錢

官硼五錢

薄荷另研

膽星四兩

研細末。生蜜和丸如芡實大。每噙一九。待其自化嚥下。一日夜須噙四九。小兒減半。

紅內消散

治咽喉一切諸證。竝無名腫毒已潰未潰。均可服用。厥效如神。

大蜈蚣去頭足切斷同米炒以米黑爲度

乳香去油

沒藥去油

血竭另研

雄黃

象貝母

川山甲炒

辰砂淨飛

麝香揀去毛皮乾研

右藥等分。惟麝香少許研細末。每服七分。小兒減半。和煎藥同服。酒下亦可。
保命丹錠子

治咽喉口齒新久腫痛。竝解諸毒。磨服神效。

麝香揀去毛皮三錢 辰砂明透者三錢 冰片梅花大塊一錢 珍珠研細末

琥珀一錢 山豆根汁一兩用熬 文蛤洗淨 山茨菇洗淨焙去毛皮

雄黃鮮明大塊三錢 金子白者去油一兩 紅毛大戟浙江紫大戟為上北方縣大戟不堪用去蘆根洗淨焙乾

為末一兩五錢

右藥研末。以糯米粥和山豆根汁打糊為錠。每重一錢。病輕者一錠。重者連服二錠。

膽冰消毒散初起吹藥

血竭一錢 膽礬一錢 雄黃一錢 乳香去油三錢

冰片一錢

白占二錢

燈心灰不拘

冰硼散收功吹藥

冰片一錢

硼砂一錢

山豆根二分錢

玉屑散一名五馬破曹

治咽喉口舌頸項破爛諸痛皆效。

薄荷另研三兩

官硼五分錢

雄黃三錢

兒茶一錢

冰片三分

右藥研細末。貯瓷餅內。臨用挑少許置舌上。咀含片刻嚥下。日用八九次。如鎖喉風。口內乾枯。牙關緊閉不能咀含者。以無根水灌下。自能開關生津。惟脾虛胃弱者。不宜多用。

鎖喉第一

此證因風熱積於胸膈。或酒色及鬱怒所致。其狀喉上下左右紅紫腫痛。或帝丁焦黑腐爛。頸項浮腫。痰涎壅塞。聲響如潮。氣急發喘。眼目直視。額上有汗如珠。身汗如雨。或泄瀉清水。四肢厥冷。或腰脇疼痛。肚腹脹痛。法在不治。若脈六七至。不論大小至數分明。雖甚危險。十中可救一二。或脈洪大。或沈細。惟三部混亂。卽形色神氣如常。終爲難治。初起用吹藥噙藥。痰多以萬年青根搗汁和醋。攪去痰涎。或土牛膝汁。或青魚膽汁俱可。

加減荆防敗毒散。入脈洪大七荆芥、防風、牛蒡、連翹、膽星、獨活、前胡、枳殼、蘇子、萸仁、杏仁、生地、黃芩、黃柏、山梔、元參。加原枝燈心二十莖。長流水煎。和保命丹同服。大便不行。去荆芥、防風。加枳實、青皮、大黃。

加減柴胡雙解散。脈沉隱或二柴胡、前胡、羌活、獨活、枳殼、枳實、川芎、青皮、萸仁、杏仁、膽星、蘇子。長流水煎。和保命丹同服。冬月加麻黃。

脈七八至而浮洪。頭面皮肉浮腫。色微紅。涕淚交流。語言蹇澀。或以防風、蘇子、銀花、牛蒡、杏仁、薑仁、枳殼、枳實、膽星、青皮、黃柏、黃芩、山梔、元參和保命丹同服。亦有獲效者。

服荊防敗毒散後。肺管脹塞。兼咳嗽者。卽加生地、當歸、白芍。

服敗毒散一劑。喉痛頓減。惟胸膈脹痛。牽引脊背。再服之卽除。

服三黃湯。亦有全愈者。

蜒蚰同白梅搗爛和丸噙之。每見有效。

誤用大黃、巴豆。瀉利不止。喉證雖愈。而胸膈脹悶。飲食不進。醫復誤作他證治者死。

此證因平日喜食炙博熱毒之物。積熱攻於心脾二經所致。其狀舌下腫。突生一小舌。久之大舌反縮短。或脹而紫。言語不清。飲食不下。微作寒熱。口中清涎極多。即用銅匙將舌捺定。用三棱鍼刺大舌兩旁。及舌下金津、玉液兩穴各一鍼。可五分許。再刺小舌兩旁。或出紫血。或待清涎流盡。方進吹藥。噙藥。次服煎劑自安。藥用荊芥、防風、連翹、獨活、前胡、射干、膽星、枳殼、元參、生地、黃芩、黃柏、銀花、花粉。長流水煎。如刺破清涎出盡。亦有弗藥而愈者。

氣癰第三

此證因惱怒傷肝。肝血不和。以致肺氣壅塞。火熾上升。發於喉間。其狀帝丁之上紅腫作痛。或有連及兩邊者。寒熱大作。初起不宜刺破。待六七日後方可鍼刺。或有誤服升提之藥。竟不能愈者。或有服保命丹。紅內消。其毒自出者。如痰多則以

醋攪之。強進飲食爲妙。否則恐變輕爲重。

藥用荊芥、防風、射干、牛蒡、連翹、烏藥、膽星、前胡、枳殼、生地、元參、黃芩、銀花。長流水煎。痰多加薑仁。氣重加枳實、青皮。大便不行。加黃連。甚則加大黃。

乳蛾第四

此證因嗜酒肉熱物過多。熱毒積於血分。兼之房事太過。腎水虧竭。致有此發。其狀或左或右。或紅或白。形如乳頭。故名乳蛾。一邊腫曰單蛾。兩邊腫曰雙蛾。或前後皆腫。白腐作爛。曰爛頭乳蛾。初起必發寒熱。用保命丹。紅內消兼煎劑治之。藥用荊芥、防風、射干、牛蒡、前胡、枳殼、膽星、連翹、生地、丹皮、元參、黃柏、黃芩、銀花。長流水煎。如火盛。加犀角、黃連。大便閉結。加大黃。寒熱不止。加羌活、獨活。體虛痰多。加薑仁、杏仁、貝母。

有一種名根脚喉風。其證日行一穴。至七日行七穴。喉間發泡。時欲嘔吐。或一年一發。或半年一發。或一二月數發。根留於中。不能盡去。一時難愈。或云。先從脚跟發起。至於喉間。亦名脚跟喉風。發時在左。則左足酸軟陰痛。有似筋觸。牽入喉間。在右亦如之。治法同乳蛾。證亦相似。

今人每見發有紫泡。以爲毒物。卽用刀鍼開之。豈知病之初起。毒氣熾盛。發之於泡。若刺之出血。非但不能愈疾。加之破傷。則病益重矣。

或問曰。亦有用刀鍼而得愈者。何故。答曰。彼病勢淺。火毒不重。刺出血少。則愈者。其偶然耳。倘病勢已深。火毒極盛。設以刀鍼刺之。其誤事也。可勝言哉。

或以寒熱大作。誤認感寒。卽用生薑半夏。喉痛益甚。蓋薑夏喉證所大忌也。詳前

弄舌第五

此證因風痰久積於內。或勞役過度而生。其狀舌出過脣。不能言語。患者以手時弄其舌。故名。初起用青魚膽汁攪去其痰。急宜以小布鍼刺少商穴。在手大指內側之端去爪

甲角如韭菜許也。出血者易治。出黃水者難治。腫不消者亦難治。

藥用枳殼、枳實、牛蒡、連翹、射干、青皮、蘇子、膽星、防風、生地、犀角、黃芩、山梔、銀花。長流水煎。

舌捲縮而不能言。因乎風寒也。舌長寸許而不能收。因乎房勞也。舌腫滿而不能消。因乎七情也。舌根腫脹者。謂之重舌。腫而不柔利者。謂之木舌。初起急宜醫治。遲則不救。舌脹滿口。痰涎極多。亦木舌之一種。前方重加大黃、芒硝。下後自愈。

纏喉第六

此證因風痰溼熱。久積於內。或食炙博厚味太多。或房勞及抑鬱所致。其狀耳下

紅腫。漸趨項下。及結喉之間。一邊者輕。兩邊者重。喉內帝丁左右兩傍如蛇盤之狀。有黃白二色。黃爲黃纏。白爲白纏。急宜刺少商穴出血。註舌規次用吹藥。噙藥。男子延至結喉下不治。女子延至胸膛不治。喉中聲響如雷者不治。額鼻有青黑氣。頭低痰如膠者不治。藥用荊芥、防風、羌活、獨活、枳殼、連翹、膽星、蔓仁、車前、紅花、丹皮、黃芩、元參、前胡、牛蒡、銀花。長流水煎。和紅內消同服。再下保命丹。服藥至四五日。加當歸、白芍、生地、黃柏、土貝母。其效甚速。

啞瘡第七

此證因風痰壅滯於咽喉之間。其狀口不能言。牙關緊閉。卽用蟾酥化水滴鼻內。卽開。仍以玉屑散吹之。再將鵝翎探入喉中。攪去風痰。卽能言矣。先進牛黃解毒丸。次服荊防敗毒散。連進二三劑自愈。如面紫舌青脣黑。鼻流清涕。目赤多淚。爪

甲俱青者不治。

骨槽第八

此證因憂思鬱慮。邪毒交乘。結聚於太陽經絡。或則惱怒傷肝。致筋骨緊急。思慮傷脾。致肌肉結腫。膏粱厚味。致膿多臭穢。其狀始於耳項皮膚間隱隱有核。漸如李大。便覺腫痛。初則堅硬不消。久則延爛難愈。甚至齒牙墮落。牙牀腐穢。俱在不治。初起先用鵝翎探吐風痰。次以陳艾灸耳垂下五分七壯。再服煎藥。加減當歸、連翹、枳殼、生地、銀花、射干、膽星、赤芍、元參、牛蒡、元胡索、黃芩、丹皮、長流水煎。

懸蜺第九

此證因上焦熱毒蘊積。風痰壅塞而生。其狀上顎腫垂。形如蛙腹。或如雞卵。咽喉

閉塞。痰涎滿舌。初治用鵝翎探吐風痰。次以吹藥噙藥。及荊芥敗毒散加減。日久服千金內托散。

加減千金內托散。厚朴、荊芥、防風、連翹、羌活、獨活、白芷、膽星、枳殼、元參、蘇子、杏仁、蔓仁、葱白。

爛喉癰第十

此證因棉花瘡毒未盡。而結於咽喉。其狀周圍紫暈。漸至腐爛。爛上則鼻平陷。爛下則飲食難進。多致不救。初起不覺。或十日半月始知。當以清熱涼血補脾爲主。佐吞百寶丹二三十服。若體弱痰多。嗽重聲啞者。不治。

藥用生地、花粉、黃芩、白芍、黃柏、丹皮、銀花、元參、牛蒡、射干、防風、角刺。體弱者加茯苓。嗽重加山藥、苡仁、知母、蔓仁、杏仁。熱甚加犀角、黃連。十劑後服犀羚貝母膏。

膏用犀角、羚羊角、丹皮各八錢。當歸、元參各五錢。黃連、黃芩、黃柏、防風、射干、荊芥各三錢。牛蒡八錢。枳殼、連翹各六錢。土貝一兩。茯苓、苡仁、花粉各五錢。煎汁約四大碗。濾渣將汁再熬如稀糊。納煉蜜半觔。收貯瓷罐。日服四次。在卯巳未亥四時。每次半鍾。以燈心湯攪和送下。忌生冷發氣之物。體弱者去黃連、花粉。加白芍、陳皮、石斛。惡心。砂仁湯送下。如合丸藥。去黃連、羚羊角、荊芥、防風。日進二次。每次二錢。

百寶丹。牙皂一兩。銀花三兩。硃砂五錢。研細末。每服六分。以冷飯塊三兩。水三盃。煎至盃半。分作二服。服在巳午兩時。須二十餘服。方能見效。食時多服豬油、麻油。以潤肌膚臟腑。忌茶酒、牛羊、麵食、葱蒜等物。

熱風喉癰第十一

此證因勞心過度。血衰火盛而致。其狀喉間紅筋紅瘰。或帝丁兩旁微有疙瘩。一起卽覺非弱證喉癰可比。時作寒熱。若食熱毒之物而起。不作寒熱。於此爲別。涼血地黃湯。生地、黃芩、丹皮、牛蒡、元參、防風、荊芥、黃柏、花粉、赤芍。火甚加山梔。或犀角、黃連。

弱證喉癰第十二

此證因酒色過度。或勞碌憂鬱所成。其狀喉間紅筋紅瘰。蔓延而生。津嚥疼痛。夜間發熱。口燥舌乾。六脈洪數。當以清熱補血爲主。若動靜飲食如常。形色精神不脫。無嗽無痰。乃血分有熱。須涼血破血。不宜用補。如嗽重聲啞。痰多及盜汗不止者。不治。

藥用白芍、丹皮、黃芩、當歸、元參、生地、黃柏、銀花、花粉、大力子。初起亦加荊芥、防風。

連翹、枳殼。病久去之。嗽重加知母、前胡、土貝、薤仁、杏仁。熱甚加柴胡、黃連。心火盛加犀角、黃連。肝火盛加羚羊角。泄瀉加白朮、茯苓。腎水枯竭加山藥、澤瀉、枸杞、五味、知母。停酸作嘔加砂仁。虛甚加苡仁、山藥、茯苓、當歸。倍以白芍。

喉閉第十三

此證乃寒邪直中下焦。逼其無根失守之火。發揚於上。以致咽痛。卒然喉閉。四肢厥冷。六脈沈微。但必下利清穀。口燥咽乾。而不思湯飲。方是寒證。急宜刺少商穴出血。注見再服煎劑。若口燥咽乾而渴。與此霄壤矣。

四順理中湯。人參、白朮、甘草、乾薑。

四逆湯。附子、肉桂、甘草、乾薑。

噎食第十四

此證乃熱毒積於心肺二經。咽喉乾燥而無津液。是以喉中作痛而噎。食難下也。急用當歸連翹散。加大黃利之。若治稍遲。則有飛尸癆瘵之患。如痰喘治以川桂散。加吳茱萸五七粒。服後覺心肺間刺痛。仍用當歸連翹散。

當歸連翹散。當歸、生地、黃芩、連翹、山梔、枳殼、羌活、防風、荆芥。按當用骨槽門加減法

川桂散按此方原本藥品未載

發頤第十五

此證或傷寒發散未透。餘毒積於經絡。有與傷寒同發者。有不與傷寒同發者。其狀耳後紅腫。頭重體倦。急用千金內托散治之。外敷南星膏。若發於耳後一寸三分。或鼻中流涕。咽喉閉塞。痰涎壅聚。法皆不治。

南星膏按此方原本藥品未載

發於耳後名發頤。發於腮邊名穿腮。發於地閣下名穿喉。皆屬痰毒初起。破血消痰降氣。其後涼血生血。滋陰降火。惟燥熱之藥斷不可用。刀鍼圍藥膏藥並忌。吹藥噙藥多用爲妙。

懸癰第十六

此證乃脾家熱毒。外感風熱而成。其狀忽於上顎生一紫泡。垂下抵舌。疼痛異常。口不能言。舌不能伸。頭不能低。仰面而立。鼻出紅涕。若不速治。毒入於腦卽死。急以小刀刺破癰頭。出盡紫血。不可嚥下。用菊花湯漱淨。先以菊花葉搗汁一盃。和酒送下。次進牛黃解毒丸。煎以荊防敗毒散。加地丁、半枝蓮甚效。

喉菌第十七

此證因食膏粱炙煇厚味過多。熱毒積於心脾二經。上蒸於喉。結成如菌。面厚色紫。軟如豬肺。或微痛。或木而不痛。梗塞喉間。飲食有礙。須以鍼刺出紫血者可治。鮮血者難治。日刺日有。漸如蜂窠者不治。

藥用犀角、黃芩、丹皮、殭蠶、射干、連翹、銀花、紅花、生地、黃連、黃柏、枳殼、獨活、元參、赤芍、大力子。

或年幼之人。患此不疼痛者。當以丸藥治之。日久自消。切忌刀鍼。藥用丹皮、獨活、防風、連翹、紅花、生地、荆芥、射干、牛蒡、前胡、枳殼、山查、犀角、銀花、花粉、山梔、黃芩、黃柏、元參、元胡索、蜜丸。日服二次。每次二錢。開水下。

牙癰第十八

此證因勞心過度。或食熱毒等物。鼓動陽明胃經之火。發於牙齦。其狀如豆大。或

如指大。紫色腫硬。疼痛難忍。或頭疼發熱憎寒。先服紅內消。次進荆防敗毒散。和保命丹同服。吹藥。噙藥多用。初起發散。後則涼血。如不愈。乃是體虛。當用黃耆、白朮、當歸、柴胡、陳皮、熟地、丹皮、芍藥、黃芩、石斛、元參、牛蒡、山梔。

凡牙痛或左或右。痛無定處者。前藥亦治。若誤服發散。其痛更甚。以水醋各半。和熱水漱之即止。

跋

右咽喉脈證通論一卷。先府君曾於道光辛丑五月。刻於廣州。卷首有府君手書序二篇。工刻精絕。宛然真跡。惜江浙寇亂。板已不存。同治十三年冬。覲元在川東。檢點書簾。得初印樣本一冊。因續授之梓。以廣其傳。仍模刻面頁標題年月及署檢。用存手澤。先府君精通醫學。其大略已見序中。覲元懵不知醫。但據本校錄而已。於戲。卽此藝事之微。已不相肖如此。況其大者遠者乎。是可媿已。

歸安姚覲元記

咽喉證通論 跋

〔清〕 佚名

喉舌備要秘旨

中國醫學大成

喉舌備要祕旨提要

清光緒間印行。著者闕名。首列喉部及喉科證治四十三症。通論證治辨陰陽證訣。論喉症治法廿一條。論分經治喉症藥性。論用藥變化歌。各種藥方治三十六種喉散奇方。口舌部。各類口舌諸病。牙部。各牙痛牙疳諸方。末附戒煙良方。是書爲粵人所輯。著者姓名不詳。上題光緒己卯廣東藩署西齋刊印。其立方用藥。皆有所偏。惟辨證頗多發明。讀者苟能用其是而去其非。辨認明確。則大有可取之處。

喉舌備要秘旨 提要

喉舌備要秘旨目錄

喉部	一
論喉症	一
喉症總論	三
辨喉症經絡治法	六
喉科辨症	八
雙松葉症	九
單松葉症	九
雙燕子症	九
單燕子症	一〇

喉舌備要秘旨 目錄

雙鵝症	一〇
單鵝症	一〇
雙纏症	一一
單纏症	一一
懸蜚症	一一
合架症	一二
圻塔症	一二
瘰癧症	一三
乘枕症	一三

乘顙症	一三
斗底症	一四
甥胲症	一四
聯珠症	一四
破頭症	一五
掩頭症	一五
大頭症	一五
穿額症	一六
魚鱗症	一六
玉笋症	一六
蓮花症	一六

梅花症	一七
黑疔症	一七
搶食症	一七
木舌症	一八
重舌症	一八
癰舌症	一八
回舌症	一九
舌癰症	一九
驢嘴症	一九
魚口症	一九
喉癰症	二〇

喉疔症	二〇
喉箭症	二〇
喉痺症	二一
剪喉症	二一
肥豬症	二一
鵝口症	二一
胎毒症	二二
鎖子症	二二
論症治法	二三
辨陽喉症訣	二三
辨陰喉症訣	二四

看喉中辨臟色訣	二四
辨毒攻臟訣	二五
認死症歌訣	二五
治咽喉辨論	二六
論喉症治法 <small>廿一條</small>	二七
論分經治喉症藥性 <small>四條</small>	三四
治喉用藥變化歌訣	三五
抽薪飲	三六
徙薪飲	三六
滋陰八味湯	三七
一陰煎	三七

加減一陰煎·····	三八
二陰煎·····	三八
鎖陰煎·····	三八
四陰煎·····	三九
理陰煎·····	三九
大補元煎·····	三九
普濟消毒散·····	四〇
十二味玄翹飲·····	四〇
治喉內無論兩傍上下	
生白膜即白喉方·····	四一
治白喉潮熱漸除白膜	

漸減方·····	四二
凡患單雙鵝必有潮熱	
當用此退熱涼血消腫	
解毒方·····	四七
治楊梅瘡冲喉方·····	四七
治楊梅瘡冲喉藥丸方·····	四八
治楊梅瘡重症方·····	四九
治小兒陰虛喉有潮熱	
兼有牙血出方·····	四九
治三十六種喉散奇方·····	五〇
治喉症奇驗方·····	五〇

治陽喉散方	五〇
治火症痘疳牙疳喉間	
潰爛金不換散	五一
治痰痺方	五二
應驗鵝喉方	五二
青梅丸	五二
治陰白喉症散	五三
治鵝喉口內含藥方	五三
洗口散	五四
三黃散	五四
洪寶丹	五四

陽毒散	五五
治陽喉毒紅腫方	五五
冲和散	五六
黃龍散	五六
治陰毒青腫皮膚不燒	
熱方	五六
兩宜散	五七
製西瓜硝	五八
鎖喉症吹之立效方	五九
經驗鵝喉奇方	五九
鵝喉急救方	六〇

治各種喉症效方	六〇
治白喉症奇方	六〇
口部	六〇
治口舌生瘡	六一
又方	六一
又方	六一
口脣生瘡日久不愈	六一
舌無故出血方	六二
舌長數寸方	六二
舌瞠硬大閉咽喉	六二
治羊鬚瘡奇效方	六二

又方	六二
加味甘桔湯	六二
紫袍散	六三
甘桔湯	六三
玉龍散	六三
金鑰匙	六四
頰車開不能合	六四
下頰落	六四
舌蕈	六五
上疳瘡口中爛方	六五
上疳方	六五

消癰癰丸奇效方	六六
又方	六六
舌下腫痛	六六
舌下痰包	六六
小舌生紅泡子與喉症	
不同	六七
補斷舌法	六七
又方	六七
又方	六七
治舌下腫痛欲死	六八
又方	六八

重舌哦喉	六八
喉風舌大如脰	六九
舌腫四方	六九
喉疔	六九
舌忽縮入	七〇
舌硬生衣	七〇
舌下重生小舌	七〇
又方	七〇
木舌	七一
又方	七一
又方	七一

舌忽腫大腫硬	七一
舌上生菌	七一
舌腫破爛	七二
重舌脹腫	七二
牙部	七三
牙癰	七三
牙疔	七三
牙疳	七三
牙根流血方	七三
又方	七三
治牙痛不可忍方	七四

治牙痛方	七四
玉帶膏	七四
治各種牙痛妙方	七四
金星追涎丹	七四
苦瓜霜	七五
牙齒疼痛方	七五
治牙痛奇妙極效方	七五
治牙出血方	七六
治牙出血頭痛潮熱方	七六
蟲牙作痛方	七七
治蟲牙方	七七

治齒長數寸·····	七七
治牙長分餘·····	七七
治走馬疳·····	七七
治牙疳妙方·····	七八
擦牙關兼去口中氣味·····	七八
取齒妙方·····	七九
脫牙·····	七九
牙痛奇方·····	七九
又方·····	七九
治各種牙痛經驗神方·····	七九
少商穴圖式·····	八〇

刺少商穴法·····	八一
附骨髀符咒·····	八一
附戒烟良方·····	八二

喉舌備要秘旨 目錄

喉舌備要秘旨

喉部

鄞縣 曹赤電炳章圈校

論喉症

喉痺一症。在古方書雖有十八證之辨。古人悉指爲相火。然此症雖多由火。而復有非火證。不可不詳察也。蓋火有真假。凡實火可清者。卽真火證也。虛火不宜清者。卽水虧證也。且復有陰盛格陽者。卽真陰證也。故內經曰。太陽在泉。寒淫所勝。民病噎病頰腫。其義卽此。何後人之弗究也。

一、喉痺所屬諸經。凡少陽、少陰、陽明、厥陰。皆有此症。具列於後。但其中虛實。各有不同。蓋少陽、厥陰爲木火之臟。固多熱症。陽明爲水穀之海。胃氣直透咽喉。故

又言陽明之火爲最盛。欲辨此者。但察其情志鬱怒而起者。多屬少陽。厥陰。因口腹過嗜肥甘辛熱而起者。多屬陽明。凡患此者。多宜以實火論治。至若少陰之疾。則非此之比。蓋少陰之脈始於橫骨。終於會厭。繫於舌本。凡陰火遂衝於上。多爲喉痺。但少陰之火有虛有實。不得類從火斷。若果因實火。自有火症火脈現出。亦易知也。若因酒色過度。以致真水虧損者。此腎中之虛火證也。非壯水不可。又有火虛於下。而格陽於上。此無根之火。卽腎中之真寒證也。非溫補命門不可。凡此諸經不同。而虛實大異。皆後人所罕知。獨褚氏遺之。有上病察下之說。誠見道之言也。

一、喉痺症總治之火。則名目雖多。似有不必盡辨者。然亦有不可不辨者。卽如單雙乳鵝及單雙纏喉症之有不同也。蓋腫於咽之兩旁者爲雙鵝。腫於一邊者爲單鵝。此其形必圓突如珠。乃癰癰之類。結於喉間。故多至出毒。或宜刺出血。

而愈者。若纏喉風。則滿喉紅腫。多不成膿。亦不必出血。但使火降。其腫自消。此其所以有異。而治之亦當有法也。

喉症總論

夫喉症者。人之一身總關之際也。內通五臟六腑。外傳五音五色。乃氣息出入之門。聲音傳送之所。飲食往來必經之路。此乃真真總關之際也。諺云。一指痛。滿身疾。何況乎咽喉。蓋喉症所發原由。多因人之本性發來。或好食煎炒。或恣味辛酸。或淫慾無節。或喜怒不常。或勞神過度。或耽於色。或過飲酒。好勇鬪狠。皆能致疾。既未能謹節於平日。又不能急治於患後。日積月累。其病根蒂深固。則牢不可拔矣。若夫好食酸。則傷肝。好食辣。則傷肺。好食甜。則傷脾。好食苦。則傷心。好食鹹。則傷腎。好食冷。則內熱。好食熱。則內寒。此因飲食傷臟。而發喉症者也。夫喉症發於

內。左屬肝。右屬肺。舌屬心。脣屬脾。齒屬腎。如肝病則聲悲。肺病則聲速。心病則聲雄。脾病則聲緩。腎病則聲沉。此屬於臟。大腸病也。蓋大腸病則聲長。小腸病則聲短。胃病則聲連。膽病則聲清。膀胱病則聲微。三焦無病。乃寄之名。此屬於腑。五臟六腑發於喉。皆由內而發外者也。然發形於外者。有虛有實之分。有緊有緩之說。有陰有陽之症。有紅有腫之形。有有痰者。有無痰者。有熱者。有寒者。有紅黃青白黑點者。有氣急咳嗽者。有聲啞音嘶者。有痰響如雷者。有氣響似鋸者。有牙關緊急者。有氣出不收者。有鼻內出血不止者。有耳內出膿血者。有口舌生瘡者。有斑似胎癍而蘖若蝦皮者。有一二或數根肉笋長短生來而針刺不忍痛者。有滿喉並無紅黃白青黑點。而痛不能進膳食者。舌有硬亦有軟者。有內紅腫而外不紅腫者。有外腫而內不腫者。有口脣粗厚而齒脚肉包牙齒者。有舌下生舌而正舌捲入內向者。有鼻生瘰肉而喉內上面生肉核者。有滿口形似熟瘦猪肉而乾焦

者。有喉痛而鼻出紅黃血水者。有舌硬如石三兩載而失舌者。有面暗神慘欲言而不能言者。有舌下發子弟瘡而升提毒於喉中生白膜者。有發痰火積久燒咽喉。而鏡上生紅絲線並無白膜者。有左右扯開而失膈中子者。有口眼喎斜怒目直視者。有舌出齒外而不能收入者。有舌藏內關而不能伸出外節者。有右傳左者。其病重。有左傳右者。其病輕。有牙床發痛而久出膿血者。有齒角生瘡而至內穿者。有膈中子長大而滿口鮮紅色者。有開口臭而呼吸氣臭者。有內外結核出膿血而不腥臭者。有朝發夕愈而腹肚作痛者。有舌粗硬寸餘滿口不能通活者。有大便閉結而小便澀數者。有遍身軟痛。手不能提。足不能步者。有久患癰癰積熱而伏於咽喉者。有內傷吐血陰火伏於喉中作痛者。有風熱驟傷而忽然食惡物以發者。有婦女經水不調下閉忽送上升而致喉內作痛者。有犯夢遺日久。水衰火動而致口內作痛者。有雙松蘂、單松蘂、雙燕子、單燕子、雙鵝喉、單鵝喉、雙纏、

單纏、懸蜚、合架、音圻、塔、癰、癰、乘枕、乘癰、斗底、蜈蚣、聯珠、破頭、掩頭、大頭、穿額、魚鱗、玉笋、蓮花、梅花、黑疔、搶食、木舌、重舌、痲舌、回舌、舌癰、驢嘴、魚口、喉癰、喉疔、喉箭、喉痺、剪喉、牙癰、牙疔、牙疳、肥猪、鵝口、胎毒、鎖子等症。此上症雖多端。治法惟可升提驅風。發散解毒清涼。切不可攻下通利。及補托熱燥收斂之藥。經云。毒在咽喉。猶有救。毒歸臟腑。病難全。諸症皆從臟腑發。醫從臟腑治其源。內外經絡能兼治。不。是仙來也是仙。

辨喉症經絡治法

夫咽喉者。乃人飲食呼吸之門。聲音吐納之路。此關一身。害人迅速。醫者不明。誤人更不可勝計。蓋口者脾之竅。口脣焦乾爲脾熱。焦而紅者吉。焦而黑者凶。若口脣紅腫。極熱也。口脣青白。極冷也。口爛舌乾。心熱也。口咽乾焦。欲飲水者。陽明之

熱也。口噤難言者。風熱閉竅也。口涎流而脣色紫者。胃氣虛也。肚痛口吐涎水者。蟲積也。如脣嘴反青黑。直如魚口。氣急不收。口脣顫動。搖頭不止。皆是不治之症。然口爲脾竅。舌爲心苗。口養精液。須通五氣。五氣者。五臟之氣也。然臟熱則口苦。臟寒則口鹹。虛則口淡。冷則口甜。宿食則口酸。虛熱煩燥則口澀。腥臭之氣。蘊結於胸臆之中。發冲於外。則口臭氣滯。加之風熱勞鬱之毒。則口舌生瘡。法當清胃瀉火爲主。假如喉內左邊先起。或紅或白。或黃或黑。或有膜無膜。有核無核。此皆屬肝經發來之毒。風熱當用甘桔湯加柴胡。白芍爲君。實熱加生地。丹皮。膽草爲佐。痰涎壅盛加連翹。葶子。花粉。有膜則用蟬退。有核用獨活。丹皮。初起有潮熱。則用防風。荊芥。薄荷。虛熱用元參爲君。倘或右邊先起。其色或紅或黃。或白或黑。有膜無膜。或有核無核。皆是屬肺經發來之風熱毒。當用黃芩。桑皮爲君。實熱則加生地。丹皮。羚羊。痰涎壅盛有膜。及有潮熱虛熱。用藥同上。如在膈中上下舌根

左右起者。其色或紅黃青白黑不等。此屬心經發來之風熱毒。當用川連、梔子、舌硬用羚羊、犀角。痰涎壅盛有膜有潮熱。用藥俱同上。左齒上大齒屬膽。加膽草。左下大齒屬肝。加柴胡、白芍。右上大齒屬大腸。加枳殼、杏仁。右下大齒屬肺。加黃芩、桑皮。當中上四齒屬心。加黃連、犀角。當中下四齒屬腎。加黃柏、知母。上兩旁屬胃。加川芎、白芷。下兩旁屬脾。加蒼朮、白朮。若其滿喉發來色黃者。此乃脾家發來濕毒。亦當燥脾驅風。除濕解毒。其有滿喉黑色者。此屬腎經發來之毒。其毒久積。元氣損傷。津液敗壞。精神傾散。勞神過度所致。是乃險症也。其有喉內二三肉笋。滿口乾渴失音舌脫等症。皆係毒氣攻臟所致。此等症候。千人犯着千人死。靈丹百救無一生。不可不知之。

喉科辨症

雙松蘖症

此症發於喉鏡內左右俱有形如松蘖樣。先起三五白點黃點。後湊成一個。未開
花者可治。已開花者切勿輕醫。治當平肝清肺。驅風解毒。宜用生地、六味、加防風、
荊芥、薄荷、蟬退等藥。內吹以玉龍散。

單松蘖症

此症喉鏡內起一片。或左或右。形如松蘖樣。初起三五黃點白點。後湊成一個。未
開花者可治。已開花者難醫。左起治宜平肝。當用柴胡、白芍。右起治宜清肺。當用
黃芩、桑皮。仍加入升提驅風發散解毒去膜之藥。內吹玉龍散。

雙燕子症

此症發在喉中上顎。左右俱有。滿口紅腫。形如燕子伏樑。頭向上。尾向下。其尾開
有兩片。其膜色白黃紅。頭向出者可治。向入者難痊。若色黑者不治。治法用甘桔

湯。加平肝清肺去膜解毒消風升提之藥。內則用玉龍散吹之。

單燕子症

此症發在喉內。或左或右。單起一片。形似燕子。仍有白膜黃膜起。治法左平肝。右清肺。餘與雙燕子同。頭向出尾向入者易治。頭向入尾向出者難醫。急宜用升提等藥治之。緩則不救。

雙鵝症

此症生於膈中。左右俱有一片。其形與膈中三花相類。均結有核。甚痛。飲食皆不能下。是屬陽症。宜針刺患處出血。並刺夾車、少商兩穴。惟有尖起者可用針刺。不起尖者弗刺。治法宜用散血活血等藥。內則用玉龍散吹之。如有潮熱者。用甘桔湯加去風藥治之。

單鵝症

此症與雙鵝相同。惟或左或右。單起一片。飲食不能下咽。治法左起平肝。右起清肺。並宜用針刺出毒血。但患處起尖者可刺。不起尖者勿刺。餘用藥同雙鵝。

雙纏症

此症發時喉內四圍紅腫。在膈中左右。有白膜黃膜兩片。屈曲相纏。纏上者輕。纏下者重。若至日久。則難治矣。膜之邊弦上有紅絲絡者可治。若透底黑者定死。此是肝肺發來之陰毒。治法不可大清。宜用甘桔湯治之。內則吹以玉龍散。

單纏症

此症喉內四圍紅腫。或於膈中左。或於膈中右。單起一片。亦有白膜黃膜。屈曲相纏。纏上者輕。纏下者重。如脫後紅色者生。黑熟色者死。是爲陰症。不可大清。治法宜用甘桔湯加升麻、蟬退。惟左起宜加柴胡、白芍。右起宜加黃芩、桑皮。

懸蜚症

此症發在肺中之前後左右。形似蝴蝶。一書云似魚膽懸懸浮起。其色帶黑。是乃心腎發來之毒。治當用清心解毒。升提涼血發散之藥。不可針刺。亦有用生地、六味。或八珍湯治之者。

合架症

此症多因大笑大喊所致。發在癰機左右。先起滿口腫痛。飲食不下。三五日後合成衣架樣子。其膜色黃白不等。此乃肝肺所發之毒。一二日內可治。久則難治。治法宜先在合車、合谷、少商穴刺出毒血少許。再以清肺平肝發散解毒去膜之藥治之。內吹以玉龍散。

圻塔症

此症發在肺中內側圻音邊。或左或右不定。然俱有白膜黃膜。若不細心看之。不能見。須將面掇起開關側目視之。色黃白者易治。熟黑者難醫。發左則平肝。發右

則清肺。治宜去膜升提驅風解毒之藥治之。內則以玉龍散吹之。

瘰癧症

此症係頸上處處有核。移毒於喉中左右內外。其症從經絡發來。屬火屬痰。治法當化痰降火驅風解毒之藥。外用冲和散敷之。如膜白似豬油。黑如墨染。皆是不治之症。

乘枕症

此症生於癰機前正對鼻孔。緩緩發來。形爲橫枕。其色黃白。關閉涎盛痰多。針刺無血出。不痛者乃屬內傷肺竅。宜用甘桔湯加減治之。如鼻孔有血出及鼻塞頭痛目暈。便是不治之症。

乘顎症

此症發於上顎。紅腫者多。起白膜黃膜者少。有核用針。無核不刺。驟發者易治。緩

發者難愈。針刺痛有血者可治。刺而不痛無血者不治。此是心經發來即傷內臟之症。治法用連翹消毒飲。加秦艽、防風、荊芥。

斗底症

此症發在喉鏡鍋內。即膈中初發時有寒熱。鏡中有三五七白黑點子。二三日白膜浮起。對中胸前有毒氣二路橫過。或直下。是乃陰症。由心發來者。宜先用針刺其經絡。去其毒血。後治以升提解毒清心去膜消風之藥。切不可攻下通利。或用地黃散治之。內則吹以玉龍散。若痰不止。氣響聲嘶聲啞者。十不過救一二耳。

蜥蛄症

此症發於舌根下兩邊。形如鈴子。不摻開不見。摻開舌根。其形乃見。不可針刺。如誤刺破。即不可治。治法宜用甘桔湯。加平肝清肺消風解毒活血化痰之藥。

聯珠症

此症生於喉中或左或右。單起一片。有上下二個。中心有紅絲透上下兩珠。結成膿血。穿後必連作一個。仍有膿血。出之可愈。是屬陽症。治宜左屬平肝。右宜清肺。當用甘桔湯。加消風升提排膿解毒之藥。

破頭症

此症發在喉鏡內。核本一個。却破兩片。其色黑熟。口臭痰響聲啞。是乃不治之症。

掩頭症

此症發在喉中癰機上左右。先結核。結核後高尖處有白膜黃膜掩頭。不可針刺。此是肝肺發來之風熱毒。治當清肺去膜之藥。宜用甘桔湯加羌活、防風。服之最效。

大頭症

此症因天時瘟疫瘴氣所發。必大寒大熱。口噤面黑。四肢軟弱。手不能提。足不能

舉。頭大如斗。氣大而緊急。是乃三五日死之症。切勿輕易醫治。

穿額症

此症生於腠中前內向裏面。有二三五黑點。大似烏豆樣。此是腎經傳來。不治之症。切勿妄治。

魚鱗症

此症生於喉掩間。形如松實樣。若魚鱗向下。聲啞色黑者不治。

玉笋症

此症發在牙關牙床肉上。形如三五肉笋。徐徐發來。針刺不痛。此是臟腑內傷。係不治之症。

蓮花症

此症起在舌上。生五七枝不定。或具紅黃白等色。形如蓮花相似。不可針刺。凡患

是症。潮熱必甚。治用犀角地黃湯。加梔子、連翹、葶子、花粉。

梅花症

此症發來滿喉俱有。紅黃白點形似梅花。痰涎壅甚。舌硬面紅。潮熱作渴。是乃大熱之症。治當清涼消風解毒去膜之藥。內用玉龍散吹之。

黑疔症

此症發在喉中左右。舌俱黑色。此乃腎經傳來。不治之症。患是症者。必大寒大熱。蓋傷色過度。腎絕故也。

搶食症

此症或發在喉中。或發在舌上。俱生紅疱。患者必面色紫黑。驟傷風熱。喉內氣閉。不能吞物。治宜先用針刺出血。後以生地黃湯加解毒湯之藥治之。是乃誤食惡物之症。久則難治也。

木舌症

此症由心經大熱發來。其舌紅腫強硬。竈至寸餘。不能言語飲食。痰涎壅甚。宜用黃連消毒散。加去風化痰除涎之藥治之。如舌出齒外者不治。

重舌症

此症發在舌底下重生一舌。本舌強硬。生來之舌亦硬。如生得過長大者。本舌捲入。便飲食不能進。此是心經發來熱毒。治宜用黃連消毒散。酌加解毒涼血之藥治之。

癰舌症

此症生於舌之上下。緩緩發來。其舌龜硬如石。結核成膿者可治。如不結核。口舌日見短小。至二三年後。舌忽失去。則雖有靈丹。不能治矣。此是內傷心經之症。如所爛之點黑色者亦不治。

同舌症

此症發在舌上。腫大強硬。其舌尾捲入。不能言語。飲食亦不下咽。此是心經發來之毒。治法用犀角地黃湯。加清心去痰解毒之藥服之。

舌癰症

此症發在舌根舌底。結核甚痛。是乃陽症。定要出膿後七日方愈。此由心經發來之症。治宜清心升提解毒清涼之藥。

驢嘴症

此症發在上口脣。對住人中。先紅後黑。滿身潮熱。其症發之甚速。此乃脾經發來之風熱毒。當用甘桔湯加白芍。並驅風解毒瀉脾之藥治之。外以烏鰐魚牙煨黑存性爲末。加冰片、青黛。蜜糖調塗之愈。或用茶油調搽亦可。

魚口症

此症發在口脣。形如魚口。氣出不臭。痰涎不收。是乃脾經發來熱毒。上脣屬脾。下脣屬胃。治宜石膏、白芍爲主。佐以清脾瀉胃之藥。外用冰硼散塗之即愈。

喉癰症

此症發在喉內。或左或右。單起一片。耳底痛甚。七日成膿。是乃陽症。治宜左平肝。右清肺。加以升提之藥治之。

喉疔症

此症發於半頸喉內之中。結核成膿。不能針刺。聽其膿自出。但患是症者。潮熱必甚。治宜用甘桔湯加升提去風之藥。

喉箭症

此症發在膈中左右。有白路黃路。頭大尾細。直落喉下。是乃險症。最要謹慎。治法宜用甘桔湯加升提之藥。如毒已下肚。氣響聲嘶者不治。

喉痺症

此症生於喉中內隔。發之甚速。氣急而促。飲食莫下。茶入口中。由鼻內出。治宜升提消風解毒之藥治之。

剪喉症

此症發在喉管內。左右有核。飲食莫進。如面暗神慘頸腫。氣響無痰。目不轉眼者。不治。

肥豬症

此症發於兩牙關。外面腫大。內面腫。色淡紅。不結核。治法內用玉龍散擦。外用石灰調醋敷之即效。或用虎骨磨醋塗之亦愈。

鵝口症

此係胎內受毒發來之症。小兒二三五歲之內常有患者。是症發在口角口脣。舌

尾舌底下。舌面上俱有白黃點。兩牙關亦有點子。高處起核。可用針刺核出血後。隨以銀花、甘草泡水洗之。或用五倍子煎洗亦可。又方以前藥加硼砂、明礬共研細末常擦之愈。此症雖一二月猶可治。

胎毒症

此症三五月及月內小兒。皆有發者。其症發來滿口白膜。涎盛不收。乍寒乍熱。面色如黃紙。滿身起紅黃爛點。如肌膚脫落則不治。是乃胎毒。皆緣胎前不知謹節所致。或未滿百日而服酸鹹之味。並迭慾無狀。喜怒不常。皆能令子受惠是症。壯者宜解毒瀉胃火。內以冰硼散吹之。並用五倍子煎水京青布蘸洗口內。

鎖子症

此症小兒百日內。以及二三歲皆有發者。發時滿口白膜黃膜。涎盛面黃。牙肉有白點。要針刺放出黃水。黃水出散其毒。方治以甘桔湯等藥。並用冰硼散吹之。如

舌尾下對中縫有白點黃點驟起。而身壯者易治。若久發起有黑紅。并脫肌膚。潮熱不退。氣響聲啞者不治。

論症治法

以上四十六症。須細心辨認。當清則清。當補則補。當提則提。當瀉則瀉。有風去風。有潮熱去潮熱。有涎除涎。有痰化痰。有膜去膜。關閉關閉。其有白膜黃膜。紅爛點子。而氣不響。聲不啞。音不嘶。語不亂。喉不乾。肚不痛。口不禁。言不狂。眼不紅。氣不躁。目不直視。神不暗慘。大小便順利。口臭無血。胸不緊。色不熟黑。針刺有血者。人雖傾危。毒未攻臟。藥尙能解。以上壞症。如患者兼有一二樣。切勿妄治。若主家再三哀懇。却情不過。亦須言明此是不治之症。今順情下藥。功過皆在所弗受。方可免怨也。

辨陽喉症訣

夫陽喉者。陽氣發顯於外也。其色紅。其氣滾熱。其舌強硬。其胸緊氣急。大便堅硬。小便澀數。其面必紅。其內外紅腫之處必大熱。其口氣必滾熱而臭。其眼內必紅。其喉鏡內必起紅絲線經絡。其口脣必紅而龔厚。其陽分發熱潮熱必甚。其痰涎壅甚。其言語雄壯。其聲怒。則其症實乃陽喉也。可用清心平肝瀉脾寒涼之藥治之。

辨陰喉症訣

夫陰喉者。陰氣伏藏於內也。其色青白黃。其氣溫涼。其舌軟必捲縮。其胸寬。其大小便自通利。其面色青黃。其內外腫處青。亦復溫涼本色。其眼黃。其喉鏡內色淡。其舌色白黃。其陰分潮熱。或微寒微熱。其痰涎少。其聲溫和。其症則虛。是乃陰喉也。不可太用寒涼之藥。宜重用元參瀉虛火爲主。

看喉中辨臟色訣

五臟者。心肝脾肺腎也。各載五形。各形五色。五形者。金、木、水、火、土也。五色者。紅、青、黃、白、黑也。相生者其病輕。相尅者其病重。假如其色紅。則屬心。其色青。則屬肝。其色黃。則屬脾。其色白。則屬肺。其色黑。則屬腎。此乃五臟中形見於五色也。開其口一觀喉中形色。卽知其由何臟中發來。相生者易治。相尅者難醫。此是傳授真口訣。切勿視爲等閑語。

辨毒攻臟訣

毒攻心必狂言亂語。毒攻肝其眼怒直視。毒攻肺其聲嘶而咳嗽氣響。毒攻腎其聲沉緩而啞。毒攻脾頸上浮腫必結核。此乃餘毒發來。外用冲和散敷之則散。不散則熟。用針刺出膿血卽愈。以上係毒攻臟腑之症。諺云。毒攻臟腑爲死症。古人不治。命由天。

認死症歌訣

凡喉症無痰者不治。痰響如雷者危。氣聲如拖鋸者死。聲啞者不治。色如腥熟者死。面黑神慘者死。口噤者危。齒脚肉包過牙者死。怒目直視者死。肚痛者死。鼻內出血不止者死。大便泄出黑色者死。潮熱不退者危。口動言語亂者死。喉内生肉笋針刺不痛者死。膿血不腥不臭者死。氣出無收者死。手不能提足不能步者死。滿喉盡膜者不治。氣臭者死。肺中子白膜遮盡者死。牙齒脫者不治。失舌者死。痰火升喉痛者不治。瘰癧火升喉痛者不治。以上皆死症。百中可救一二而已。

治咽喉辨論

夫咽喉之症。皆由五臟六腑發來。臟腑生病。其形色見於咽喉。肺中以外者謂之咽。肺中以外者謂之喉。咽喉形色各有陰陽。虛實之毒。卒然發起。牙關緊急。痰涎壅盛。氣出不收。朝發夕死。是乃急症。醫者不明。往往謂此爲痰熱。孰不知有陰陽虛實之分。外症爲陽。內症爲陰。虛則溫之。實則瀉之。有熱去熱。有風去風。有毒解

毒。有膜去膜。有痰化痰。有涎去涎。關閉用開關藥。至內面紅黃白爛點。可用藥散吹之。外面紅腫結核。則用藥散敷。結核成膿用針刺。審症用藥勿慌忙。此真口訣也。

論喉症治法

一、火症喉痺。悉宜以抽薪飲主之。

一、火不勝者。宜從薪飲主之。

一、凡膽肝之火盛者。宜以芍藥、梔子、草龍膽爲主。

一、陽明胃火盛者。宜以生石膏爲主。大便閉結不通。宜加大黃、芒硝之屬通其便。而火自降。

一、凡火浮於上。而熱結於頭面咽喉者。最宜清降。切不可誤用升陽散風等劑。蓋此火由中發來。得升愈熾。經曰。高者抑之。正此之謂也。非火鬱宜發及升陽散

火之義。學者於此最要體察。勿謂誤認其面目爲囑。

一、凡外治火症腫痛之法。宜以木鱉子磨醋。用鵝毛蘸擦喉中。引去其痰。或另少和清水。免致太酸。時時呷嗽喉中。不可嚥下。引吐其痰爲更喜。嗽後以代匙散吹之。仍內服湯藥。自無不愈。

一、凡火壅於上。而食物之治。最宜梨漿、萊豆湯之屬爲妙。若南方少梨之處。或以好蘿蔔搗汁。和以泉水。少加元明粉攪勻。徐徐飲之。既可消痰。亦可清火。

一、凡單雙乳鵝。若毒未甚。膿未成者。治之自可消散。若勢甚而危。必須砭出其血。庶可速退。此因其急。亦不得已而用之也。又古法治喉痺。用三針刺少商穴。血出卽愈。

一、陰虛喉痺。其症亦內熱口渴喉乾。或脣紅頰赤。痰涎壅盛。然必六脈無神。或六脈雖數。浮軟無力。但察其過於酒色。或素稟陰氣不足。多倦少力者。是皆腎陰

虧損。水不制火而然。火甚者。滋陰八味煎。加減一陰煎之類主之。火微而不喜冷物及大便不硬。小便不熱者。宜六味地黃湯。一陰煎之類主之。若思慮焦勞。兼動心火者。宜用二陰煎主之。

一、格陽喉痺。由火不歸元。則無根之火。寓於咽喉而然。其症在上熱下寒。全非火症。凡辨此者。但診其六脈微弱。全無滑大之意。則下體全無火症。而腹不喜冷。即是症也。蓋此症必因色慾傷精所致。或泄瀉傷腎。或本無實火。而過服寒涼。以傷陽氣者。皆能患此症。速宜用鎮陰煎治之。爲上。八味地黃湯次之。或用蜜附子含嚥亦可。若再用寒涼之劑。多致不救。

一、陽虛喉痺。非喉痺因於陽虛也。乃陽虛因於喉痺也。蓋有因喉痺過於用攻擊之劑。致傷胃氣者。有飲食難下。倉庫空虛而傷胃氣者。又有氣體素弱。不耐勞倦。而傷胃氣者。大凡中氣內虛。疼痛外逼。多致元陽飛越。脈浮而散。或弱而澀。

以致聲如鼾睡。痰如拽鋸者。此胃肺垂絕之候。速宜挽回元氣。以人參一味濃煎。放心徐徐嚥下。如痰多者。或加竹瀝、薑汁亦可。如遲多致不救。若作實火治之。則禍不旋踵矣。

一、格陽喉痺。但見其頭面浮火。喉頭粗極。氣急聲啞。咽腫口瘡。痛楚之甚。察其脈。細甚而數。問其言。則聲微似不能振者。詢其所服之藥。無非黃連、梔、柏之屬。此蓋以傷陽而起。復爲寒涼所逼。以致寒盛於下。而格陽於上。卽茶水之類。亦俱難入口。而尤畏煩熱。余曰。危哉。再遲日子。必不能救矣。遂以鎮陰煎泡好。以冷水座冷。徐徐使嚥之。甫服一劑。須臾而頭項腫痛盡消。遂繼用五福飲之類。數劑而愈。疑者始皆駭服矣。

一、喉痺痛。大概痰火所致。急者宜吐痰後復下之。上下分消而愈。又甚者。以針刺去血。然後用藥吐下。此爲治之上策。若人畏懼。而委曲旁求。瞬息喪命。蓋治喉

痺之法與救火同。不容少待。內經曰。發之。發之者。發散也。吐中有發散之義。出血者。亦發散之端也。治斯痰者。毋執緩方小方而治之。如曰吾藥乃王道不動臟腑。若遇疾之輕者可獲愈。疾之重者。因循死矣。豈非誤殺耶。

一、喉癰症。凡陰虛勞損之人。多有此病。其症滿喉生瘡。紅腫疼痛。久不能愈。此實水虧虛火症也。宜用前陰虛喉痺之法治之。若多咳嗽肺熱。宜以四陰煎之類治之。若滿喉生瘡破爛而痛者。宜用牛黃益金散吹敷之。仍內服滋補真陰之劑。自可痊愈。

一、瘟毒喉痺。乃天行瘟疫之氣。其症則咽喉項腫。甚有頭面頸項俱腫者。北方尤多此病。俗呼爲蕃瘟。又名鷓鴣瘟。亦名大頭瘟。此濕熱壅盛最凶之候。宜清諸經之火。或瀉陽明之熱。當察緩急而治之。東垣有普濟消毒飲。專治瘟毒喉痺。百發百中。

一、伏氣之症。古方謂之腎傷寒。謂非時有暴寒中人。毒氣伏於少陰腎經。始初不病。旬月乃發。脈微弱。法當以傷寒治之。非喉痺之病也。次非下利不可。按此症亦所常有。是必以少陰少陽之火。令太陽之寒。令太陰之濕。復兼令風寒之邪者。皆有此症。故治此者。不必治喉痺。但治外邪。其喉自愈。即如新方之柴胡飲及散陣諸方。皆可隨宜酌用。

一、楊梅結毒。有喉間潰爛作痛久不愈者。此非喉痺之屬。乃楊梅瘡毒也。宜用仙遺糧湯。甚者宜以土茯苓煎湯。吞五寶丹治之。

一、虛損喉痺。未易辨也。若一人因患虛損。更兼喉癰腫痛。多醫罔效。余診其脈。則數而無力。察其症則大便溏泄。問其治則皆退熱清火之劑。然愈清火而咽愈痛。余察之。既確知其本非實火。而且日前多用寒涼。以致肚痛不實。總亦格陽之類也。遂專用理陰煎及大補元氣煎治之而愈。

一、鎖喉風症。時人以咽喉腫痛。飲食難入。或痰氣壅塞不通。甚奇甚急者。皆稱爲鎖喉風。而不知有真正鎖喉風。其甚奇甚急之處。而實人所未知也。余在襄陽嘗見一女子。年已及笄。忽一日在於仲秋時。無病而喉竅澀愈甚。及延余診視。按其脈。無火也。問其喉。無腫無痛也。觀其貌。則面青目瞠不能語也。聽其聲。則喉竅若細如針。抽息之窘如線。伸頭掙命求救之狀。甚可憐也。予見而疑之。不得其解。然意謂風邪閉窒喉竅。非用辛溫不能解散。遂用二陳湯加生薑煎而與之服。毫忽無效。意復用獨參湯以救其肺。然見勢危若此。恐滋怨謗。終亦未敢下手。他醫見之。亦但束手而已。如此者。一日夜而歿。後又一人。亦患此症而歿。若此二人者。余及今莫識其所以病。此畢生之疑竇。殊自愧也。然意必肺氣竭絕之故。倘值此者。恐非獨參湯決不能救。故特書此。以俟後之君子詳酌焉。

一、諸物鯁於喉中。或刺或骨。必有鋒芒之逆。所以刺礙而不下。凡下而逆者。後而

上之則順矣。故治此者。當借飲食之勢。湧而吐之。使之上出。則如拔刺之捷也。若芒刺既深。必難推下。非惟理勢不順。必致遲延。或飲食既消。無可推還。以致漸腫。則爲害非細矣。凡諸骨鯁。或以錫糖一大塊。滿口吞而嚥之。或用韭菜炙熟。不可切斷。作一小束吞之。芒刺即裹而下。亦妙。

一、小兒口中誤吞鐵釘痛甚。余以磁石七錢。朴硝二錢。熟豬油二兩。加蜜糖調和。藥末與之食。次日其鐵隨糞出。是誠可謂良方矣。

論分經治喉症藥性

一、瀉心火用黃連。瀉肺火用黃芩。脾火須用芍藥。胃火定宜石膏。柴胡瀉平肝火。知母瀉平腎火。木通瀉平小腸之火。黃柏瀉膀胱火。大黃瀉大腸火。屈抑之火。生梔爲君。浮遊之火。元參爲妙。

一、上焦有熱。黃芩、赤芍。中焦有熱。黃連、梔子。下焦有熱。黃柏、知母。

一、上焦有寒。麻黃、桂枝。中焦有寒。肉桂、乾薑。下焦有寒。附子、沉香。

一、梔子、黃連、麥冬、犀角。俱清心。黃芩、桑皮、羚羊。俱清肺。柴胡、白芍、膽草、青黛。俱平肝。知母、黃柏瀉腎火。白芍、石膏、黑梔、甘草俱瀉脾火。連翹、牛蒡能解毒。黃芩、花粉能解痰涎。防風、荆芥、薄荷、秦艽、羌活。俱祛風除濕。退潮熱。化痰。口苦用膽草。口渴葛根。提毒用升麻。去膜用蟬退。涼血須生地。血中伏火丹皮、澤瀉。去口臭人中黃。痰盛牛黃。開關殭蠶、全蝎。載藥上浮。能達氣而下行者惟桔梗。止熱嗽。黃芩、桑皮。止風咳。麻黃、杏仁。止痰嗽。貝母、連翹。止虛咳。阿膠、白醋。能解咽喉諸毒。射干、豆根。能和諸藥。解百毒。甘草。排膿。白芷、南星。發散荊皮、獨活。打穿出膿。則穿山甲。

治喉用藥變化歌訣

治喉甘桔是神方。細心體察辨陰陽。柴胡、芍藥平肝木。不論心肺也備嘗。黃芩同

用桑皮是。加用花粉效非常。防風、荊芥能逐風。去膜蟬退用之良。喬夢解毒痰俱化。驅風提毒升麻當。生地等件須無膜。豆根少許最爲良。連、梔、犀角有時用。實熱無膜可主張。六味品中除棗肉。審症用藥莫慌忙。連、射、丹、梔雖難缺。孕婦遇之要謹防。此歌訣須讀至爛熟爲要。

抽薪飲 治諸火熾盛而不宜補者。

黃芩

石斛

木通

梔子炒

黃柏各三錢

枳殼半錢

生甘草二錢

熱在肌膚經絡。加連翹、花粉。熱在血分大小腸。加槐花、黃連。熱在陽明。頭面燥煩便實者。加石膏。熱在下焦。小水痛澀。加草龍膽、車前。熱在陰分。津液不足。加麥門冬、生地、芍藥。

徙薪飲 治三焦火症。大凡一切內熱漸覺而未甚者。先以此劑服之。如火甚者。

宜用抽薪飲。

陳皮 分

黃芩 二錢

白芍

茯苓

丹皮

黃柏 各錢半

滋陰八味湯 治陰虛火盛。下焦濕熱等症。

淮山藥 四錢

丹皮 三錢

白雲苓 三錢

茱萸 四錢

澤瀉 三錢

黃柏 三錢 鹽水炒

熟地 八錢

知母 三錢 鹽水炒

一陰煎 治水虧火盛之劑。

生地 二錢

熟地 二錢

芍藥 二錢

麥冬 二錢

牛膝 錢半

丹參 二錢

甘草 二錢

火盛躁煩。加龜板。氣虛。加人參。心虛不眠多汗。加棗仁、當歸。汗多煩躁。加五味子、茱萸。微有火者。加女貞子。虛火上浮。吐血衄血不止者。加澤瀉、茜根。或加川

續斷澀之亦可。

加減一陰煎 治症如前。但火盛者。宜用此方。

生地

白芍

麥冬各二錢

熟地三錢

地骨皮一錢

炙草五分七

知母一錢

煩燥便結加石膏。小水熱澀加梔子。火浮於上加黃芩、澤瀉。血燥血少加當歸。
二陰煎 治心經有熱。水不制火之病。

生地二錢

麥冬二錢

棗仁一錢

元參錢半

川連三錢

茯苓錢半

木通錢半

生甘一錢

鎖陰煎 治陰虛於下。格陽於上。真陽失守之病。

熟地二兩

牛膝二錢

澤瀉錢半

清花桂二錢

附子五七分或一二三錢 炙草一錢

如嘔惡。加乾薑一二錢。氣脫倦言而脈微弱者。加人參。

四陰煎 治保肺清肝。有陰虛勞損。相火熾盛等症。

生地錢一二 麥冬二錢 白芍二錢 茯苓錢半

百合二錢 生甘一錢 沙參二錢

理陰煎

熟地或三五七錢當歸二五七錢或乾薑一二錢 炙甘一二錢

或加用上好肉桂亦可。

大補元煎

黨參錢一二 熟地錢二三 淮山錢炒二 杜仲二錢

當歸錢二三 枸杞錢二三 炙甘錢一二 茱萸一錢

如元陽不足多寒者。將本方加以附子、炮薑片、肉桂。氣虛加黃耆、白朮。血滯去

茱萸、加川芎、滑泄。加故紙、五味子。

普濟消毒散 治疫厲惡寒壯熱。頭面腫盛。目不能開。氣上喘促。咽喉不利。口舌乾燥等症。東垣曾以此方治大頭病。獲愈者以萬計。

黃 芩五錢

黃 連五錢

人 參三錢

橘 紅二錢

元 參二錢

桔 梗二錢

柴 胡二錢

薄 荷一錢

連 翹錢半

牛 蒡錢半

豆 根一錢

馬屎勃一錢

白殭蠶炒一錢

升 麻一錢

生 甘二錢

以上各藥共爲細末。半用白湯時時調服。半用蜜丸噙化。服盡卽愈。或加防風、川芎、當歸、薄荷、細辛。水二鍾煎一鍾服。可令熱速消。或熱極腫甚。先用刺出其血亦效。一方無人參。

十二味玄翹飲 治白喉初起絕妙方。

元參	三錢	連翹	錢半	山豆根	錢半	銀花	錢半
桔梗	錢半	銀柴胡	一錢	牛蒡	錢半	蟬退	頭足一錢去
升麻	一錢	花粉	錢半	馬蹄香	即沉香錢半	生甘草	一錢

煎水服。

治喉內無論兩傍上下。生有白膜是乃白喉。玉腠中如有白膜即難治矣。務要急宜調治。使毒不得攻於內臟。或有回生之望。初用

沙參	三錢	麥冬	錢半去心	赤芍	錢半	連翹	錢半
牛蒡子	錢半	銀花	錢半	生甘草	一錢	桔梗	二錢
蟬退	去頭足一錢	柴胡	一錢	山豆根	錢半	葛根	錢半
知母	錢半	馬蹄香	即沉香二錢	花粉	錢半		

煎水服。

治白喉潮熱漸除白膜漸減方

元參三錢半

麥冬錢半

白芍錢半

釵斛錢半

銀柴胡一錢

女貞子三錢

北沙參三錢

桑白皮

連翹

牛蒡子

銀花各錢半

桔梗二錢

蟬退去頭足一錢

山豆根錢半

馬蹄香二錢

治白喉白翳將見紅影方

洋參二錢

元參三錢半

白芍錢半

連翹錢半

牛蒡子錢半

銀花錢半

桔梗錢半

女貞二錢半

金釵斛錢半

北沙參三錢

馬蹄香即沉香二錢

如有咳嗽。加桑白皮錢半、杏仁去皮尖錢半。

治白喉元氣虧損將全愈方

洋參三錢

麥冬錢半

白芍錢半

女貞子二錢

白茯苓二錢

淮山二錢

北沙參三錢

元參三錢

桔梗錢半

治虛喉妙方

熟地三兩

洋參兩半

麥冬去心八錢

元參兩半

白芍八錢

女貞子兩半

釵石斛八錢

茯苓六錢

兔絲餅一兩

淮牛七七錢

如腎陰虧極者。加枸杞一兩、北五味三錢半。脾陰不足者。加淮山藥一兩。以上各藥共為細末。煉蜜為丸。如梧子大。每服四五錢。白滾湯下。治陰虛於下。火浮於上。腹不受冷物。頭暈腰痛。手足俱冷等症。

熟地六錢

淮山二錢

茯苓一錢

麥冬二錢

淮牛七二錢

北五味五分

清花玉桂去皮六分另水沖服

白芍二錢

高麗參二錢另水沖服

又方 治腎陰虧損。火不歸元。氣浮越於上方。

熟地六錢

潛朮二錢

麥冬二錢

牛七二錢

北五味五分

附子六分

高麗參二錢另水沖服

治陰火方

桔梗三錢

元參三錢

梔子仁一錢

連翹錢半

牛蒡子錢半

生甘一錢

山豆根一錢

花粉錢半

初服一二劑。用防風一錢、荆芥一錢、薄荷五分。若左起。加柴胡一錢、白芍錢半。右加黃芩錢半、桑皮錢半。有膜加蟬退五分。口內色紅甚。加生地二錢、丹皮錢半。口脣紅焦。加石膏一錢。

治陰火驗方

生地_{三錢半}

元參_{三錢}

麥冬_{錢半}

知母_{錢半}

澤瀉_{一錢}

女貞子_{二錢}

白芍_{錢半}

連翹_{錢半}

銀柴胡_{一錢}

北沙參_{五錢}

熟地_{五錢}

一二服後。即除銀柴胡、北沙參。如有咳嗽。加桑白皮三錢、杏仁二錢、去皮尖、丹皮一錢半。

滋陰降火湯 如無潮熱。方可用此方。

熟地_{五分}

元參_{三錢半}

麥冬_{錢半}

生芍藥_{錢半}

丹皮_{錢半}

澤瀉_{一錢}

北沙參_{三錢}

女貞子_{三錢}

金釵石斛_{錢半}

天冬_{錢半}

治喉內有腫。兼有時寒時熱不齊之症。

生地四錢 連翹二錢 牛蒡子錢半 銀花錢半

丹皮錢半 葛根二錢 沙參三錢 柴胡一錢

馬蹄香即沉香三錢 山豆根錢半 花粉錢半 桔梗錢半

赤芍錢半 生甘草一錢

治實熱症方

牛蒡子錢半 花粉二錢 犀角一錢 丹皮錢半

麥冬錢半 黃連錢半 生地三錢 連翹錢半

澤瀉一錢 生梔仁錢半 射干一錢 山豆根一錢

桔梗二錢 生甘一錢

左加柴胡。右加黃芩、桑皮。有潮熱加防風、荊芥、薄荷。熱退即除。初用提毒升麻一二劑。後即除。有膜加蟬退。膜退即除。開關殭蠶、全蝎。關開即除。至解毒藥多。

服不妨。大凡喉症服清涼解毒藥。諸多轉手。用生熟六味。除莢肉。加解毒藥。忌。凡看喉症。不可除痰。只可解毒。不可攻下。只可升提。不可補托。熟煉收斂之藥。初用發散不散。則當排膿。其治大略。不過如此矣。凡患單鵝雙鵝。必有潮熱。當用此退熱涼血。消腫解毒方。

生地三錢

赤芍錢半

連翹錢半

牛蒡錢半

銀花錢半

山豆根錢半

花粉錢半

丹皮錢半

北沙參二錢

柴胡一錢

葛根錢半

桔梗錢半

馬蹄香二錢

生甘草錢

熱極者。加黃芩錢半。風甚者。加防風一錢二分。白芷一錢二分。或加薄荷七分。

治楊梅瘡冲喉方

生地半錢

元參三錢

麥冬錢半

白芍錢半

知母錢半

鹽 柏錢半

連翹錢半

牛蒡子錢半

銀花錢半

土茯苓三錢

丹皮錢半

澤瀉錢半

女貞子三錢

山豆根錢半

如有白膜。加蟬退七分。有潮熱。加北沙參二錢半、柴胡一錢。

治楊梅瘡冲喉藥丸方

生地二兩

熟地三兩

元參二兩

麥冬去心一兩

白芍八錢

知母一兩

釵斛一兩

土茯苓二兩

連翹一兩

牛蒡子一兩

銀花一兩

丹皮八錢

澤瀉八錢

女貞子一兩

沙參二兩

山豆根六錢

生甘草六錢

以上諸藥。純用日晒乾。共研極細。煉蜜爲丸。每早晚空心服四五錢。淡開水下。

治楊梅瘡較前症尤重方

生地三錢

元參三錢

麥冬錢半

白芍二錢

梔子錢半

丹皮錢半

澤瀉二錢

連翹錢半

牛蒡子錢半

北沙參二錢

銀柴胡一錢

女貞子三錢

馬蹄香即沉香二錢

知母錢半

如無潮熱。即除去北沙參、銀柴胡。加大熟地五錢、洋參錢半。若不用洋參。加北沙參三錢亦可。

治小兒陰虛喉有潮熱兼有些牙血出方

生地一錢七分

元參錢半

麥冬七分

白芍藥七分

女貞子錢半鹽水蒸

連翹七分

沙參錢半

骨碎補七分

銀柴胡七分

丹皮七分

澤瀉五分

馬蹄香一錢

如用洋參一錢。即除北沙參。

治三十六種喉散奇方

山豆根 錢半

粉甘草 錢半

川連 錢半

薄荷 錢半

寒水石 飛二錢

兒茶 錢半

人中白 二錢

白殭蠶 二錢

白蓮花 三錢

白硼沙 飛二錢

青黛 飛二錢

大梅片 錢半

川麝香 二分

珍珠 飛一錢

共研極細末如塵。罐貯勿泄氣。聽用。

治喉症奇驗方

老絲瓜仁不拘多少。晒乾研作如塵細末。每一兩加大梅片柒分。研細末。乳和勻。罐收勿泄氣。如有喉症。以分許吹之。至多三次即愈。

治陽喉散方

白礬砂三錢

硃砂二錢

雄黃精一錢

川連二錢

黃柏二錢

粉甘草錢半

薄荷二錢

兒茶錢半

飛青黛四錢

枯礬錢半

犀角錢半

雞內金一錢

大梅片一錢

白蓮花五錢

口臭加人中白一錢。口黑加熊膽一錢。痰盛加牛黃五分、珍珠五分、琥珀五分。

共研至無聲如塵爲度。瓶貯勿泄氣聽用。

治火症痘疳牙疳喉間潰爛金不換散

人中白五錢煨

細柏末三錢

青黛六錢

玄明粉三錢

白礬砂三錢

冰片三分

西瓜霜八錢製法在後

右爲極細末。罐貯勿泄氣聽用。若爛處有深洞者。加龍骨、象皮、赤石脂各三錢。同研吹之。痘疳加川連、胡連、甘草、人中黃、銀粉霜。之即西瓜霜每金不換散壹錢。

每樣各加伍分。共研末如塵。合搽之。喉癰喉疳。每金不換散壹錢。加粉霜三分。
治痰痺方

滑石一錢

石膏一錢

薄荷五分

膽礬五分

粉甘草三分

炒僵蠶五分

大梅片五分

皂角五分

牛黃五分

共研極細末。罐貯聽用。

應驗鵝喉方

平日遇有水瓜蜂。卽蜂鳥提取不拘多少。以酸梅汁浸之。若生鵝喉則撬開牙關。取蜂用口含之。使口水漸漸咽下便愈。

青梅丸

大南星個十二

半夏二兩

白礬一兩

甘草兩半

桔梗兩半
生鹽四兩

陳皮五錢

朴硝二兩
提過

青梅子一百個

先將朴硝研末。醃梅兩日。等梅汁出後。方將前藥末摻勻。晒乾。以磁瓶收貯。遇有鵝喉及牙痛喉痛。取梅一個。含之立消。

治陰白喉症散

人中白二錢

兒茶一錢

黃柏六分

青黛六分

薄荷六分

硼砂六分

蟬退七個

大梅片五分

共研極細末如塵。瓶收勿泄氣聽用。

治鵝喉口內含藥方

荊皮二錢

花粉錢半

白芷一錢

山豆根錢半

七里香二錢

馬蹄香即沉香
三錢

喉舌備要秘旨 喉部

用滾水二碗泡。燉濃。另倒開半杯。和白酒少許。不拘時含。至滿口痰涎卽吐出。

洗口散

五倍子二錢

礪

砂錢半

白礬一錢

共研細末。每用數分。以白開水泡出味。軟綢蘸洗。如有出牙血不止者。用此湯含口中。其血卽止。

三黃散 治陽症用。

大黃一兩

黃柏五錢

生薑五錢

羌活三錢

陳皮二錢

梔子三錢

地骨皮二錢

青黛二錢

共研末。調白酒外敷患處。

洪寶丹 治陽症用。

花粉三錢

赤芍二錢

薑黃一兩

白芷一兩

共爲末。或用黃酒或白酒。或清茶調勻。多熱敷之。

陽毒散

生南星三錢

蒼朮錢半

薑黃二錢

川貝二錢

白芷二錢

大黃四錢

雄精三錢

黃柏二錢

生甘二錢

防己二錢

花粉三錢

赤小豆二錢

豆根二錢

毛茛姑二錢去淨毛

共研末。調蜜糖。清茶敷患處。

治陽喉毒紅腫方

荊芥一兩

花粉八錢

白芷六錢

大黃六錢

七里香七錢

芙蓉花八錢

共研末。調白酒在核處搽之。略乾。又搽十餘次。即愈。

冲和散 治陰症用。

荆皮一兩

獨活五錢

赤芍五錢

白芷三錢

南星錢半

半夏錢半

南木香二錢

菖蒲二錢

共研細末。調白酒敷。

黃龍散 治陰症用。

草烏二兩

薑黃二兩

南星一兩

赤芍一兩

肉桂五錢
去皮

共爲末。調黃酒敷患處。

治陰毒青腫皮膚不燒熱方

生川烏六錢

生草烏六錢

生南星五錢

生半夏五錢

生梔仁七錢

芙蓉花一兩

七里香七錢

細辛五錢

白芷六錢

紅蓮花八錢

菖蒲五錢

生香附五錢

共研末。在校處搽。

兩宜散 半陰半陽冷熱不明者。用此治之。

荊芥

獨活

赤芍

白芷

菖蒲各等分

共爲末。用黃酒調敷患處。若瘡面上有血疱。不可用菖蒲。恐破瘡皮。宜先用四味敷之。後用菖蒲末敷於面上。覆過四圍。而以薄紙隔截之。凡敷末藥。須溫熱。方能令藥氣透入。若乾。再換濕者敷之。如四圍黑暈不退。瘡口俱無色者。其人必服涼藥太過。不可驟用黃龍散。因其膚肉未死。恐黃龍散藥力過峻。敷上更加苦痛。可於本方內加肉桂、當歸。以換起死血。血一浮面。卽除去二味。只用本方治之。若痛不止。可取酒泡乳香、沒藥。以瓦器盛放火上。俟溶化。乘熱傾入藥

內調勻塗之。痛立止。若瘡口有突肉箭起。宜以本方加南星。用薑汁和酒調塗。卽落。此因胃著風故也。或有近熱之症。可合洪寶丹。以葱汁、清茶同調敷。若遇陰寒之症。可合黃龍散調好酒敷之。

製西瓜硝

覓上號頭藤西瓜。或一個或二個。用稻柴墊好。放在乾燥廚內。立冬日將瓜挖去腹中穰。取去七分。皮上肉剩三分。每瓜用皮硝二斤或半斤。看瓜之大小酌用。蓋好用線絡住。懸向背陰屋簷下。至冷凍之期。其硝自盡出瓜外。顏色如霜。用刷簞輕輕拂下。以盤盛之。包好。至三五日一取。至春間將瓜內所剩之硝安好。候到立冬。將新鮮瓜盛之。再加硝半斤。或一斤。仍舊懸好。俟皮外飛出取之。如此二次。中間之硝亦不必再飛。可治喉癰喉疳諸火症。潰爛者吹之不痛。外皮飛出者名銀粉雪。其功可並紫雪。

鎖喉症吹之立效方

鏡面硃砂飛一分

正廉珠飛一分

珊瑚飛一分

雄精飛二分

青黛二分

硼砂二分

人中白三分

木樨子煨黑一分

大梅片一分

共研細末。罐貯聽用。

經驗鵝喉奇方

木樨壳存性五分

鼻涕蟲州條存性

人中白五分

山豆根取淨皮一錢

黑竹蜂存性十六個

川連一錢

大梅片一分

白硼砂五分

生大黃一錢

青黛飛二錢

肥猪存性三十隻

牛黃五分

明礬二分

麝香五釐

共研末。稱準分兩。再合研一二千下。罐貯封口。勿泄氣聽用。

鵝喉急救方

苦草錢七兩二分 醋一磅

共蒸出味。與病人吞嚥一口。牙關緊閉亦立開。

治各種喉症效方

人中白飛過三分

青缸花飛過三分

明珍珠甘草豆腐過研飛五分

黑竹蜂十個鹽醃年久者佳用新瓦一片焙蘇研末

飛琥珀五分

飛珍珠五分

天竺黃一錢

正川連一錢

大梅片二分

共研細末。後入冰片。再研勻。罐貯勿泄氣聽用。

治白喉症奇方 此症喉中先紅後白。

鴨糞瓦上隔火焙枯研末。白粥調服立效。如發寒熱。切忌表藥。誤用殺人。

口部

治口舌生瘡

吳茱萸爲末。用醋擦脚心。過夜卽愈。敷貼更妙。

又方

生附子研末。或用吳茱萸熱醋調敷兩脚心。無論虛實火。極神妙。

又方

天門冬去心

麥冬去心

元參

等分爲末。煉蜜丸爲彈子大。每含一丸。雖數年不愈者亦斷根。以生薑蘸蜜水揩洗。用薄荷自然汁同白蜜調敷。

口脣生瘡日久不愈

藍葉搗汁洗愈。若因氣鬱生瘡。用甌上倒汗水擦立效。並治小兒疳。或脣破生瘡。瓦松生薑汁搗融。入鹽少許。敷之愈。

舌無故出血方

花炒末摻。又方。香薷煎水含嚥。又木賊四錢。煎水漱口即止。
舌長數寸方

冰片研末搽即收。又方。番木鱉四箇。刮毛黃連壹兩。同熬浸舌。

舌瞠硬大閉咽喉

皂礬五錢。瓦焙紅放地上。冷定研末摻之。若其牙關緊閉。用物撬開牙齒。搽藥。
又方。蒲黃一錢爲末摻。並治舌上出血。

治羊鬚瘡奇效方 羊鬚煨灰。加冰片少許。麻油調搽即愈。

又方 泡濃茶一大碗。以患處浸茶內半枝香久即痊。

加味甘桔湯

甘草三錢

桔梗二錢

荆芥

牛蒡

炒貝母錢五分各一前胡一錢

薄荷五分

名加味甘桔湯。咸者宜服加味甘桔湯

柴袍散治十八種喉風

青黛水飛

石青

雄黃各一

膽礬三錢

人中白

硼砂

元明粉各五錢

黃連二錢

真冰片五分

共為細末。磁罐收貯。勿令洩氣。急時以二三分吹喉愈。

甘桔湯治風熱上攻咽喉疼痛及喉痺妨悶

苦梗一兩

甘草二兩

右每服二錢。水煎。此又一方也。

玉龍散

人中白一錢

煨硼砂一錢

竹

蜂四隻在竹內
黑色者是也

青黛五分

元明粉一錢

川連一錢

山豆根一錢

共爲細末。取少許以銅管吹之。

金鑰匙

治喉閉纏喉風痰涎
壅塞或者水漿難

焰硝一兩

硼砂五錢

腦子一字

僵蠶一錢

雄黃二錢

各另爲末和勻。以竹管吹患處。痰涎即出。如痰雖出。咽喉仍不消。急針患處。去惡血。

頰車開不能合

用皂角末吹其鼻。嚏出自合。

下頰落

含烏梅一個即上。

舌蕈生舌上出血不止即不救

五倍子炙研錢一

烏梅去核炙研一錢 銅錄三分

共研細末。搽蕈上。小膏蓋住。日換一次。愈後乃止。

上疳瘡口中爛方

舊土牆上白螺獅殼。不拘多少。用水洗去泥沙。燒灰存性。香油調末搽之數次即愈。若牙關齮腫爛口閉者。用皂角末吹之即開。

上疳方上疳者喉疳牙疳口疳瘡等症也同用此方

輕粉一錢 硃砂半錢 冰片二分

共研細末。吹入口內。無有不效。臨吹先用薄荷湯。或茶漱口。愈後用銀花二錢。土茯苓五錢。甘草一錢。服數次。

消癰癰丸奇效方

元參蒸

牡

蠣微煨
醋碎

貝

母去心
各六兩

共爲末。蜜丸每服三錢。開水下。日二服。已潰者九製首烏研末。蜜丸。每服三錢。開水下。日二服。外以羊屎、杏仁各五錢。燒研細末。猪骨髓調搽。

又方

用鴨油調半夏末敷之。

舌下腫痛之類即重舌

蒲黃五錢

煎濃汁去渣。含口中數次極效。

舌下痰包

用無雜色的白馬糞。放新瓦上。焙乾研末。加頂上梅花冰片爲末。敷上立愈。

小舌生紅泡子與喉症不同

蛇床子二兩。罐內燒烟吸入喉中自消。

補斷舌法凡人偶含刀在口斷舌已垂落而未斷者用雞蛋內白軟皮套住另以

天花粉三兩

赤芍二兩

薑黃

白芷各一兩

爲末。蜜調塗舌根以白蜜調白蜡稀稠得宜。敷在鷄蛋皮上。口敷數次。三日舌自接住。去蛋皮。再用蜜蜡勤敷七日。如跌撲穿斷舌心。血出不止。以鵝翎蘸米泔頻刷斷處。其血卽止。或用瘦猪肉片貼之。仍用蒲黃、杏仁、硼砂少許爲末。蜜調成膏。噙化而安。

又方

活蟹壹個。炙乾爲末。敷上卽能生肌。

又方

活蟹燒灰

乳香

沒藥各二錢

塗之即生肉。如咬去脣舌。用川烏、草烏爲末。攤紙一條。以涼水調合貼之。即不覺痛。宜預製備急。

治舌下腫痛欲死。

皂角二錢

瓦上焙紅研末。好醋調敷即愈。

又方

醋調百草霜。柴灶內的。敷舌上下數次效。加鹽。用井水調塗更佳。

重舌鵝喉

川連

雄黃各四分

冰片二分

共研末吹入。

喉風舌大如脬。不急救卽死。

冰片一分

火硝三分

青黛二分

膽礬二分

殭蠶五分

硼砂三分

共爲末吹之。

舌腫四方

皂角不拘多少。以新瓦火煨至紅色。放地候冷。研細。將病人用鐵鉗拘開牙齒。以藥末搽其舌上卽活。

又方 百草霜和酒塗舌下。

又方 用生蒲黃研末搽之。

又方 用鷄冠血塗舌上咽下卽消。

喉疔形似靴釘但差長耳先以小刀刺點腫用

紫袍散吹之。再服加味甘桔湯。加鮮菊花一兩。用根亦可。若不能刺。以冰硼散箸頭蘸點六七次。再吹藥。服藥亦效。

舌忽縮入

銀針刺破舌尖。出盡惡血。以蠟燭油搽之即愈。

舌硬生衣

犀牛黃

硃砂各一分

玄精石二兩

共研細末。將舌尖刺出紫血。用此藥搽之即愈。

舌下重生小舌

舌根肉壅腫疊出。短小如舌者是。用黃柏和竹瀝泡一夜。取汁點之。

又方

巴豆半粒、飯四五粒、共搗爛爲餅。如黃豆大。貼在印堂中。待四圍起泡。去之即

愈。各項舌病皆效。

木舌

舌尖腫大。塞滿口中。直硬如木。不能轉動者是。用葶藶子肉搗爛。以紙取油將紙搓條。點火吹滅。以烟向舌熏之即消。若舌下腫起。用銀針挑破出血。以鍋墨烟。以燒草者更佳。以麻油厚調敷之。脫去再敷。或用水調敷亦可。

又方 蒲黃研末。時敷舌上。其腫自消。

又方 殭蠶爲末。吹入。吐痰甚效。

舌忽腫大腫硬即時氣絕名曰嬰舌

用皂礬同上舌腫四方並治。

舌上生菌

此惡症也初起如豆漸大如菌疼痛紅爛無皮朝輕暮重由心脾熱毒所致

硼砂

人中白各五

瓦上青苔

瓦松

塘雞糞錢各一

用傾銀罐子二個。將藥裝入封固。外用鹽泥封好。以炭火煨紅。待三炷香爲度。候冷開罐取出。入頂上梅花冰片、麝香各一分。共研細末。臨用時先以磁針刺破血菌。用藥少許點之。再以蒲黃末蓋之。內服二陳湯。加黃連、黃芩、薄荷煎服。

舌腫破爛

黃連

黃柏各五分

青黛水飛一錢

冰片一錢

焙乾爲末。每用三分。吹之自愈。

重舌脹腫重舌木舌皆屬心火

用川連末一錢。燈草湯下。二服效。

又方 治重舌脹。用鐵鍋燒紅。打下鏽。研末。水調噙之。

牙部

牙癰

此症發在牙關、牙床。結核已成。或左或右。耳底有痛。接上下左右照經絡治之。有腫要外敷。切忌齒落。落則不治。

牙疔

此症起於牙脚下。生有黑點。是腎經發來之毒。宜先用黃連消毒散。後用磁陰降火等藥治之。外用硼砂、石膏、甘草共研細末。擦之即愈。

牙疳

此症起在牙床。名走馬牙疳。最忌齒落。落即不治。宜依上經絡治之。內擦以玉龍散。或冰硼散。

牙瀉即牙根流血。草決明煎水。含數次即愈。

又方 苦參、枯礬、各等分爲末。擦牙即效。

治牙痛不可忍 火硝、硼砂、冰片。共爲末。擦患處卽愈。

治牙痛方 上好真清花肉桂切薄片。每用一分。嚼患處。立刻止痛。如桂不佳者。嚼之增痛。

玉帶膏

生真龍骨二兩 宮粉五錢兩 頂上大梅片五錢麝香五錢

淨黃蟬二兩 真硼砂五錢 陳黃蠟

將上五味。研細末和勻聽用。先將黃蠟隔湯化溶。入前藥末攪勻。用棉紙將藥傾上。用竹刀刮勻。剪作一小指寬。一寸長。收貯磁瓶內。封固聽用。

治各種牙痛妙方

隔夜濃茶。每早起以之漱口。永無牙患。

金星追涎丹 治風火牙痛並治蟲方。

薄荷一兩 川椒五錢 細辛一兩 樟腦一兩
共研細末。放銅鍋內。上以磁碗一個蓋之。文武火煉取霜用。

苦瓜霜

火硝二錢

青黛五錢

栳榔衣煨黑

共研末。先將大苦瓜一個。蒂旁切落一片。納藥於內。挂當風處。俟皮上起白霜。取貯聽用。

牙齒疼痛方

秋絲瓜藤一兩

槐花三錢

薄荷五分

細辛八分

淨水煎濃汁。含嗽四五次效。

治牙痛奇妙極效方

好汾酒一小茶杯。入花椒一撮。用火點着。俟燒至一半。將火吹息。略候半刻。乘

火熱含於口內。立即吐出。其患立愈。

治牙出血方

生	地	三錢	元	參	三錢	麥	冬	五錢	白	芍	五錢
女	貞	三錢	丹	皮	五錢	澤	瀉	一錢	知	母	五錢
鹽	柏	五錢	碎	補	五錢	連	翹	五錢	沙	參	三錢
生	甘	一錢									

如陰虛火旺出血。將方內沙參、黃柏二味除却。加熟地五錢、釵斛一錢五分、洋參三錢。服之立效。

治牙出血有頭痛潮熱方

生	地	三錢	元	參	三錢	麥	冬	五錢	山	藥	五錢
女	貞	三錢	丹	皮	錢半	澤	瀉	一錢	知	母	錢半

鹽 柏分半

北沙參五分錢

銀柴胡八分

連翹錢半

碎 補錢半

石 膏二錢

牛 蒡錢半

生 甘一錢

共煎水服效。

蟲牙作痛 五焙子煎濃汁。含嗽數次。其蟲立死。

治蟲牙方

生田雞去皮。含在患處。另以清水一大碗。放在桌上。良久俟口涎流出。吐在碗中。可於水內觀蟲。大小均見。如此數次。永無此患。

治齒長數寸

真白朮人乳拌蒸。服之愈。

治牙齒長出分餘 用生地黃含之最妙。

治走馬疳 此症口臭牙上爛流涎。脣下如羊鬚。

生大黃三錢

丁香十粒

萊豆一錢

共研末。熱醋敷兩足心最效。若兼以真珍珠吹之更妙。

治走馬疳

人中白二兩煨紅

兒茶一兩

黃柏六錢

南薄荷六錢

真青黛六錢

大梅片三錢

研末。先用溫湯嗽洗。吹藥患處數次。內服銀柴胡、煨蘆薈、胡黃連、川連、牛蒡子炒、元參、桔梗、山梔子、熟石膏、薄荷、羚羊角各五分。水二鍾煎服。

治牙疳妙方

鹹馬腎子。並水含後吐却。再服水一鍾即愈。

擦牙關兼去口中氣味

大黃五錢

甘杜

香附去毛製

白芷

生石膏錢各五

真川椒

荖豆各四十粒

細辛三錢

青菓核十顆入

淮鹽過入兩火燉用牙

灰晒乾

共研細末。過絹篩。罐貯。每日清晨以之擦牙。不但永無齒疾。且可白如冠玉。

取齒妙方

活鯽魚一條。重拾兩。以白砒一錢入腹內。放無風無貓無犬處。七日魚身發白色。用雞翎拂毛。以少許膏藥收之。每遇病牙。取少取膏藥貼齒片刻。牙即落下。

脫牙 白馬肉埋地內俟生蟲。取出燉灰。點牙即落。

牙痛奇方 蠟梅花熬水含之愈。

又方 檬果皮煲黑醋含之愈。

治各種牙痛經驗神方


寬筋藤入分切

連壳雞蛋一隻

用山水兩大碗。煮數百滾。將蛋去壳。再煮至蛋極老。去蛋及藤服之。其痛立止。
又方

用生小蛤一隻。剖開去皮。並頭足洗淨。遍蘸雄黃末。將蛤敷上患處。合口含住。
俟覺腥悶難忍。然後將口涎吐出。其牙蟲隨涎出。再含再吐。以痛止蟲盡為度。

少商穴圖式 左右皆同




刺少商穴法

穴在手大指內側。去爪甲如韭菜葉。刺入二分許。以手自臂勒至刺處。出血卽消。若重者。及膿成者。必須針患處。否則不治也。

附骨腰符咒

第一句開天門。第二句閉地戶。第三句留人門。第四句塞鬼道。第五句穿鬼心。第六句破鬼肚。吾奉太上老君急急如律令。



左手持杯。用香爐鼎手指盛杯。杯內載茶。用右手劍訣。面向東方。以畫第一畫。念開天門。第二畫念閉地戶。第三畫念留人門。第四畫念塞鬼道。第五畫念穿鬼心。第六畫念破鬼肚。吾奉太上老君急急如律令。

附治鴉片煙飲奇效方

服此方者。一面吸煙。一面服藥。至八日十日後。則可早可晏。可多可少。可吸可不吸。妙在不用劫藥。不用煙灰。其飲自化。應驗多多。爰序於左。

鴉片煙流毒內地。受害良多。其中亦有急思改悔者。又莫得其方。市肆中藥。於字義尙未辨明。何能奏效。縱有一二截止者。類皆劫劑。伐脾戕胃。貽害多端。譬諸作文。安有講書未明。而妄期佳構者乎。卽如字義。世俗稱癮者。乃皮裏肉外之紅點。何得指爲斯證。又稱引字。究屬何根。方爲引動。模糊圖治。奚克見功。不知所謂飲者。乃飲食之飲。卽醫書所論痰飲證也。夫濁者爲痰。清者爲飲。此理易知。治斯證者。總以滌飲化痰爲主。或問此證。何由而生。予曰。凡人酣吸多。則動脾家之溼。溼則生痰。蓋脾爲生痰之源。肺爲藏痰之器。故此證總在脾肺二經。或又問曰。旣係吸多生飲。何以吸之。又名曰過飲。予曰。煙乃通活之性。痰係周身上下無所不至。

一經土壅。則或淚流。或汗出。或背脹。或欠伸。或嘔吐。或心慌。皆痰之爲患。驟得煙以通活。則痰食頓開。而諸證悉平。斯謂之過飲。客爲首肯。不勝欣然焉。予曰。憫斯人之沈疴。亟思拯救。乃細揣各名家書。體會數年。始得其訣。故特創一方。藥品冲和。純乎王道。俾戒飲者自製。不著絲毫煙灰。自能奏效。十餘年來。獲益者不可枚舉。因刊以公諸同好。惟願普世共渡慈航。回頭是岸云。

廣橘紅白礬炒

製半夏四兩

川椒七錢

炙甘草三兩

天南星五錢

訶子一兩

白芥子八錢

塊雲苓四兩

共研細末。薑水泛爲丸。桐子大。每日飯後一時之久。以白滾水吞下三錢。日二次。服至八天以後。自然見功。奇效無比。

同治二年癸亥仲秋月上浣

湖北黃岡屠燮臣製方付梓

右係桂林蔣小峰。於屠燮臣名道和輯刊醫學六種之普濟良方內。摘錄轉傳。

歷用經驗。南豐趙獻卿。吸烟已十八年。日需烟六錢。戊寅秋服是方。旬日痰少。烟減。或偶多吸。卽行醉嘔。平昔每吸必二十口。乃過飲。服藥兩旬。每吸五口。卽得矣。遂接服戒卻。而痰盡面豐。飲食倍常。精神甚健。足徵是方之果有益也。因捐貲梓印。以廣其傳。願得之者。或堅信自服。或轉傳濟人。切勿疑怠。則功德無量矣。再者如服是方。雖可一面吸烟。然須心存力戒。不可恃服藥而任意多吸。乃有益也。

附急救服毒良方

一、凡誤吞洋烟。急取廣東之木棉花絮。稱準四錢。用筆管夾之。燒灰存性。置茶碗中。再取食鹽。稱準二錢。碾碎同置茶碗中。開白水沖之。攪勻灌下。一刻間大吐黑水而愈。在胃則吐。在腸則瀉。毒多或久。則連服二三次。吐瀉卽愈。

一、凡誤服瀉水輕粉。一切毒物。急取木棉花絮六錢。燒灰碾碎沖服。不用食鹽。一

吐而愈。

一、凡毒痢藥力不治者。亦取木棉花絮六八錢。燒灰。用山楂一二錢。紅糖一二錢。煎服卽愈。

以上諸法。傳自江西。已活人數千。屢試屢驗。近年京都有吞洋烟者。亦用此法。全活多人。其應如響。伏願諸君子廣爲傳佈。則功德無量矣。

喉舌備要祕旨終

喉舌備要祕旨 附急救服毒良方

喉舌備要秘旨 附急救服毒良方

〔清〕包三鑣述

包氏喉證家寶

中國醫學大成

喉證家寶提要

清歸安包三鱣述。男巖。衡村編次。衡村先生與閩鄭君肖巖。餘姚徐君友丞。及炳章四人。二十年前。同研醫學。爲千里神交友也。今包鄭徐三君。俱歸道山。惟我獨存。猶得讀先生書。不覺憶起當年之情景。不禁感慨系之。是書原爲三鱣老先生所述。而編次增訂。多屬衡村手筆。其攻洞天一篇。尤非尋常。實救白喉忌表挾微之偏。爲有功於世之傑作。故列於首篇。次爲咽喉總論。先述其原。次辨證狀。次詳用藥。次別類證。後附吹藥驗方。及煎藥各方。又列咽喉七十二證考。編述簡當。洵喉科中切要之書。初學入門。尤不可不讀。

喉證家寶提要

包氏喉證家寶目錄

咽喉總論.....一

條目.....二

辨喉證.....九

附方.....一六

咽喉七十二證考.....二七

喉證家寶目錄

攻洞天

包巖

昔子與攻楊墨而吾道存。足見邪說橫流之世。不有人焉起而攻之。則正道漸滅。人命消亡。而醫學爲尤甚。光緒朝。有素未習醫之耐修子。忽託名洞天仙師作白喉忌表抉微一書。浸淫十餘年。流毒五六省。仲景云。咽喉乾燥者。不可發汗。蓋咽喉病。非手太陰肺。卽足少陰腎。是傷寒而見咽喉乾燥。是爲已入於裏。不可以大青龍湯發之也。指麻、桂、細辛也。非指荊、防、宣解之品也。奈何列入禁藥乎。其過一也。宜攻也。至於白纏喉風。旦發夕死。非針不活。而是書序言所載。某丁醫瞿然曰。此白纏喉也。是不識證也。其過二也。宜攻也。若夫白喉證。並不痛癢。並不寒熱。並不傳染。起居一如平人。飲食偶或不利。望之不紅不腫。病之經年累月。治之時發時愈。證屬陽衰火息。非附、桂不能療。奈何以時疫蘊毒之淡白喉風。強名之曰白

喉。名不正則言不順。其過三也。宜攻也。既係疫毒。非牛蒡不能解。非黃芩不能清。奈何指牛蒡爲通十二經。不可用也。指黃芩爲涼入細竅。不可用也。各家自不爲其搖惑。而庸夫俗子。則服膺其說。而使人入鬼錄矣。其過四也。宜攻也。其自製之養陰清肺湯。首三味。生地一兩。麥冬六錢。白芍四錢。似白喉下咽。永不轉紅。如陰疽之不轉紅。未有不爛死者。其過五也。宜攻也。夫淡白喉者。風蘊熱也。表之即愈。紫色喉者。伏氣喉痺也。紅色喉者。胃中毒火熾也。紅喉而細白點者。毒盛而有微生蟲也。故吾家世傳吹藥。必以鎗硝爲君。殺微生也。如是而吾父書。愈不可以不刊矣。蓋是書本吾家世守之祕本。不輕示人。今哀吾國上有長官。下及黎元。無不曰白喉忌表。甚至七十二喉證。概以白喉名之。使醫家坐視喉證之死。而不敢出方。是吾國之人。不患喉證則已。一患喉證。束手待斃而已。如宣統元年之喉疫。一家連喪數命者。不知凡幾。皆守白喉忌表挾微一書之誤也。非病之必死也。讀是

書者。每鯁鯁然曰。若當用正將也。若當用猛將也。若當用次將也。迨至大命已傾。將也何用。嗚呼。巧言如簧。顏之厚。死屍徧野。盈畎畝。誰無兄弟。誰無父母。誰無夫婦。誰無朋友。生靈荼毒。是誰之咎。白喉忌表。能斬人後。靜言思之。痛心疾首。吾特出吾家之寶。欲爲天下蒼生一援手。

喉證家寶攻洞天

四

包氏喉證家寶

清 歸安 包三鑣編述

鄞縣 曹炳章圈校

咽喉總論

咽喉。氣之呼吸。食之出入。乃人身之門戶也。其證雖繁。多歸於火。蓋少陰君火。少陽相火。二脈並絡於咽喉。君火勢緩。則熱結而爲疼。爲腫。相火勢急。則熱結而爲癰。爲痺。痺甚不通。而痰塞以死矣。經曰。一陰一陽結謂之痺。所謂一陰者。肝與心胞也。所謂一陽者。膽與三焦也。四經皆有相火。火者痰之本。痰者火之標。故言火則痰在其中矣。言喉則牙舌亦在其中矣。火有虛實。實火因過食煎炒。蘊積熱毒。

煩渴。二便閉塞。風痰上壅。將發喉痺。必先三日。胸膈不利。脈弦數。當去風痰。解熱毒。至於虛火。因飲酒則動脾火。忿怒則動肝火。色慾則動腎火。火炎上攻。咽喉乾燥。二便如常。少陰脈數。宜養陰降火。此治咽喉病之大綱也。今特進言其目。

條目

凡一二日腫痛。三四日勢定。第三日必發寒熱。或頭痛不止。用本醫士秋字藥。病即已。凡喉證之變。皆疏忽於第三日故也。

喉痺。屬熱。屬痰。屬風。風多者。吹本醫士碧玉散。痰多者。吹秋字藥。不速治。則痺鬱而兼熱毒。致發乳蛾等證。治法去風痰。解熱毒。開鬱。

單乳蛾。多因酒色鬱結而發。生於喉旁。或左或右。一日痛。二日紅腫。三日有形如細白星。發寒熱者凶。四日勢定。大約四五日可愈。用青藥五分。黃藥一分。後青三

黃二同吹。痰出盡後。再服煎劑微利之。大便去後當愈。

如至三日。看喉內但紅腫無細白星。卽爲癰證。若三日後紅退。但腫兩旁左右。卽爲雙乳蛾。然左屬心右屬肝。煎劑內左宜加黃連五分。製皂角七分。右宜加赤芍八分。柴胡六分。雙蛾兼用。如大便不通。加枳殼一錢。元明粉七分。連珠蛾者。二白星上下相連。又云狀如纏袋。用藥照前。雙乳蛾較單乳蛾重。連珠則尤重也。

喉癰證。因過食辛辣炙博厚味醇酒。感熱而發。屬肺經痛。喉證中無形跡。但喉腫而痛。重者亦發寒熱頭痛。四五日可愈。用青藥加黃藥少許。內服煎劑。及膏子藥。喉菌證。屬憂鬱血熱氣滯而發。婦人多患此。狀如浮萍。略高而厚。紫色。生在喉旁。初起用青藥五分。黃藥一分。後用青三黃二和吹。內服煎藥。不可間斷。亦難速愈。輕則半月餘。重則經年。治之得法則愈。要守忌戒口。

頸癰證。胸前紅腫。形在外。亦要內攻。甚則喉腫閉結。要出膿。外用三黃散敷。內用

青藥吹。并服煎劑。

面癰。與頸癰相仿。大抵屬鬱。

托腮癰。結熱而發。治法與頸癰同。

外敷三黃散方

生大黃一錢、生蒲黃五分、薑片五分、冰片五分、麝香二厘。爲末。蜜調。加葱汁二三匙。敷患處。或芭蕉汁。或扁柏汁。亦可。

撻舌證。舌下生如小舌者。若連喉腫痛。卽爲喉癰。不連喉痛。非癰也。肺熱性燥。感成熱毒所致。煎劑用犀角地黃湯加減。吹用黃藥。須至舌根兩旁。勤吹方速效。喉內用青十黃一頻吹。

喉閉。傷寒後見者難治。爲其閉氣不通。無形無聲故也。纏喉風證。因心中燥結而發。先兩日必胸膈氣緊。出氣短促。忽然咽喉腫痛。手足厥冷。頸如紋。轉結於內。腫

繞於外。且麻且痺。喉中紅絲繞緊。手指甲白色。手心壯熱。喉腫而大。風痰壅盛。如拽鋸之聲。是其候也。最爲急證。速吹服藥可愈。若遲過一日夜。目直視。喉中如雷鳴者。不治。再用燈火近患人口。卽滅者。不治。如喘急頭汗。危在旦夕矣。儻下藥。須加牛黃一錢。以上二證。十無一生。不可輕醫。

一凡傷寒後患連珠蛾及喉閉證。多不治。以其喉項強硬。目睛上視。皆死候也。

一凡患喉證。一二日不發寒熱尙輕。若三日發寒熱。證必加重。亦必問其大小便通塞。如通證必卽減。不過浮游之火。攻於咽喉耳。宜內服清熱解毒消風之藥。若二便不通。證必加重。內有毒火。非用降火消毒之劑。及通利二便之藥。火從何泄。病從何解乎。故證有輕重。治有緩急。并要問頭痛不痛。證雖甚凶。若發於外。而不見死證者。無妨。

一凡喉證須吹藥四五管。可以出痰。痰亦必去三次。方可愈。至出痰一管。藥內必

用黃藥爲要。吹時必須直對喉中。重重吹入乃效。吹過急提出管。恐痰涎湧出耳。
一凡喉證先碎。須用涼藥吹之。後用青藥。若欲出痰。單用黃藥。方能提去頑痰。初起一二日。用青藥。漸漸多加黃藥。熱甚黃藥爲君。

一凡喉證。大便去後。方去病痊。若猶閉結。不可輕許其愈。若無痰者。不治。

一凡患喉證。面發紅腫。白亮無神。脈沈微無力。是神氣外洩。無陽故也。證凶必死。若面發紅腫。脈大有力。證雖重不死。是有元氣。而火氣盛耳。

一凡喉刺痛。因患勞瘁既久。虛火上升。榮竭血盡。患此者。其喉上顎有紅腫。密密如蚊蟲狀。危篤將死之候也。

一凡喉連胸紅腫。此係肺癰證。必用蜜調膏子藥。及百藥煎。凡患緣豆癰。疑似之間

豆腥者是

一凡喉中無形。止紅腫者。宜多用燈草灰。乳蛾亦然。

一凡喉證初起。大便閉結。宜用生大黃、元明粉各一錢二分。微利之。則火自降而易愈。若至五六日。久不食。而大便閉結者。誤用立斃。蓋因病久。胃氣已虛。元氣亦弱。雖閉甚。宜蜜煎導而通之。

一凡喉證初起。內服解毒之劑。而兼發散之藥。則毒易愈。解毒必加牛蒡子、連翹之類。發散加紫蘇、葛根之類。及荆防。忌用桔梗。

一凡婦人喉證腫痛。有因經閉致火上升者。服通經藥三四劑。經通而證自愈。其證喉腫而色紅。

一凡喉證不可純用涼藥。取效目前。上熱未降。下寒復起。毒氣乘虛而入腹。胸前高腫。上喘下泄。手足指甲青黑。七日後全不進食。如魚口而死。

一治咽喉者。忌發汗。或針砭出血。卽汗之義也。其腎虛傷寒及蒂中喉內之喉花腫。尤忌針。如內傷虛損。咽中生瘡。語言失音者。死不治。

一凡舌下起五峰如蓮。名曰舌下蓮。止可針兩邊四峰。不可針中峰。誤針者死。

一凡舌腫脹滿口。吐舌在外者。用製過僵蠶。製過皂角。二味。爲細末。和勻用少許。吹入鼻中。男左女右。吹之。牙關自開。痰涎自吐。然後用箸捲絲綿。蘸甘草湯。潤舌脣。後用黃藥多加冰片。頻吹。

一凡腮以內腫爛。用箸扎絲綿蘸水。輕攪患處。病者即愈。若不知痛。此係死肉。多難愈。

一凡舌腫大。用生蒲黃末加冰片敷之。欲止血。用炒蒲黃。

一凡撻舌喉癰二證。大便不通。煎劑內加生大黃、元明粉各一錢二分。此微利法。亦抽熱下行法。不可用承氣湯。變成攻下。流弊滋多。小便不通者。調六一散服之。效。

一凡喉舌等證。初起吹藥一次。即令患者低頭開口。漏出痰涎粘唾者。易愈。吹藥

無涎者不治。

辨喉證

喉證初起。一寒戰而生者。發後身涼。口不碎。又無重舌。或二便俱利。不要認作熱證。皆由陽虛寒冷而發也。其痰不可提盡。此痰即身內之精神所化。與牙關緊乳蛾。擡舌之痰。毒種一氣。必流盡毒而愈者不同。若一流盡。則精神竭而必死。先以藥吹之。或以水漱之法。使一通便服藥。初劑發散和解。二劑即用溫補滋養。設三四日後。再發寒戰。或心痛、脇痛、骨痛等證。死不治。

發時牙關緊急。喉舌俱脹。口碎而臭。或有重舌。或舌上有黃屑屑者。發後。下午再發微寒熱。大小便閉結者。即作熱證。用石膏敗毒散主之。證亦易愈。如漸起之證。三四日後而發寒熱者。雖凶不害。惟有證未減。而牙關反不緊急。脣不腫。而如好

人者。不治。舌腫滿口者。不治。色如蒲桃。茄子。如砂紙者。不治。或連重舌。發寒熱。猶可治也。

重舌。捺之色雪白。捺舌一起。卽紫色。或紅色。此身內氣血已死。然口臭者。猶可望生。最忌口渴氣急。痰多而稠。如桃膠者。死期甚速。一頸全紅腫者。亦極危也。面紅帶紫。面青帶白。神氣少者。俱不治。不語者死。略能語者。尙有生機。面色少神氣。而好坐低處者。亦難治。喉內之喉花。爲帝中。性命所關。舌下紫筋。爲舌系。通於腎。白腫不治。傷之卽死。亦性命所關也。

舌癰證。舌紅腫大。屬心經火盛。地角亦紅腫。吹藥用青黃各半。吹至舌根。煎劑多用黃連、山梔、犀角。

木舌證。生舌根下。狀如白棗。有青紫筋者。不能速愈。半月方痊。如初起。不作痛。不發寒熱。漸漸腫大。起發愈遲。則愈難痊。皆因憂鬱而起。內服煎藥。外用青藥加黃

藥。初時或青黃兼用。後單用黃藥者。又有一種。舌腫輒不能舉動者。亦名木舌。治法同。舌下又生舌。名曰重舌。或腫面腫腮。先在外見。但有膿處。即用利刀出血。次針舌下兩邊青筋出血。宜早治。遲則爛下舌根而死矣。

舌菌證。屬心經。多因氣鬱而生。生於舌上。如菌狀。或如木耳。紅紫色。

紫舌脹證。屬心火。內必煩躁悶亂。單用青藥吹。內服犀角地黃湯。可漸愈。

懸癰。生於上顎。紫色泡。如豆大。用銀針挑破出血。涼藥吹之。

牙槽風證。初起先齒痛不已。後牙齦內浮腫。紫黑色。或出血。久則腐爛而臭。難速愈。

牙漏證。即前證久不愈。齒縫中出白膿。是也。極難調治。如上左邊門牙落者。不治。此證屬胃火腎虛。

搜牙床。此證初起。牙床必腫痛。當用拔針出其血。後用青鹽擦之。若屢用拔針。日

久骨自露者難治。

牙癰證。一名牙蜚風。牙齦腫病。毒盛成瘡。初起有小塊。生於牙齦肉上。或上或下。或內或外。其狀高鞭。若生泡。針出膿血而愈。鞭厚成疹狀者。施麻藥京墨如法割之。烙鐵燙過。自愈。

牙齧證。生牙盡處齧中。齒不能開。熱勢凶。至夜尤甚。然易愈。不害命。

牙撻證。屬胃火。如豆大。或內或外。無定處。

牙宣證。乃縫中出血。上屬脾。下屬胃。因陽明經實火上攻而出也。必有胃火虛動。腐爛牙齦。以致淡血常常滲漏也。

牙菌證。生牙齦。其狀紫花色。高起如菌狀。此乃血熱而兼氣滯也。

穿牙疔證。先二日牙痛。發寒熱。後痛不可忍。牙齦上發一塊紫色。是也。

穿牙毒。即前證。初起未破者疔。已破者毒。色紅者可治。青者死。

崩砂疳口風證。自舌下牙齦上腫赤。口內作焮。如渴熱。牙齦漸爛。亦能脫齒爲患。
連珠疳口風證。自舌下起小泡。初起一個又一個。甚者三五七八九。連珠而生。
魚風證。係危病。如魚吸水。故名。死不治。

走馬牙疳證。大人患者。卽微瘡毒攻。小兒患者。或因胎毒。或因痘後餘毒。齒齦腐爛成疳。殺人最速。鼻梁發紅點如珠者。不治。其色如乾醬。一日爛一分。二日爛一寸。故名走馬。言其速也。有齒者落盡而死矣。用黃藥吹。宜服蘆薈消疳飲。

牙疳五不治。口臭涎穢者。不治。黑腐脫爛者。不治。牙落無血者。不治。穿

腮破脣者。不治。用藥不效者。不治。

鵝口疳證。一名雪口。初生小兒。滿口連舌上生白屑。如鵝口樣。故名。

馬牙證。初生小兒。先受胎毒熱氣。出胎後受風。風熱相搏卽生。但看牙齦上有白色脆骨者。卽是。其初發也。出胎時卽打噴嚏。已冒外風。伏馬牙之根矣。若延至吮

乳時。尙不知覺察。病深且危。故不急治者。卽死。切勿誤認作黃丹之類。出胎時卽當看。日日更換。至三四日病卽成。五六日堅韌難治矣。甚有發而再發者。大約百日外。方免此患。

凡口疳黑腐而臭者。不治。小兒胎疳黃色如乾橘瓢者。不治。

凡小兒走馬牙疳。及大人骨槽風。須防落牙。至上門牙偏左一牙。是牙中之王。此牙一落。餘牙必落。最重難治。此牙不落。餘牙尙可治。

凡治口疳。須用棉花。或絲棉。捲在箸上。輕攪患處。然後吹藥。凡脣上疳難吹藥者。或蜜調。或溫水潤。再敷。

凡面上放光而色白者。不治。或放光而色紅者。可治。屢試屢驗。所謂放光者。面上綳急而放光也。

乳蛾。生喉間。形如乳頭。

凡針乳蛾。宜針頭尾。不可針中間。鮮血易治。黑血難治。凡使刀針。不可傷蒂丁及舌下根。懸癰。生上顎。如紫李。宜針破。腮癰。生腮下。先用吐法。再針紫黑處。去瘀血。喉癰。命門合相火也。如灌膿。卽以銀針挑破之。牙癰。腫痛。亦灌膿也。宜挑之。

喉瘤。生於喉旁。形如圓眼。血絲相裹。不可用刀針。極熟者。以筆針刺之。巖按用筆針法見喉科枕

喉入證辨。手少陰少陽二脈。並系喉。氣熱則內結腫脹。痺而不通則死。其不通之證有八。曰雙乳蛾。曰單乳蛾。曰雙閉喉。曰單閉喉。曰子舌脹。曰木舌脹。曰纏喉風。曰走馬喉閉。熱氣上行。故傳於喉之兩旁。向外作腫。以其形似。是謂乳蛾。一爲單。二爲雙。較乳蛾差小者。名閉喉。熱結舌下。復生一小舌。名子舌脹。熱結於舌中。而舌爲之腫。名木舌脹。木者。木強而不仁之謂。熱結於喉。腫繞於外。且麻且癢。且

腫且大者。名纏喉風。暴發暴死者。名走馬喉閉。此八者。皆屬諸火。微者鹹以軟之。甚者下以散之。至於走馬喉閉。生死在於反掌。急砭刺出血。病亦可愈。

咽喉屬於肺。有虛火實火之分。緊喉慢喉之證。虛火者。思慮過多。中氣不足。礙若蝦皮。刺如茅草。喘急多痰。不可誤投涼劑。實火者。縱飲恣意。積熱所致。甚者風痰上壅。咽門閉塞。滴水不入。聲音不出。此爲緊急喉風。用藥不及。惟針刺喉間。發舐毒血。次則拔髮咬指。吐痰嚙鼻。乃效。若夫癰、痺、蛾、者。皆標病。雖重無妨。凡喉閉不刺血。喉風不倒痰。喉癰不放膿。喉痺乳蛾不針烙。皆非法也。其有痰火勞嗽。咳傷咽喉者。坎水已竭。離火爲殃。雖存濟世之心。莫補回天之力。紅羊大劫。滿目瘡痍。吾子孫有挾吾術以濟世者。務必確守吾言。

附方

青藥 消痰、清熱、解毒、卻風。而藥性和緩。不若黃藥之消腫毒。開喉閉。出痰涎。最爲神爽。乃第一緊要藥也。但喉症初起。黃藥不可多用。以其直透入內。且善走散。初起驟多。恐證輕不勝。與病反不相入耳。凡製青藥。大約春夏宜薄荷多。製礬少。故配成青色。秋冬宜製礬多。薄荷少。故略帶白色。如欲喉證出痰。不妨加皂角末少許。惟遇喉癰及單乳蛾輕證。可單用取效。若他證。必兼用黃藥。乃能神應。然青黃兼用。須知先後多少。最爲要訣。

青藥方 治一切喉舌蛾癰等證。

每製礬三分。先配百草霜五厘。研細。入燈草灰五厘。再研。配成瓦灰色。後加粉草末二分。薄荷二分。再研細。入冰片五厘。此藥須用時配合。多日則無效。陰雨止可用一日。如吹喉證。欲其出痰。加殭蠶、皂角末。各三四厘。然青藥惟遇單乳蛾喉癰等輕證。可單用。若他證。必兼用黃藥。

製礬法 生明礬研極細末。入傾銀罐內。先放大半罐。且止。將罐入爐火內。用桴炭火煅鎔。以銅箸攪無礬塊爲度。乃將鎔硝研細末。投入礬內約十分之五。次將白礬砂研。投入礬內。亦十分之五。少頃。再投礬末。逐漸投下。候礬盡化。照前投硝、礬少許。如此逐層漸漸投盡。直待礬涼。啓罐口如饅頭樣。方架起炭火。燒至礬枯。用新瓦一片蓋罐上一點鐘。取起。將牛黃少許。研末。用水五六匙調和。勻灑礬上。將罐仍入火內烘乾。取起。連罐覆淨地上。先用紙襯地。方合罐。罐上覆以碗。過七日夜取起。收貯聽用。須輕鬆無豎紋者佳。煅時火候。宜初起緩。亦不可太緩。恐礬僵。則不鎔化矣。化後用文武火。如礬未化盡。卽下硝、礬。必不能鎔。而堅實有豎紋矣。其罐擇未傾銀者用。必先放火上烘熱。亦不可放炭火上。使溫氣入罐。

取百草霜法 須取其近鍋底者。若鍋底心及鍋口者。俱不用。先輕輕刮去上面

一層。輕取中一層用之。著底者亦不用。

黃藥方 善能消腫出痰。治一切口舌等證。

製鎗硝一錢八分。生蒲黃研極細末四分。製殭蠶末一分。製皂角末一分五厘。將前藥研勻。如淡鵝黃色爲度。再加冰片一分。再研勻。冰片一味。須細淨研入。如遇牙齦擗舌穿牙疔等毒證。專用此藥治之。如咽喉等證。兼用青藥。看病之輕重。爲藥之多寡。重者加入牛黃。喉證及纏喉風。加殭蠶、皂角二末。餘證只用硝、黃二味可也。

製硝法 鎗硝用長白如牙而厚者。如硝一斤。用水八碗。入鍋內煎至六碗。取起。入尖底敞口砂盆。將竹片三枝做品字。放盆內。過一宿。則硝自凝。卽於底提起竹枝。則硝自起矣。須十二月合。可以久用。過十二月。則味淡而性平。又方。用溫湯蘸過。以綿紙挹乾。仍用紙包。放竈上洞內五六日。收去濕氣。俟白如霜。方

可用。儻急用。不及製炒亦可。

製殭蠶法 殭蠶。細直腹小爲雄。粗彎腹大爲雌。宜用雄者。須將牙刷刷去灰砂。置瓦上。慢火炙至醬色爲度。又要折斷中無相連爲佳。

製皂角法 取堅小不蛀者爲佳。瓦上炙至色光明而脆爲度。去兩頭。爲末。聽用。

製百藥煎法 五倍子一斤。研末。細兒茶一兩。酵頭四兩。先用水二碗。煎茶。取濃汁半碗。拌勻五倍子末。及發酵。置盆內。蓋口。外用粗糠上下四圍蓋緊。至六七日發起。則如麵矣。收起做成餅。曬乾爲末。此方失去全一

製青梅法 用大青梅一斤打碎。入明礬末半斤拌勻。置陽城罐內。火煨。至礬枯爲度。取起。置地上出火氣。聽用。

開牙關法 如喉證牙關緊閉而不開者。先用銀針刺兩手大指少商穴。大指裏側離指甲韭菜葉許。搗之。取出。再用烏梅擦牙上下。然後用殭蠶、皂角末吹鼻內。打

甲韭菜葉許搗之取出再用烏梅擦牙上下然後用殭蠶皂角末吹鼻內打

噴嚏。即開口矣。此不傳之秘法也。隨即吹黃藥三次。以青藥善其後。

蒲黃當用生。研細。羅篩篩過。取極細黃末聽用。若粗而褐色者。不堪用。

喉證煎藥主方

大力子一錢炒研

連翹君七分

桔梗一錢

生甘草三分

銀花七分

元參八分

黑山梔七分

黃芩七分

花粉八分

前胡一錢

薄荷八分

水煎服。如發寒熱。加荊防。頭痛加煨石膏。胸悶加炒枳殼。如鬱熱而發。加赤芍。川貝母。口渴加知母。麥冬。

舌證煎藥主方

川黃連君八分

黑山梔一錢

犀角七分

生地八分

丹皮八分

赤芍八分

麥冬八分

生甘草三分

燈草心二十根

煎服。如兼脣口。加煨石膏八分。以瀉脾火。以環脣屬脾也。惟舌屬心。故專主瀉心火。如有鬱熱兼有痰。加川貝母七分。不拘咽喉牙舌證。凡大便不通者。加炒枳殼、元明粉各八分。

牙證煎藥主方

黑山梔錢君一

元參錢君一

丹皮

生地

黃柏

知母

酒白芍

地骨皮

車前子各七分

熱甚加煨石膏八分。炒黑升麻七分。風加荊芥穗八分。虛加熟地一錢。枸杞子七分。如餘毒。加連翹八分。黃連七分。若穿牙疔毒。則用消腫解毒之劑。如紫花地丁、甘菊花之類。總之齒乃腎之標。骨之餘。足陽明胃經之脈。貫絡於齒上齦。

手陽明大腸經之脈。貫絡於齒下齦。其在外感者。屬二經之風熱。與二經之受風寒停留而化熱者。居多。其在內傷者。屬腎熱。亦有腎虛。

三十六證咽喉解毒湯

元參

木通

淡竹葉

生地

生山梔等分

燈草心二十根

水煎。將好時。加入生大黃四錢。朴硝二錢。水泡去渣。滾二三沸。溫服。或將朴硝沖服。更妙。蓋咽喉是毒證。此解毒法也。如挾風痰熱毒攻心。言語狂妄。加三黃。并研硃砂、珍珠末服。

涼藥方 專治喉癰喉菌等證。

薄荷一錢

製 硝八分

製 礬八分

百草霜一分

燈草灰一分

川貝母一分

生甘草一分

冰片三厘

先將硝、礬、百草霜研勻後。入燈草灰。再研。入薄荷、貝母、甘草末。再研末。後加入冰片研細。用上白蜜調如青灰色。時時噙嚥。若重證多用黃藥涼藥吹。

疳藥方

煨人中白 四錢

生蒲黃 研三錢

燈草灰 一錢

硼砂 三錢 臨用拌入

生甘草 二錢

青梅製礬 五錢 初用多 後用漸減

薄荷 五錢

黃柏 五錢

此方失去上一半。製法不全。

蘆薈消疳飲 凡走馬牙疳。其患多在痧痘後。餘毒未清。又兼雜證。熱甚而成者。如牙齦作爛。且臭且黑且腐。甚者牙齦脫落。齦窠亦朽。不數日間。即穿腮破脣。爲不治矣。宜用此湯。外用人中白或冰硼散二藥搽之。取去黑肉。內見紅肉。血流爲吉。如取時頑肉不脫。腐肉漸開。焮腫外發。臭味不止。更兼身熱不退。俱不

治。凡小兒走馬牙疳。身熱氣粗。牙齦腐臭。以及穿腮破唇者。並須服之。

蘆薈

銀胡

黃連

大力子

元參

桔梗

山梔

石膏

薄荷各五分

羚羊角三分

淡竹葉三分

人中白散

煨人中白二兩

兒茶一兩

黃柏

薄荷

青黛各六分

冰片

共研細末。先用溫水漱口後吹藥。每日六七次。涎從外流者吉。涎收入裏者毒甚凶。

製百藥煎法 與前法互異。今並存之。

川五倍半斤打碎。煎數滾。入陳松蘿茶四兩。加大力子不拘分兩。同煎。去渣再

煎。用粉兒茶二兩。百草霜二兩。研末收。

治一切牙口疳

人中白煨六錢

青黛二錢

冬桑葉二錢

漿梅條皮三錢帶殼成

炭

燈草灰三錢

冰片一錢

以上共研末吹之。

鐵鞋散 治走馬牙疳。黑棗一枚。去核。入雄黃末填滿。用鹽搓麻線紮緊。外用濕

紙包煨存性。研末搽之。

元明醋 治喉中痰涎壅塞。元明粉。好淡米醋和。灌攪吐痰。

烏龍散 治纏喉風。牙皂七條。水一杯。煎三分。入人乳三滴。冷服。非吐即瀉。虛

喉忌。

神品散 喉風喉蛾兼治。

牙 皂

白 礬

黃 連等分

皂、連入礬內。同炙乾。研末吹上。有痰任流。

咽喉七十二證考

一 鎖喉風。熱痰生自胃膈。喉中如鎖管狀。雙者難治。先探吐風痰。針刺出黃白水。不治。如咬牙。吹通關散。

二 纏喉風。屬痰熱。白爲白纏。黃爲黃纏。腫噤難言。腮頰亦兼腫。眼白、耳赤、面紫、腫連項下。如蛇蟠狀。一二日者慢風。急者旦夕死。先刺少商探風痰。鼻有青黑。氣寒頭低。痰如膠者。不治。

三 喉風。壅塞痰涎。腫痛。面黑、聲雷、頸腫者。不治。

四 瘰癧肉喉風。因受汗穢氣及風熱。喉生赤肉。層疊漸腫。孔出臭氣者。不過三日

死。

五 啞瘡喉風。屬風痰。牙緊吐涎。口不能言。蟾酥化水滴鼻中。卽開。看喉赤腫處。下刀吹藥。面紫、舌青黑、鼻冷涕、爪甲青、目赤圓。不治。

六 弄舌喉風。不言。舌常吐出。將手弄舌是也。刺少商出血。內服疏風甘桔湯。

生甘草

桔梗

歸尾

花粉

山梔

甘葛

元參

荆芥

川芎

連翹

人參

枳殼

茯苓

陳皮

防風

黃連

七 噎食喉風。心經熱毒。咽燥無痰。氣喘。如心肺間刺痛者。當歸連翹散加大黃利之。如久。變飛絲勞。傷命。

當歸連翹散

當歸

連翹

生甘草

桔梗

生地

前胡

枳殼

黃芩

元參

生白芍

生山梔

花粉

燈草水煎服。

八 纏舌喉風。下頰俱腫。口噤。舌捲腫大。上有青筋如蚓。生黃刺。白苔。如咬牙。刺少商。

九 走馬喉風。厚味風熱。搖頭。咬牙。舌黑。蒂丁赤破。俱死。或左右臉紫腫。或牙關紫腫。或舌卷。針少許。兼刺舌下三穴。舌不卷。不針。

十 頂舌喉風。喉腮下腫。舌卷。鞭。頂上顎。遲即死。刺少商。針玉液金津。

十一 落架風。落下下頰。日久難治。服補中益氣湯。灸頰車七壯。

十二 連珠喉風。舌下生珠。初見一二。少頃蔓生。三五七九。舌脹痰生。先探痰。

十三 松子喉風。色如猪肝。腫起。形如松子。滿喉皆赤。氣逆、關閉、不食。刺腫處。吹藥宜去痰。服藥宜三黃、石膏、竹葉。加荊防。

十四 骨槽風。耳下牙關緊痛。略有小核。寒熱如瘧。大人由於七情。小兒本於稟賦。

十五 脚跟喉風。七情鬱結。先從脚跟發起。至於喉間。或一年半年一發。一日行一穴。七日行七穴。行至喉間。發泡。如魚泡狀。荊防敗毒散主之。泡水腥穢者。死。

十六 懸蜚風。一名懸蜚。一名蠱毒。因上焦蘊熱風痰而起。上顎腫垂。形如蛙腹。或似雞蛋。喉閉痰滿。以刀刺去紫血。內服三黃涼膈散。

十七 陰毒喉風。少陰證。脈微細沈。自汗、咽疼、下利。一名腎傷寒。切不可用寒藥。宜半夏桂枝湯、苦酒湯之類。臟寒咽痛者。用蜜附子。

十八 撮口喉風。脣收如袋。口不能飲。有痰壅塞。經年一發。馬齒莧煎洗脣。元明

醋探去痰。針少商見血。此證胃有痰火。

十九 喉痺。腫痛而黃。其血黑。形如臂。其腫若坎。面赤。目上視。先探痰。腫不消。用刀去血。

二十 陰毒喉痺。感冬月陰濕火邪而起。喉間腫如紫李。微見黑色。惡寒。身熱。咽動振惕。腰疼。足冷。其血黑。腫鞭喉乾。不治。

二十一 酒毒喉痺。心脾之火。形如卵。鮮紅光亮。壅塞喉間。寒熱。頭痛。項強。腫刺血。內服粘子解毒湯加葛根。

二十二 卒然閉塞氣不通而死。名曰喉閉。三稜針刺手腕中紫筋上。或少商穴出血。

二十三 風熱喉痺。腫而紅紫。形若拳。目上視。壯熱惡寒。如音不高。宜潤肺藥。若外腫。敷金箍散。

川大黃穿心者更佳用紙浸溼重包爐火煨廁中一宿取出洗淨曬乾研末聽用一兩

五倍子醋炒黑三錢

白芷五錢

露蜂房蜜炙三錢

芙蓉葉曬乾二兩

羌活五錢

共研細末。磁瓶裝。每用蜜水調敷腫處周圍。中留一孔出毒氣。

巖按。外證紅腫亦能治。

二十四 雙乳蛾。在蒂丁兩旁。似乳頭。吞吐不利。

二十五 單乳蛾。或左或右。手足厭冷。頭目昏沈。如厥。短氣欲絕。吳茱萸末。米醋

調敷湧泉穴。

二十六 氣癰。喉閉。痰塞喉間。寒熱。分上中下三關。在下關難治。

二十七 死乳蛾。雙單緊靠蒂丁。不甚痛。飲食有礙。勞則痛。日久塞咽。漸漸氣悶。

喪命。於蛾上亂劃七八刀。令血出。吹藥。逐日如是。患平乃止。服三黃三陳。忌煎

炒雞魚牛羊犬肉生冷發物。

二十八 乳蛾核。兩邊如乳頭。天陰勞力氣惱。則頸外如繩扣緊。飲食不下。呼吸不利。年深成嫩骨。用刀割去。吹藥。

二十九 喉癰。滿喉白色。時醫每誤認白喉。分爛喉風癰。弱證喉癰。二證虛實不同。

三十 飛瘍。因怒。或中穢毒。喉間忽然腫脹。立刻轉大。喪命。吹藥去痰。內服粘子解毒湯加紅花、丹皮。勿動刀針。

三十一 風熱喉丹。鮮紅。久而赤紫。吹藥服藥。均重去痰。可用刀刮針刺見血。去熱毒。

三十二 喉疔。與單蛾相似。蛾圓大。疔長小。紅易紫難黑不治。

三十三 開花疔。形若開花。根下割去。吹藥。三黃涼膈煎服。紅易紫難黑不治。病原鼻滴汗於豆腐內。食自死禽獸肉。水缸內有米粒生毛。此三因。皆致喉中生

開花疔之原。


三十四 喉癰。厚味積熱。胃火上衝。生蒂丁旁。腫痛如蛾。蛾圓而小。癰塌而長。耳根腮下俱腫痛。牙疼。去血吹藥。服三黃。

三十五 雙單喉瘤。是肺熱。生喉旁。如圓眼。血絲相裹。不犯不痛。須日夜安息。以藥攻之。不可用刀點。麝二、連一、冰四。日頻吹。

三十六 喉癰。生雄尾中。初如梅核。在喉膈間。吐嚥不下。至三日。漸上喉間。刀刺後。吹冰硼。病由七情。服四七氣湯。

三十七 氣單。鬱結。靠舌根橫起紅紫色筋。先用大針蘸桐油燒紅。向舌橫筋上針七處。次將三小針紮品字樣。每大針孔上各針二次。連大針。共四十九針。如舌根腫。要灸外邊喉下橫三穴。口內出煙爲止。如不出煙。七壯止。內服三黃涼膈及二陳。

單氣
圖灸針



三十八 喉單。滿喉微腫而紅。針首尾出血。服三黃涼膈。

三十九 回食單。一名旬氣。一名梅核氣。氣鬱熱痰而生。喉兩邊兩鞭條。色紅爲旬氣。小舌下如豆大。爲梅核氣。若丁下無核。定在前舌根下。或左右中有青筋系在顎。或紫點如小豆。或在舌根上。青白色。如蜆肉。似桃膠。兩旁紅筋垂下者。

皆是。久則前心後背疼。噯氣。喉中若蟲行。梗噎氣阻。犯之卽痛。刀去血。吹藥。逐日如是。喉外灸一穴至五穴。口中出煙爲度。不出煙者。灸至九壯。

四十 氣子喉。喉間如珠。赤或紫白。犯之卽痛。受氣必發。日久則噤氣。挑破珠。出血。再吹藥。

四十一 七星瘡。是脾熱。上顎屬脾。生泡。似粟如珠。或黃或白。口中腥臭。手足怕冷。身惡寒。以布浸苦茶拭淨瘡上。再吹藥。戒酒色。

四十二 喉球。外感六氣。內傷七情。喉内生肉球。如圓眼大。根如線。五寸餘長。相連肺上。吐球出。方可飲食。手輕扯。痛徹心內。服益氣疏風湯。升麻、葛根、防風、紫蘇、桔梗、前胡、白芍、白蒺藜、生地、當歸、川芎、生甘草、黃芩、麥冬、連翹、青皮。水煎服。再用麝香二錢研。分二次水調服。或服麝香散三次。根化而愈。

四十三 喉疳風熱毒。滿喉臭爛。老年患者。難治。

四十四 口瘡。積熱。滿口生瘡黃白。

四十五 走馬牙疳。陽明溼毒。牙齦黑爛。脫落臭穢。頃刻沿開。穿腮破唇。走入喉中者不治。

四十六 珍珠毒。胎熱。舌上如珠。先赤紫。後白黃。疼痛。挑出血。苦茶拭淨。吹藥。內服三黃涼膈散。

四十七 懸癰。生上顎。形如紫李。垂下抵舌。口不能言。舌不能伸。頭不能低。鼻出紅涕。刺破癰頭出血。鹽湯漱淨。血吹藥。內服荊防敗毒散。

四十八 懸丁。火熱。蒂丁忽然紫腫下垂。或偏或下。吞吐不利。不可刀刺。宜吹藥。或用烏龍尾加鹽。炒筋頭點上。枕頭仰臥一時。

四十九 痰泡。痰飲乘火。凝注舌下。結成泡腫。綿軟不鞭。有妨言語。作痛。刀刺。流出黃痰共黃渣。捺淨。吹冰硼散。服二陳湯加芩、連、薄。

五十 重舌。下生小舌。久則大舌卷起疼痛。飲食不下。頰下腫。刺金玉二穴及小舌腫處出血。

五十一 蓮花鈿舌。舌下腫。痛生五峰。三峰者輕。七峰者重。宜針兩邊峰上。用刀刮破。出血吹藥。中峰勿針。

五十二 木舌。鞭如穿山甲。見人舌做一拳。憎寒壯熱。語言蹇澀。服黃連瀉心湯。刀點出血。刺金津玉液。

五十三 蜷舌。因酒毒勞心鬱氣。舌有四眼。眼中流血者。全證也。或二三眼。生舌中。或生兩旁。生七八眼者。難治。年老者不治。若有黑心者。大者用藥爛去。小者用刀針挑去。先用藥水洗淨。然後吹藥。內服三黃涼膈散。舌不柔軟。瘡不合口者。皆死。

五十四 脰舌。痰火犯心經。舌忽脹滿。軟如猪尿脰。不痛。流涎。妨言語。看舌下。如

有青瘡。如蟹眼。須挑破。出痰若雞蛋清。用溫湯漱淨。再吹冰、硼、元明粉。內服二陳。

五十五 重顎。舌上生瘡如楊梅。作事心煩。服甘桔湯、黃連解毒湯。有痰結成鞭核者。吹冰硼散。內服加味二陳湯。

五十六 雀舌。心膈蘊熱。生於舌畔。割去。吹生肌散。內服三黃涼膈散。

五十七 啞舌癰。牙齦盡處。兩邊生癰。口臭。吐涎。舌尖短大。未破者。針去血。吹藥。已成。內托。

五十八 卷舌癰。屬心經風熱。生舌下。或左。或右。或中。狀如圓眼。或似棗核。腫痛。害言語。舌卷紫鞭。刀點去血。吹藥。內服黃連瀉心湯。

五十九 死舌癰。熱毒。舌如白苔死色。如木舌。但木舌小鞭。此腫而白。刀刮去白皮。追風散加冰、麝、青皮、乾薑末。滿口擦之。腫甚。刺金玉出血。如五七日有膿。上

下針出膿。方愈。如放膿見黑血。刺治不轉色者。死。

六十 血衄。舌上如針孔。流血不止。屬心火。

六十一 舌上龜紋。由思慮煩甚。少睡所致。舌痛若無皮。淡白斑細點。甚者陷路龜紋。脈虛。不渴。四物湯加知柏。丹皮。肉桂。舌鞭。柏一兩。青黛三錢。桂一錢。冰二分吹。

六十二 牙癰。脾胃火大發。於牙齦生毒。如豆大。或如指大。紫腫鞭痛。頭項強痛。惡寒發熱。將針柄捺患處。軟者是頭。下刀出膿血。吹藥。

六十三 牙疔。食毒穢物。毒犯陽明。生牙縫中。牙齦上高腫突起。大痛連腮。破則流血。去血後。吹藥。服三黃涼膈。或千金內托。酌用。

六十四 牙宣。牙縫出血不止。上脾下胃。吐血痰至升斗者。難救。

六十五 兜腮癰。屬風熱溫毒。生腮下兩邊。或一邊。如口內腫。下刀去血。日久去

膿。初起時。頭痛寒熱。服荊防敗毒散。

六十六 面腮腫黑證。面黑向下腫。兩邊腮腫。喉中氣閉。用滾過熱水一盆。洗手足。見喉中出氣。針少商穴。有血可治。吹追風散於頰內。并牙盡處。

六十七 出汗生癰。同治。

六十八 傷寒八九日後喉中腫閉。熱入心脾。

六十九 陰瘡。生咽旁左右。風濕鬱結而成。煎炒炙搏所致。用滾過熱水。不時洗手足。內服二陳。

七十 喉腫。脾經大毒。因酒後行房。酒氣不流。聚結喉根。不速治。毒閉即死。先去痰涎吹藥。

七十一 鎖喉癰。心與小腸之火。發於聽會之端。注於懸膺之側。初如癰。不能飲食。閉塞難通。紅腫發熱。漸次潰膿。軟而脹痛者針之。初起外用蜒蚰、麝、冰杵敷。

內服當歸連翹散。內閉牛黃清心丸。日久千金內托散。

七十二 蝦蟆瘟。是傳染毒。兩目鼻面腫乃陽明。頭角兩耳腫屬少陽。

凡針家。須知舌下三筋。傷之出血不止。除三筋外。見有腫紫處。亦宜針出血。豈專

執金津玉液二穴哉。

按咽喉七十二種。有焦氏本、吳氏本、張氏本。證治各家不同。此與焦氏本大同小異。閱者須在異處著脈。尚有鐵厓道人咽喉七十二種。口齒七十二種。容俟續梓。

喉證家寶終

〔清〕

楊龍九

著

重訂囊秘喉書

中國醫學大成

重訂囊秘喉書提要

清楊龍九著。道光間陳坤培藏本。新陽王景華編訂。原書一卷。光緒壬寅冬以袖珍本刻印。常熟張汝偉於民國四年加以評點。增方六道。附刊於紹興醫藥學報。印刷無多。不久告罄。近已不可多得。原刊本凡上下兩卷。上卷首列診法三則。次列辨證二則。類證四十一條。治法一十九條。藥例一條。附治方四十條。下卷列醫方上四十有七。下三十有二。製藥十條。附錄方六條。增錄一束。其張氏增附之評語治案。皆有謬按二字以表明之。據張氏跋云。楊公之作是書也。苟無陳氏寶之。早已失傳。然無王君爲之釐定。俞君爲之刊刻。則是書也。亦仍歸於泯滅而已。炳章敢謂。苟無汝偉先生評點。即得光緒壬寅原刊本。雖傳勿彰。

囊秘喉書提要

張序

囊祕喉書一書。前年俞金門別駕刊刷送人。蓋欲使窮鄉僻壤之區。無醫可延者。得此書亦可以依症檢方。依方服藥。人人得以自治。其用心可謂至矣。自刊至今。十餘年矣。前印之書。早經送罄。版又遺散無存。謬思推前輩樂善好生之意。欲重行刊刻。以公諸世。無如才識譾陋。有志不逮。屢執筆而屢廢者矣。今逢紹興醫藥學會成立。發行報紙。且有古籍選刊一門。敢不貢獻以效采芹。苟能推此書而普及天下。則凡患喉症者。均可脫至險之途。而登仁壽之域。庶幾不負作者之初心。俞公印刷之本意。及余之推廣之素願也夫。是亦生民之幸福歟。爰述大概而爲之序。

中華民國四年歲次乙卯七月常熟張謇汝偉書於壽石居

囊秘喉書張序

俞序

吾邑陳巷。有陳任者。少任俠。道光季年。緣事成潼關。任子薇卿。念父遠戍。比長。習刀槩。二十餘年。獨身赴戍。所省父。尋遇赦得歸。任弟坤培。工擊刺。兼擅方伎。尤精於喉科。藥奇效。不輕傳其方。咸豐庚申。粵寇至。坤培率其子芝珊。拒賊於道。步橋旁。有偃柳臥河之半。坤培踞柳巔。賊來自高岸。舉鎗仰擊之。輒中其目。賊憤甚。銜盤蔽目。如牆而進。芝珊抱父走。坤培怒。揮芝珊去。獨迎戰。攢刃死。賊復醢而焚之。芝珊痛父死。誓復仇。在大壩橋殺賊百餘。一日復持刃。乘間連殺十三賊。承平三十年。挂刀於壁。每天陰月黑。刀環瑤然。血斑斑如拭。芝珊老而聾瞽。道當年殺賊事。怒氣猶勃勃。吾鄰嚴春巖子幼巖。壻其家。得書一冊。兒子承萊假以歸。覽之帙如掌。蠶眠細字。紙斷爛。則囊祕喉書也。是歲秋冬起喉症。次年春尤盛。間取其一二方。製藥施輒驗。思傳其書。而體例驕駁。方名詭異。囑新陽王君士翹。吾友蕭君中孚。釐定之。二君參考諸家。存精義而歸於馴雅。胡君鶴年。勸同人醵資付剞劂。至作是書者。爲楊龍九氏。近代莫舉其名。若無陳氏珍祕。則山巖屋壁。淪毀幾何。

囊祕喉書 俞序

又非僅楊氏書一端已也。

光緒二十八年十二月海虞俞養浩鍾鑾撰

凡例

- 一 是書原稿。本無凡例。茲特增入評註圈點。故列凡例。
- 一 是書雖爲喉科而設。實於溫病傷寒。均有關係。能於此書貫通悟徹。不惟可治喉症。一切外瘍虛實標本之意。均可悟出。
- 一 是書凡著眼處。必加圈點。以使閱者醒目。間有竊附鄙意及治案。必加一諤按。二字。以醒眉目。
- 一 是書共分兩卷。其體例悉遵其舊。篇末另附治喉秘方。皆係諤搜羅諸家之精萃。并深心研究而得。幸無以淺近而忽之。

甲寅年原曆八月海虞張諤附識

囊秘喉書凡例

訂重 囊祕喉書目錄

卷上

診法	一
論喉症當辨內外二因	一
論脈之部位及其現狀	二
論舌之部位及其所屬	二
辨症	三
咽喉症有虛實寒熱之不同及其治法論	三
論纏喉風不宜過用條	五
痰	五
類證	七

乳蛾	七
喉菌	八
蟻毒瘻	八
喉癰	八
塞喉風	九
喉癰	九
撻舌喉癰	九
纏喉風	一〇
喉刺	一〇
酒毒喉痺	一一
喉瘤	一一
喉肉球	一一

心出氣	二
喉百葉	二
牙槽風	二
牙漏	二
牙捶	二
牙宣	二
牙癰	三
牙菌	三
穿牙疔毒	三
走馬疳	四
小兒走馬疳	四
崩砂口疳風	四
舌癰	四
重舌	五

蟬舌	一五
連珠口疳風	一五
木舌	一五
蛾口	一六
馬牙	一六
懸癰	一六
松子風	一七
結毒	一七
紫舌脹	一七
舌菌	一七
帝中喉風	一七
頰癰	一七
蜂子毒	一八
面癰	一八

托腮癰	一八
治法	一八
藥例	二四
總論	二四
治雙單連珠乳蛾	二五
治喉癰	二五
治喉癰	二六
治喉菌	二六
治擗舌喉癰	二六
治纏喉風	二六
治酒毒喉	二七
治鑱喉風	二七
治喉瘤	二七
治喉肉球	二七

治心出氣	二八
治喉百葉	二八
治牙槽風	二八
治牙漏	二八
治牙齦癰	二九
治牙擗毒	二九
治牙宣	二九
治牙癰牙菌	二九
治穿牙疔毒	三〇
治舌癰	三〇
治木舌	三〇
治重舌	三〇
治舌出三寸不收	三〇
治舌縮無言	三一

治紫舌脹	三
治口舌嘴碎	三
治蟻毒瘰	三
治頭面托腮等癰	三
治上顎癰	三
治老幼走馬牙疳	三
治穿腮牙落之重疳	三
治舌喉結毒	三
治咽喉腫痛	三
治帝丁腫脹	三
治小兒螳螂子	三
治小兒雪口	三
治小兒馬牙	三
治諸骨鯁	三

卷下

治唇口破腫而硬	三
治諸癰堅硬不消	三
醫方論上	一
甘遂散	一
陰陽散	二
連砂散	三
散堅方	三
去腐方	四
鍾乳石散	四
柳仙散	五
螻蛄散	五
琥珀散	五

喉癰方	六
蝕鼻方	六
代針散	六
珍珠散	六
麝香散	七
開關散	七
熏鼻方	七
勝烟筒	八
山甲散	八
珠黃散	八
消標散	八
青靈丹	九
紫雪丹	九
礪砂散	一〇

固齒白玉膏	一〇
拔疔散	一
小薊散	一
牢牙散	一
加味硝黃散	一
七味殭蠶散	二
八味薄荷散	二
銅綠散	二
加味銅綠散	三
紅棗散	三
地骨皮散	三
白田螺散	四
人中白散	四
抹口方	四

牛黃益金散	一四
玉鑰匙	一四
喉癰神方	一五
喉風急救神方	一五
冰硼散	一五
爛喉痧方	一六
三黃散	一六
又方	一六
熊膽冰黃散	一七
柳黃散	一七
醫方論下	一七
上清丸	一七
噙化丸	一七
百草膏	一八

內托護心散	一八
又方	一九
清肺飲	一九
犀角地黃湯	一九
導赤散	一九
四物湯	二〇
六一散	二〇
蜜煎導法	二〇
瀉黃散	二〇
錢乙瀉黃散	二〇
清咽太平丸	二一
甘露飲	二一
黃連解毒湯	二一
涼膈散	二一

清胃散	二一
瀉白散	二一
涼肺湯	二二
消毒犀角飲	二二
玉液上清丸	二二
清咽訶子丸	二二
柏母丸	二二
柏花丸	二三
除瘡落菌膏	二三
利膈湯	二三
玉屑無憂散	二三
加味射干湯	二四
滋陰消痺湯	二四
清肺散火湯	二四

滋水開陰湯	二四
製藥	二五
製玉丹法	二五
製黑魚膽法	二五
製燈草灰法	二六
製巴豆法	二六
製蜒蚰梅法	二六
製琥珀法	二七
製指甲法	二七
製礪砂法	二七
製螻蛄法	二七
製煉鹽法	二八
附錄驗方	一
喉風奪命丹	一

囊秘喉書 目錄

黑吹藥方	一
製猪膽法	二
走馬疳方	二
救急破棺丹	二
王夢隱青龍白虎湯	三
增錄	一
石龍丹	二
珠燕南飛散	二
霹靂針	二
又方	三
馬培之先生柳華散	三
冰梅竹月丹	三

重訂
囊祕喉書

清

楊龍九著

新陽 王景華士翹編訂

常熟 張諤汝偉增評

鄞縣 曹赤電炳章圈點

卷上

診法

論喉症當辨內外二因

喉症切脈。須辨內外二因。內因。係房勞傷腎。鬱怒傷肝。或喜啖煎炒炙煿。熱傷肺胃。熬損陰津。逐漸而起。脈宜細數有力。忌乾濇。外因。感六淫之氣。邪客肺胃。痰火上壅。驟然而發。脈宜浮洪滑數。忌急促無神。結代沉伏者。不治。舌病脈當左寸大於右手。牙病脈當右關大於左手。正者為順。反者為逆。醫者須明辨治之。診脈合

症萬無一失。〔諤按 舌爲心苗。舌病。脈左寸大於右手者。心火熾而肺氣鬱也。牙爲骨餘。而齦屬脾胃。牙病。脈右關大於左手者。脾胃之熱戀而肝膽之氣不疎也。〕

論脈之部位及其現狀

夫脈有表裏定位。右手寸口。表手陽明大腸。〔傳道之官〕裏手太陰肺。〔相傳之官〕脈浮濇而短。右手關部。表足陽明胃。〔倉廩之官〕裏足太陰脾。〔諫議之官〕脈緩而散大。右手尺部。表手少陽三焦。〔決瀆之官〕裏手厥陰心包絡。命門。〔臣使之官〕脈緩而悠洋。左手寸口。表手太陽小腸。〔受盛之官〕裏手少陰心。〔君主之官〕脈悠洋緩散。左手關部。表足少陽膽。〔中正之官〕裏足厥陰肝。〔將軍之官〕脈沉而弦長。左手尺部。表足太陽膀胱。〔州都之官〕裏足少陰腎。〔作強之官〕脈虛細。〔女尺宜大〕三部之脈。呼吸四至爲平。反此則病。遲寒數熱。細緩虛寒。細數虛熱。脈位既定。乃審苗竅。〔諤按 此言診脈大端。簡而賅。要而明。若欲窮源溯洄。尤當博考羣書。方臻完善。〕

論舌之部位及其所屬

舌屬心。舌之中屬心。舌根亦屬心。舌之四圍屬脾。舌邊紅。屬心火。舌胎白寒黃熱。焦黃熱甚黑者熱極。若黑而潤爲假熱。喉之左右通舌根屬肝。小舌名帝丁屬胃。又屬腎。右喉屬肺胃。左咽屬肝心。右爲喉。左爲咽。口上顎屬胃。下顎屬脾。牙上齦屬胃。下齦屬脾。脣之屬與齦同。齒屬腎。上齒爲胃脈所經。下齒爲大腸脈所經。小腸三焦循心上入於咽。腎之脈循喉嚨。挾舌本。外兩耳垂下屬肝經。繞咽并耳後。清空之地亦屬肝經。喉花爲帝中（性命所關）舌下紫筋爲舌繫。下通於腎。（謬按。挾舌本下二句疑有誤。考內經腎之脈正者至舌本而盡。汪菴訂註謂絡於橫骨。終於會厭。未嘗走及兩耳。而肝之脈循喉嚨之後。上入頰頰連目系。上出額。與督脈會於顛。腎肝二經並非行於兩耳。惟足少陽膽正者下耳後。其支者從耳後入耳中。出走耳前。此是膽脈之誤。茲特訂正之。（是））

辨症

咽喉症有虛實寒熱之不同及其治法論

夫咽者。水穀之道路。喉者。呼吸之門戶。乃人身要害之地。症雖不一。大要總歸於

火。蓋少陰少陽。君相二火。其脈並絡於咽喉。故往往爲症之所結紱。經云。一陽一陰。結爲喉痺。痺者。閉也。不通其閉。則火鬱痰塞而死。火乃痰之本。痰乃火之標。故言火。則痰在其中。言咽喉。則牙舌亦包羅於內矣。〔譔按〕濕夾熱而生痰。火載氣而上逆。痰隨氣湧。化痰以降氣爲先。氣因火逆。降氣以清火爲要。此爲治喉症之不二法門。卽伏邪之已化熱而挾痰火者。亦當宗之。若表未清而挾飲邪。熱未化而有食滯者。不可輕試。〔火有虛實。實火。因過食煎炒炙煇。蘊熱積毒。其症煩渴。二便閉塞。風火生痰上壅。將發喉痺。必先三日。胸膈不利。脈弦而數。治宜先去風痰。後解熱毒。虛火。或飲食太過。或因忿怒。或因色慾。火痰上攻。咽喉乾燥。必二便如常。少陰脈微虛。治宜補虛降火。〕〔譔按〕此補字宜看得活。〔凡用藥不可純用寒涼。取效目前。〕〔譔按〕早用寒涼。爐燄之火雖熄。灰中尙有餘火也。〕〔蓋上熱未除。中寒復起。毒氣乘虛入腹。胸前高起。上喘下泄。手足指甲青黑色。七日以後。全不進食。口如魚口者死。治喉症最忌發汗。誤人不淺。如針出血。卽汗之之義。若寒傷於腎。及帝中腫者。尤不宜針。至如內傷虛損。咽喉失音。無法可療。喉症初發。一日卽見寒戰。戰後身涼。口不碎。又無重舌。或二便俱利。不可認作熱症。此

上盛下虛。其痰不可提盡。此痰卽津液所化。只宜消降。亦不可太降。其與熱症乳蛾、搔舌之痰毒腫一處。以消盡毒痰而愈者不同。若提盡。則津竭神枯。必死。須以吹藥。或用燈草取嚏。使喉一通。卽服煎劑。第一劑發散和解。第二劑養陰溫補。設三四日後。再發寒戰。或心痛、骨痛、脚痛等症。皆屬難治。發時牙關緊閉。喉舌俱脹。口碎而臭。或有重舌。及舌有黃屑。發後。下午再發寒熱。二便閉塞。卽作熱症。一諤按。天氣瀰漫鬱蒸。地道必不能通。所以果屬熱症。大便必堅。一芩連敗毒散主之。此亦易愈之症。如漸至三四日後。而寒熱者。雖凶亦不爲患。惟牙關反不緊閉。脣不腫。口不臭。又無表熱者。難治。舌以筋押之。其色雪白。起筋卽紫紅色。此血肉已死。一原註。舌押之卽白。未必爲死也。一然口臭者。或有可生。一諤按。胃氣尙存。故得上熏於喉而爲臭。其毒有向外出之機也。一若口渴氣急。痰多而稠。如桃膠者。則死期已速。一頸俱紅腫者。亦危症也。面帶紫色。面青帶白。神氣虛者。俱難救。不語者死。略能語者。尙有可生之機。面色無神。喜坐低處。難治。喉花爲帝中性命所關。舌下紫筋爲舌繫。下通於腎。白腫不治。傷之卽死。凡治不可不審之。

論纏喉風不宜過用滌痰

凡纏喉風。及一切喉症。去痰太多。則內必虛。如陰症傷寒一般。必用人參。少加肉桂。導火歸元。方可醫治。脣白者。不治。頭面項腫者。無妨。如紅腫至胸前。難治。因毒氣攻心也。〔原註。紅腫至胸前。余父曾治謝姓客。前劑中用護心散而愈。若不用此。毒歸於心。笑不休而死。〕無痰者。不治。痰去太多。則精神已竭。病雖似好。飲食如常。不知者。以爲全愈。殊不知少頃即發。脈細即死。如未謔語。急用人參可救。氣急不治。病久寒戰骨痛。不治。寒戰一日外即死。脣如胡桃肉色。不治。醬色亦不治。使病人與好人同坐。衣冠若無病者。〔謔按。衣冠二字。不妥。宜易氣色二字。〕見其脣上。有如桃膠黏痰。不出一語者。即刻死矣。脣如朱紅漆色。不語者。醫至終日。即能語。〔謔按。此與轉筋同意。〕先寒熱而後發症者。極重。如寒熱同喉症齊發者。亦重。然不致死。此驟發而言也。〔謔按。凡喉症之屬於陰虛者。皆由相火不潛。而真陰瀉散也。治宜用導龍歸海法。據其窟宅而招之。非尋常感受風熱之喉症可比。〕

又喉症有漸發驟發二端。漸發者多活。驟發者多死。漸發者輕。驟發者重。然驟發即治。亦不致死。漸發失治。亦多致死。此是喉症總綱吃緊之論。

類證

(一) 乳蛾

有單有雙。有連珠。多因酒色過度。鬱結而生。初起。一日疼。二日紅腫。三日有形。如有細白星者。若發寒熱。即飛蛾之凶症也。四日凶勢定。治之。四五日可愈。其症生於喉旁。左屬心。右屬肺。又云。在右者為喉。肺病。因氣而得。在左者為咽。胃病。因食熱毒而生。一邊者單。二邊者雙。二星上下相連。狀如纏袋。又如蠶繭子樣者。為連珠。單者輕。雙者重。連珠者更重。發寒熱者凶。若傷寒後患蛾及閉者。不治。又有急者。旦發暮死。又有慢蛾風。四五日可治。又血蛾。用銀針挑破血泡。即愈。〔譯按甲寅秋。張蘭章夫人。痰凝氣滯。木鬱不達。近感風邪。包裹裏熱。蘊而不化。咽喉偏右。白腐頭痛。咳而無痰。單乳蛾之凶症也。脈細弦。苔白。用宣肺疎氣化痰清熱法。炒荊芥、桑葉、杭菊、杏仁、連翹、象貝母、廣玉金、製香附、黑山梔、硃赤苓、生決明、蛤殼、白蒺藜、薄荷葉、玉桔梗為方。外吹。用師授中白散、柳華散、合冰梅丹。一劑霍然。〕中白散諸方。另載於增錄一東內。〕

(二) 喉菌

因憂鬱過思。血熱氣滯而生。婦人多患之。狀如浮萍。略高而厚。紫色。生於喉嚨兩旁。難求速愈。輕則半月。重則月餘。治者要得法。患者須守戒。忌口戒慾。并一切毒物。(譯按 此症如四七烏沉二陳半貝。旋覆花湯及逍遙丸之類。均可選用。)

(三) 蟻毒瘻

項下忽腫一塊。漸延至頸。偶破。出水碗許。爛久不合。此因食中偶食毒蟻所生。故名之。初起者易治。久者難痊。

(四) 喉癰

此虛火上炎。肺受燥熱。致攻喉間。生紅絲。如哥窰紋。又如海棠葉背紋。乾燥妨食。或痛或癢。雖不喪命。亦難速愈。如用藥遲延。不守戒忌。必生重症。久則失音不救。勞症多患之。(譯按 凡患喉症。均當忌口戒慾。前於師處臨診。見有一石姓女者。患咽痛。經師治愈後。忽一日復來診。猝然失音。帝丁紅腫。診脈尺大而浮。知其不戒慾之故。乃用養陰攝納法而愈。又按 今人患溫病或濕溫等症。一見喉中癢痛。卽以爲喉癰。遂送猴齋猴。無所不至。實非喉癰症。積習之陋。可嗤可嘆。)

（五）塞喉風

喉痺絞毒。痰涎稠實。而發寒熱。關上可治。關下難治。（諤按）塞喉風純係痰氣阻塞。用余自製霹靂針開關。繼用中白烏牛散及柳華祕藥吹之。內服以滌痰通便爲要。

（六）喉癰

因過食辛辣炙煇。厚味醇酒。感熱而發。或七情鬱結而生。皆屬肺病。（景華按）林佩琴云。胃大腸二經。喉間無形。但紅腫而痛。重者亦發寒熱。頭疼四五日可愈。有白星者爲蛾。無星者名癰。

（七）撻舌喉癰

肥人感熱性躁。多生此症。凡舌下生如小舌樣者。爲撻舌。如連喉腫痛爲喉癰。此乃心脾二經之鬱火。上攻使然。撻舌兼喉癰並發。其勢最重。速治可愈。傷寒後發者難治。如氣閉不通。無形無聲。多是危症。（諤按）又有一種外喉癰。咽喉不痛。生於頰下。紅腫穿潰。一候即愈。甲寅秋。治一張姓者。暑熱內蘊。透發肌膚。暑癰瘰癧。頰下結核。紅腫作痛。已成下喉癰。勢難消散。宜清營化毒。速潰速愈。以止其蔓。

方用銀花、連翹、大貝母、姜山梔、防風、赤苓、苡米、夏枯草、蟬衣、竹葉、西赤芍。服一劑後，即用刀開潰，後膿泄稀少，腫勢不退，脈弦勁，宜托毒化膿，腫消爲要。方用炒牛蒡、炒荊芥、防風、連翹、大貝母、金銀花、黑山梔、蟬衣、鈎鈎、白蒺藜、鹽水炒、生甘草、地丁草、姜竹茹、薄荷葉，外摻自製去解妙丹，一候即愈。（內癰以不潰爲妙。）

（八）纏喉風

因心中燥結而發。先二日，必胸膈氣緊，呼吸氣促，忽然咽喉腫痛，手足厥逆，頸紋如縛，熱結於內，腫繞於外，且麻且癢，喉中紅絲纏緊，指甲或白或青，手心壯熱，喉腫而大，痰聲如鋸，其症最急，初起即治可救。若過一日夜後，目直視而睛定，聲如雷鳴者，不治。探以燈火近患人口邊，即吹滅者，不治。若見喘急，額汗危在旦夕矣。腎經有熱，致令心火盛也。（原註：吹丹內必加牛黃爲妙。）（譯按：纏喉風較塞喉風勢猛而險，一則開關化痰而愈，一則必須顧及少陰，而初起總以開痰爲要。）

（九）喉刺

多因勞病未愈，虛火上炎，營血已竭，其症上顎有紅點，密密如蚊齧痕，此是危篤。

將殂。慎勿視之。以取謗怨也。

（十）酒毒喉痺

外見赤腫。內形如鷄子。其色鮮紅。光亮如鏡。發熱惡寒。目睛上視。此心脾積熱。形象雖凶。速治可愈。〔謬按 河間論治喉痺。猶之救火。卽內經火鬱發之之意。發爲發汗。然咽喉中不能發汗。故出血者。乃發汗之一端。〕

（十一）喉瘤

生於喉間兩旁。有單有雙。形有圓眼大許。血絲相裏似瘤者。故名之。此因肺經受熱。多語損氣。或怒中高喊。或誦讀太急。或多飲燒酒。倘吃炙煨硬物。犯之卽痛。不犯不痛。須斂神晏息。以降之藥治之。便愈。〔謬按 此與梅核氣症相似。因於七情鬱結。痰凝氣滯而成。不可妄用刀針。宜吹余冰梅丹。合白金散。內服如四七。越鞠。旋覆。葱絳之屬。可冀向愈。〕

（十二）喉肉球

如圓眼核樣。有根線。長五寸許。吐絨出外。方可飲食。以手輕捻。痛徹至心。此絨是心肺受熱所生也。

(十三) 心出氣

舌上忽有簪孔。出不止者。此屬心經火甚也。(景華按。此症是舌舂之類。治當補心清火。)(謬按。此症用蒲連散摻之。內服如梔連翹芩等可愈。)(出字下。似脫一血字。)

(十四) 喉百葉

咽喉中有生肉。層層相疊。漸腫有孔。出臭氣者。是因肺受熱毒所致也。

(十五) 牙槽風

初起。先齒痛不已。復牙根肉即浮腫。紫黑色。或出血。久則腐爛而臭也。

(十六) 牙漏

即前症相同。久則不愈。齒縫出白膿。極難調治。甚則齒落。如落上左邊門牙。一概不治。以上二症。俱屬胃腎虛熱也。

(十七) 牙擗

屬胃火。如豆大。或內或外。生無定處。

(十八) 牙宣

齒縫出血。上屬脾。下屬胃。實火上攻所致。亦有胃虛火動。腐爛牙根。以致滲漏不已。

（十九）牙癰

初起。生一小塊於牙根肉。或上或下。或內或外。其狀高起而硬。此脾胃火也。〔謬按。此症患者極多。大都內蘊熱而外束風邪所致。必牽引頰車。牙齦爲之開合不利。宜用大豆卷、桑葉、荆防、角針、殭蠶、象貝、連翹、薄荷、甘桔、川芎、蟬衣、鈎鈎、蒺藜之屬。一二劑卽愈。余治此症。屢試屢驗。味者用膏藥一貼。悶成壞症。夥矣。〕

（二十）牙菌

生於牙根。紫黑色。高起如菌狀。此係火甚血熱。而兼氣滯。或好飲燒酒。酒濕傷脾。濕鬱生火。致有此症。〔謬按。此症宜用苦辛溫法。疎氣化痰。兼解毒治之。如銀花、甘草、綠豆衣之屬。均可用。〕

（二十一）穿牙疔毒

先三日。牙疼發寒熱。痛不可忍。牙根上發一塊紫色者是。未破者爲疔。已破者爲毒。其色紅者可治。如青色者不治。

(二十二) 走馬疳

或因胎毒。或痘後發毒攻齒。牙根腐爛成疳。殺人最速。鼻梁發紅點如珠者。不治。惟螻蛄散可治。疳如醬色。一日爛一分。二日爛一寸。故曰走馬。以喻速也。齒落盡者死。

(二十三) 小兒走馬疳

及牙槽風。俱要防齒落。左邊上門牙。爲牙中之主。此牙一落。則餘牙盡落矣。最重難治。若此牙不落。別牙雖落。治之可生。穿腮不治。有螻蛄散可治。青黑色者難治。痧後疳。單用梧桐葉煎湯洗脚。卽刻痊愈。應驗如神。〔諺按〕走馬疳之猝起者。宜用涼藥。若係病後而起。宜用附子。半夏加葱白搗爛。紮脚底。可愈。相傳單方極多。類皆有效。有不效。總之隨起隨治。尙有可愈之理。惟此症之涎唾極毒。一切器具。如押舌等。用後必須揩擦乾淨。免致傳染。〕

(二十四) 崩砂口疳風

是舌下。牙根上。腫赤。口內作痛。如湯熱。牙根漸爛。亦能脫落牙齒。

(二十五) 舌癰

舌赤腫大。屬心經火盛。地角亦紅腫。又舌上腫痛色黃。名舌黃。亦屬心火。〔謬按此與下三症均宜大清心熱。用犀羚合敗毒散之類。并宜吹祕藥及孟英錫類散等均妙。〕

（二十六）重舌

舌下生小舌樣。其色或紅或紫。又名雀舌。小兒胎毒。亦有患此。

（二十七）蟬舌

亦前症之類。如生舌根。連喉腫者。名爲撻舌。非比重舌易治。治之不明。恐難速愈。此心經受熱。毒氣出於舌下也。

（二十八）連珠口疳風

自舌上起一小泡。發一個。又一個。甚者七八個。連珠而生。舌黃。舌上腫痛。獨生舌中者。名爲舌楊梅。俱屬心火。治用口疳藥吹之。

（二十九）木舌

舌腫大如煎熟猪肝。不能轉動。是憂鬱所致。又有一種。生舌根下。狀如白棗。即重舌。有青紫筋者。不能速愈。初起不疼。不發寒熱。漸漸腫大。初起即治可愈。遲則難

痧。（謬按 此屬陰症。治宜大辛溫。蒸動腎陽方可。若用寒涼。便誤。）

（三十）蛾口

一名雪口。初生月內小兒。滿口舌上白屑。如蛾口樣者。故名之。形如腐衣。後變黃色。轉如黑色者。不治。若口如魚口。或作鴟聲者。難治。此心脾積熱。又名迷口。（謬按 此症余用柳華散吹。另以真青布濕薄荷水拭之。極效。）

（三十一）馬牙

初生小兒。胎內已受熱毒。見風而生。但看牙根上有白色。如脆骨者是。此症初發。必打噴嚏。含乳在口。或吞或吐。而不吮。其病已深。若不急治。入腹而死。凡百日後。不患此症。

（三十二）懸癰

生於上顎。形如紫李子樣。墜下抵舌。其人口不能言。舌不能伸。頭不能低。仰面而立。鼻中時出紅涕。若不速治。至毒入腦。即死。又有一種。（堅俱蟲毒風。）上顎略腫。水食不下。狀如雞子。如破爛穿顎。即名天穿。不治。（景華按。堅俱二字。文理不通。想傳鈔之誤。姑存之備考。）

(三十三) 松子風
口內滿喉。赤如肝脹。口吐物出。氣逆關閉。不能飲食。凶症也。

(三十四) 結毒
隨經絡而發。或口。或舌。不拘定處。爛久不愈者是也。(認定經絡部分。)(譯按
結毒隨症皆有。不必喉症爲然。)

(三十五) 紫舌脹
屬心火。內必煩躁悶亂。

(三十六) 舌菌
多因氣鬱而生。如菌狀。或如木耳樣。色紅色紫。皆屬心火。治用金丹、碧丹和吹。內服煎劑。同舌癰法。

(三十七) 帝中喉風
即喉嚨花腫脹重者。至於發泡。蓋塞咽喉。氣難呼吸。此屬腎虛火旺。并感風熱而生。

(三十八) 頰癰

胸前紅腫。形現在外。亦欲內攻。甚則喉腫閉而出膿。

(三十九) 蜂子毒

與前症相似。或在臉腮。癢爛。或在喉間舌下。色黃如蜂者。凶症也。

(四十) 面癰

與前症相倣。又名爛頰風。腮頰風。毒結盡牙處腫。大抵皆屬鬱火也。

(四十一) 托腮癰

生於腮下。因過食厚味。多因醇酒熱毒所結而生也。

治法

(一) 治病必須明症。用藥不可閉門捉賊。又不可引賊入門。反增他疾。凡治喉症。皆君相二火。法當清降。表裏同治。驅放賊邪爲要。然不可混用石膏。妄清肺胃。關門留賊。傷咽而斃。如舌症屬心脾二經之火。又宜表裏兼治。亦不可亂用芩膏。妄清肺經。引賊入門。致生喉脹痰塞之患。又如牙症屬脾胃二經之火。不可反用芩連。妄投過經藥味。致有喉舌腫脹之患。他若溫熱病後。腎液乾枯。不能上潤於

心。心火發動上衝。咽喉乾痛。宜用清心滋腎爲主。知柏、川連、麥冬、硃砂等味可愈。不可誤投表味。若用發散。必致精竭神枯而死。學者須審準經絡。方可下手。不得混行施治。〔謬按〕此段論喉症治法極精。示人以不可妄涼。確有至理。然亦有宜涼者。須合苔脈方可。不得膠柱鼓瑟也。〕

〔二〕凡喉症先用吹丹一二管。使其痰出。視其痰濃否。緊否。如痰起濃黃緊。扯捺不開。痰黏藥管。難拭去者。危症也。如吹初管藥。其痰多緊而不出。其勢危急。死在須臾。將吹丹用薄荷、竹瀝泡湯。冷透投入。調勻灌之。自無痰塞之患。此心法也。〔謬按〕亦有宜針啞門、少商、曲池、廉泉等穴。而後肺氣不致蔽塞。內關得以開轉者。針後再用霹靂針吹之。痰無有不吐之理。惟服竹瀝一兩者。必滴入生薑汁二三匙。方妥。〕

〔三〕凡喉症頸項赤腫。深受時毒。赤腫不可至胸。至胸必死。謂之毒歸於心。其人必歡笑。與煎劑同服。護住其心。多服解毒之品。使毒漸平爲妥。亦心法也。

〔四〕凡咽喉齒舌症。須辨內外二因。虛實二火。虛者或病後。或酒色。虛火上炎。宜養陰降火。又須守戒耐心。自能漸愈。實者因感時邪。觸動君相二火。重者寒熱

頭疼。先宜清洩清散。開結逐毒滌痰之法。並行爲妙。清心用犀角。清中有散。不宜黃連。黃芩苦寒。一諤按。如舌尖深絳有刺。亦有可用之處。一恐扼火毒。使痊後復發。洩散宜用葛根。薄荷。防風。青蒿。一然葛根最竭胃汁。不宜輕用。青蒿易荊芥爲妙。一不可用升麻。柴胡。桔梗。一諤按。今之桔梗。率是薺芫。亦有可用處。惟宜輕。一升提其火。然芩連亦有用之者。齒舌之症。用亦無妨。火邪鬱結於中。而用大黃。芒硝下之。人症俱實。瀉火後。症消而愈。是霸術也。務期認症的確。方可行之。若稍差遲。爲禍非淺。愚謂症退而火自泄。津液回而大便解。亦祕法也。

（五）凡陰虛喉痺。口舌生瘡破爛。或聲啞者。皆水虧火旺之症。初起宜加味射干湯。次用滋陰消痺湯。亦有未成勞瘵。遽然音啞。以致嗽唾無休。偶或飲寒。或過用涼劑。鬱其火於肺。初宜清肺散火湯。驅寒氣以泄火邪。次用滋陰降火清肺之劑。如喉痺腫痛。甚者加味射干湯。或用熊膽冰黃散吹喉中。如喉痺延及口舌。生瘡破爛者。柳黃散搽之。陰火上炎。未成勞瘵。遽然聲啞。有痰嗽者。清肺散火二三劑後。用滋水開陰湯。

（六）喉症至五日則重。如三日前。症雖重。尙未成膿。藥能消散。若至五六日。患

處多成膿矣。縱使穿破。必有爛窠難愈。爛處必用口疳藥。多加龍骨、兒茶。疊吹而愈。凡傷寒後患連珠乳蛾。及喉痺者。不治。惟張氏有治其喉症。頸項強硬。目睛上視。氣絕者。不治。喉痛起至一二日。未必發寒熱。病尚輕緩。若至第三日。必發重症。必加寒熱。須問大小便通利否。如二便俱利。其症不過浮遊之火。攻於咽喉。宜服清風清熱降火之藥。即愈。若大小便不通。內有實火。若非用降火解毒之劑。兼通二便之藥。火從何而泄。病如何而解乎。故症有輕重。病有緩急。要問其頭痛不痛。如痛。則是傷寒難治之症也。〔譚按 多加龍骨、兒茶。亦非所宜。若內蘊之熱毒未清。則江河易於潰決也。〕

（七）喉症雖凶。若腫發於外。危症雖見者。治之易愈。

（八）帝中腫脹。雖難吸氣之重症。速治即愈。遲則亦重矣。喉症必大便去後。方可望痊。如大便閉結。不可輕許其愈。〔譚按 此即地道通而天氣降。釜底抽薪之意。亦有通便而虛陽上逆。腫痛極甚者。宜用養陰清化。治白喉法是也。〕

（九）喉症初起。大便閉結。宜大黃、元明粉。兼用表裏之品下之。則降火而易痊。若五六日久不食。大便閉塞。此由病久。胃氣已虛。元氣已弱。禁用硝黃。不可妄投。

霸劑。以致虛脫而死。欲通其便。只宜養陰降火。兼蜜導等潤藥下之。此秘法也。若用硝黃。須診其脈。來有無力。可下則下之。〔諤按〕右關沉實有力。或滑數鼓指者。均可下。〔景華按〕風火喉症。至喉閉時。氣血必滯。脈必沉澀。不可誤認無力。斯時憑症不憑脈。須審其胃氣之有無。如胃氣尙存。宜下之。〕

〔十一〕喉症吹藥。必要直對喉中週遍。重吹四五管。方可消降毒痰。三四次後。用煎藥方可全愈。

〔十一〕喉症先碎。須長肉藥吹蓋破處。後用諸吹藥頻吹。腫消爲妙。

〔十二〕喉症一二日腫痛。三四日勢定有形。每至三日猶發寒熱。或頭疼。須刻刻吹藥。總不可緩。即知生死在幾日間矣。〔景華按〕婦人喉症腫痛。經水適止。火不下達者。宜通其經而喉自愈。〔諤按〕此即所謂熱入血室也。不獨喉症爲然。傷寒溫病。均有此症。宜清營分而愈。〕

〔十三〕凶喉之症。頭面發腫。白亮無光彩。脈來沉細無神。是神氣外泄。無陽之症也。斷不可治。若面發紅腫。脈洪大有力。症雖極重。元氣尙強。毒火雖盛。治之易痊。

（十四）腮易腫爛。用篋縛絲綿。蘸水輕攪患處。痛者。用藥必愈。若不知痛者。是死肉。難愈。

（十五）舌腫脹滿口。吐舌在外。難以納藥者。用開關散吹入鼻中。牙關自開。痰涎自出。然後用篋捲綿。蘸甘草湯。潤其口脣。後送丹散。頻吹而愈。

（十六）吹藥非惟腫破患處要吹。并週圍好肉上。亦須吹之。方免延開。且易於愈也。口舌等症。吹藥後。如舌上無涎。或如乾橘囊者。不治。

（十七）口舌腐爛。無血出者。不治。穿腮者。不治。爛至鼻梁。發紅點者。不治。惟張氏有治。如舌腫大。用生黃柏。加冰片敷之。若出血。用炒黃柏。冰片。此妙法也。

（十八）如患撻舌喉癰。若大便閉結。煎劑內加元明粉。大黃。小便不通。加六一散調服。服之甚效。此心法也。

（十九）如患牙齦癰。則牙齦肉脹突出。牙關緊閉。口不能開。先用甘遂散配製巴豆少許。吹入牙齦內。用押舌器。漸漸擦開牙關。用藥頻吹而愈。

（二十）口疳用絲綿輕攪。切不可用青布。恐患處受傷。難愈。合藥取于辛散。以細爲主。收儲不可出氣。須用烏金紙塞緊瓶口爲妙。凡不經火之藥味。宜晒脆爲

末用之。

藥例

總論

喉症用藥。必須認症的確。按脈之虛實。火之盛衰。須要活潑。不可按圖索驥。又不
可膠柱鼓瑟。乃爲善治。若症有寒熱頭疼。六脈弦緊。始發必須表散。須兼清火。開
結。滌痰。解毒。表散。葛根。防風。薄荷。青蒿。羌活。荆芥。散風熱。按經治。清火。犀角。連翹。
元參。山荳根。此清心胃腎之火。蘆根。亦清胃火。三焦火。黑山梔。肝鬱火。青黛。開鬱
結。射干。川貝。滌痰。淡竹。油前胡。杏仁。橘紅。大力子。解毒。大貝母。甘草。金銀花。寬癰。
天花粉。赤芍。小便赤澀。木通。通草。車前子。鮮荷梗。胸膈飽悶。枳殼。大便閉結。六脈
有力。舌苔黃。壯火。大黃。鮮生地。元明粉。腎經虛火。可用知母。黃柏。投之。無不驗也。
如舌症。舌乃心之苗。宜用清心解毒。前法可用。舌症之毒。可用伏龍肝。燈心爲引。
牙症。乃脾胃之部。清用石膏。生地。知母。黃柏。黃芩。黃連。或炒黑升麻爲佐。解毒用
人中黃。人中白。金汁。若穿牙疔。與牙齦癰。用紫花地丁草。如素虛與病後。虛火上

炎。可用滋陰降火。佐之以補。宜大生地、大熟地、枸杞、玉竹、洋參、人參、西黨參、北沙參、天麥冬、女貞子、黃香梨、甘蔗、首烏、虛熱、地骨皮、丹皮、丹參、鮮沙參、鮮首烏、鮮石薺、川石薺之類是也。略具大綱。以備選用。〔諤按〕此例可遵用者固多。不適用者亦有。在學者臨證時權衡。不可刻板方以治活病。斯得余重編之心矣。〕

（一）治雙單連珠乳蛾

連砂散配製巴豆吹之。倘成膿黃熟者。用代針散吹之。出膿血而愈。重則煎劑中。左加黃連、犀角。右加赤芍、柴胡。雙蛾則兼用之。大便不通。宜加枳殼、元明粉。服下少頃。候大便通利。則症自愈。至三四日。看喉內。但有紅腫而無白星者。即是喉癰也。

（二）治喉癰

八味薄荷散。連砂散加製巴豆吹之。治喉腫甚痛。用七味僵蠶散、甘遂散。入製巴豆頻吹。如重。並服煎劑。用犀角、地黃湯加減。並服膏丸。如大便秘結。加大黃、元明粉。如小便不利。加六一散。〔諤按〕余治喉症。用全瓜蒌同元明粉打。生枳殼同風化硝打。輒效。後遇藥肆某君。謂余曰。風化硝與元明粉。即一種。何以本草別為

二種。其主治又不同。故誌於此。以質世之博雅。究竟同乎異乎。」

（三）治喉癰

用喉癰方。頻吹百草膏。不時頻咽。再服煎劑。內加土貝母。下氣。忌憂思。忿怒。酒色。并雞蝦蟹羊鵝。豬首肝腸。一切毒物炙燻。及引氣動火之物。守戒一月。可愈。〔諤按 土貝母宜慎用。〕

（四）治喉菌

用連砂散加重。即用甘遂散吹之。亦須頻咽百草膏。兼用煎劑。不可間斷。又用噙化丸吞化亦妙。或七味僵蠶散。入味薄荷散吹之。先將山茨菇汁搽上。然後吹藥。則效速。〔諤按 山茨菇可研末。和入吹藥中吹之。則簡便而取效則一也。惟分兩宜輕。〕

（五）治撻舌喉癰

煎劑中。須加犀角地黃湯。并用甘遂散。吹至舌根。及舌旁。時刻不可間斷。方可速愈。如癰勢重者。再配入製巴豆。兼吞上清丸。

（六）治纏喉風

最爲急症。起時立用加味硝黃散。或甘遂散。週圍重吹。并內服煎劑。如便閉。加大黃、芒硝。并吞上清丸。如虛喉用噙化丸化咽。如症候太重。丹中加牛黃少許吹之。稍遲則難救矣。臭花娘子根。搗汁咽之效。

（七）治酒毒喉

如內外赤腫。閉塞不通。用牙硝、硼砂、食鹽。加入開關散少許吹之。立效。煎劑加解毒藥治之。

（八）治鎖喉風

如喉及牙關緊閉。難以吹丹。一時無以治療。症又緊急。頃刻之間。用蟾酥磨水。令患者仰面。滴入鼻中。到喉即開。男左女右滴之。治牙關閉者。速吹甘遂散。入開關散亦可。用熏鼻方。〔謬按 鎖同鎖。鎖緊之意也。〕

（九）治喉瘤

最爲難愈。須患者斂神晏息爲妙。用麝香散。一日夜連吹五六次。漸愈。并服清肺飲。再加入四物湯治之。

（十）治喉肉球

雖不損人。最難速愈。須令病人耐心爲妙。急用麝香散頻吹。并服清肺飲。徐徐灌之。

（十一）治心出氣

急用赤小豆一升。杵碎。將水三碗。和搗取汁。每服一盞。不拘時服。再用槐花末摻之。立效。

（十二）治喉百葉

用臭橘葉煎服而愈。如腫痛。用連砂散頻吹爲妙。

（十三）治牙槽風

連砂散配入去腐方。頻吹。去其腐。後用口疳藥。倍加珠黃。再配去腐方。吹去紫色。獨用長肉藥。頻吹。數日可愈。煎劑。養陰降火。〔謬按 高錦庭云。此症患者。有二因。一生於風寒暑熱。陽明濕熱交蒸。一生於陰虧絡空。少陽膽火上逆。其膿結於盤牙盡處者。爲牙齦結於腮邊外。爲托腮。結於牙根。爲牙癰。如不急治。俱轉變爲骨槽。治宜疎肝散鬱。育陰爲主。佐以解毒泄熱。此症當與下數條參觀自得。〕

（十四）治牙漏

此卽牙槽風疳疔毒破後結成。齒縫出白膿者。極難調治。槽漏兩症。須戒酒色。一切辛煖毒物。調治用琥珀散吹之。如腐亦同槽藥治之。煎劑用滋陰降火之藥。吹丹務要耐心。頻吹自愈。

（十五）治牙齦癰

先用甘遂散入製巴豆少許。吹入患處。外用押舌器擦開牙口。再吹腫處。自然消退而愈。并服煎藥。

（十六）治牙搥毒

先用甘遂散。後用連砂散。并服煎劑。內加石膏、連翹治之。

（十七）治牙宣

內服煎劑。宜用扶脾清火之藥。外用珍珠散。將新綿花指大。捏成條。蘸水。再捏扁。蘸藥塞患處。以指抵之。勿動一二次。甚則二三次卽止。若并牙疳腐爛者。卽用長肉藥吹之。如宣不止。仍用珍珠散吹之。先宜用涼血清胃之劑。此實火而言也。若牙根胃虛火動腐爛者。外吹長肉藥。內服清脾降火之劑。

（十八）治牙癰牙菌

連砂散吹之。兼用煎劑。如腫甚。宜加入甘遂散吹之。如腐爛。用口疳藥。長肉爲度。

（十九）治穿牙疔毒

如重甚。用甘遂散吹之。并服涼血降火解毒之劑。如輕者用連砂散。若破黑腐。配合去腐方吹之。如無腐爛。并腐去淨。並用長肉藥。內加牛黃、珍珠。倍加兒茶。并服煎劑。方可用涼血解毒降火之劑。

（二十）治舌癰

連砂散吹舌根上。并用煎劑。內加犀角、川連、山梔。

（二十一）治木舌

陰陽散。先用生薑片擦之。後摻爲妙。重用連砂散。并甘遂散吹之。煎劑。加川連、梔仁、竈心土、水飛冲服。

（二十二）治重舌

薄荷、冰片摻之。并服燈心湯。加煎藥服。

（二十三）治舌出三寸不收

用熏鼻方。將煙熏舌即收。并服清心煎劑。兼吹連砂散。

（二十四）治舌縮無言

將芥菜子研末。醋拌。敷於頸上。內服清心之劑。

（二十五）治紫舌脹

用柳仙散。內服犀角地黃湯加減。如脹甚。用連砂散吹之。

（二十六）治口舌嘴碎

通用柳仙散。

（二十七）治蟻毒瘻

製穿山甲末。敷之愈。如碎難收口。配入長肉藥吹之。服煎劑解毒。

（二十八）治頭面托腮等癰

恐毒內攻。吹用連砂散。外敷三黃散。

（二十九）上顎癰

如腫未成膿者。甘遂散。已成膿者。代針散吹之。如破者。用長肉等藥選用。并服百草膏。

（三十）治老幼走馬牙疳

一切惡毒臭爛。連砂散配去腐方。吹去腐肉。後用長肉藥。如腐未盡。去腐方再加長肉藥吹之。再服犀角解毒丸。

（三十一）治穿腮牙落之重疳

連砂散配去腐方。吹去黑腐後。用螻蛄散。合長肉藥吹之。如侵蝕口鼻。將蝕吹之。并服解毒藥。

（三十二）治舌喉結毒

久破難愈。琥珀散頻吹。

（三十三）治咽喉腫痛

風痰上壅。宜上清噲化二丸。審症虛實。吞化。并吹丹散。隨症選用。

（三十四）治帝丁腫脹

速用煨鹽點之。如有泡者。即將煨鹽。配入冰片少許。指甲末研勻同吹。

（三十五）治小兒螳螂子

連砂散。同桑螵蛸煨末吹之。

（三十六）治小兒雪口

先將絲綿捲指蘸水拭去白翳。用柳仙散。如重換用連砂散吹之。內服犀角解毒湯加連翹大力子。如夾驚風加薄荷鈎藤。

（三十七）治小兒馬牙

將銀針挑破出血。青布蘸溫水拭淨。以口疳藥或金墨搽之。

（三十八）治諸骨鯁

連砂散。合甘遂散。加急性子吹之。

（三十九）治脣口破腫而硬

服瀉黃散。吹柳仙散。或用井花水拌散。頻拭脣口。若舌口俱腫。合導赤散服。并吹連砂散。

（四十）治諸癰堅硬不消

連砂散加甘遂散。茜草根末吹之。立軟。

癰秘喉書卷上藥例

重訂囊秘喉書

清

楊龍九著

新陽王景華士翹編訂

常熟張謇譯汝偉增評

鄞縣曹赤電炳章圈點

卷下

醫方論上

(一)甘遂散 原名息雷禁。凡仍原名者不注。

甘遂六分。麵裹煨黑。存性研末。提淨牙硝一錢。食鹽炒二錢。薄荷二錢。蒲黃一錢。礞砂八分。冰片三分。

右七味研末。吹喉中。此咽喉急症之神劑。斬關擒王之大將也。專治九種喉痺。一切喉症。無一不效。如痰甚。本方加蜒蚰梅。如牙關緊閉。痰涎壅塞欲斃者。先

吹開關散。加牛黃、肉桂皮末。如死在須臾。加臘月黑魚膽。陰乾研末。各少許。如去膈下痰飲。加玉丹少許。重吹一管。須令病人低頭。流出毒痰爲要。然不可過用。過則恐其痰盡津枯。難治。如喉風。本方加臭花娘根末十分之二。如結喉痺。本方加製巴豆少許。如赤甚。本方加川連末十分之一。如腫硬。本方加茜草根末十分之三。如喉癰雙連乳蛾。本方加製巴豆十分之三。如單蛾。只用連砂散加製巴豆。有膿則出。無膿則散。如食物中誤捲飛絲入喉。生瘡腫痛。將連砂散加山茨菇粉。製巴豆各少許。吹之。獨吹亦妙。如爛喉風赤腫。亦將連砂散加山茨菇粉。配合去腐方。消退其腫。或用鍾乳石散吹之。如濕爛虛腐不收。用製蘆甘石。同人參末。入長肉藥吹之而愈。如重舌木舌牙癰牙疔毒。只用牙硝、食鹽、硼砂。再加煨皂礬、皂角刺末。多加冰片。滲之。自消。如穿牙疔毒腐爛。將連砂散加去腐方。或口疳藥。治之即愈。

(二) 陰陽散

川連、乾薑、生蒲黃各一錢。

此丹專治婦女陰火舌腫。敷之即消。凡治木舌。先將生薑蘸硼砂擦之。後以此

方數之。亦妙。本方加兒茶、青黛。各加味陰陽散。亦治口舌生瘡。又名赴筵散。
〔謬按〕此方不獨治婦女。凡男子喉症。犯慾。猝然失音。咽腫等症。均可用之。
然必審確是陰症。方可施治。〕

（三）連砂散 原名散雲丹。

薄荷、牙硝各二錢。硼砂一錢。蒲黃五分。川連四分。珠砂二分。冰片三分。

此丹專治風熱喉症之聖藥。如治走馬疳。與骨槽風。齒落重症者。并用去腐方。
如螳螂子。用桑螵蛸煨灰。存性研末。加冰片少許。吹之立消。或用馬勃配合亦
妙。如諸骨鯁。加急性子爲末。即愈。〔謬按〕治諸骨鯁。用燈心灰。白湯送下。即
愈。雞骨用苧麻或香油。魚骨用大蒜。白糖或橄欖。竹木鯁用鐵銹。誤吞針用吸
鐵石。朴硝。頭髮繞喉。用自己髮燒灰服。螺螄齧卡喉。用鴨涎。一物一制。相反相
承。循環至理。各有專方。切勿泥急性子一味也。急性子爲鳳仙花子。取其急性
速行而已。〕

（四）散堅方

茜草根末。此藥專消堅塊。將茜草根末。配入連砂散內。吹之立軟。

原書用蘭茹根。近世無識者。藥肆中亦不備。故以茜根代之。〔謬按 閱微草堂筆記載西域有飛蟲。名巴蜡者。人爲所嚙。必死。惟食茜草根。數瘡卽瘥。按烏魯木多茜根。其汁可染新絳。則知茜根實出西藏。而市肆者多贗也。經文載四烏鯽一蘆茹。蘆茹卽茜根也。今見茜根代蘭茹之疑。故特質明於此。〕

（五）去腐方 原名下馬仙。

銅綠一錢二分。燈草灰六分。川連三分。冰片二分。

此方專治黑臭腐爛。如走馬牙疳。將此藥配入連砂散內。吹之。其腐卽去。

（六）鍾乳石散 原名珠黃散。

鍾乳石八分。飛辰砂一分五釐。人中白六分。兒茶一錢二分。製黃柏一錢。龍骨五分。薄荷一錢二分。冰片四分。

此方專治爛牙疳之聖藥。如症重。加牛黃、琥珀、珍珠。凡遇各色口疳。若初起。內熱甚及腫者。本方多用薄荷、冰片。如不腫。內熱不甚。且由病久所致。宜用長肉藥。蓋其破處。後用消腫藥吹之。再吹長肉藥。如走馬疳。穿牙疔毒。及骨槽風。并初生小兒胎毒口疳。本方加牛黃、琥珀、珍珠。合去腐方并吹更妙。如初起。此疳

黑腐重症。先用去腐方。合連砂散并吹之。去其黑腐後。吹此方長肉爲妙。若黑腐臭爛無血者。不治。以棉攪之。肉有微紅者。可治。如先臭爛。旋不臭。又不知痛者。不治。如小兒黃色胎疳。如乾橘囊者。不治。如痧痘後口疳。去黃柏、龍骨、加牛黃、倍珍珠。如口疳重症。須加上好鍾乳及珍珠、硃砂各少許。入兒茶內同研細末。更妙。

(七) 柳仙散

薄荷一錢。兒茶八分。青黛五分。川連四分。冰片二分二厘。

此方專治口舌碎痛。先取野薔薇根煎湯漱口後。吹此藥效。

(八) 螻蛄散 原名金鞭散

活螻蛄。

右一味。瓦上煨存性研末。此治穿腮牙落仙劑。配入鍾乳石散吹之。以愈爲度。或獨吹亦妙。

(九) 琥珀散 原名餘珍散

珍珠二分。琥珀三分。兒茶八分。甘草一分。冰片一分五厘。乳石三分。

此治喉舌結毒之要藥。先用絲綿捲筷上。抹患處。後吹此藥。如廣瘡結毒。本方內加輕粉少許。

（十）喉癰方 原名仙鮮散。

煨食鹽六分。蒲黃四分。燈草灰三分。滴乳石三分。青黛二分。兒茶五分。冰片一分。此治虛火喉癰之神劑。如碎腐。本方加牛黃、珍珠、琥珀、龍骨。如虛腐。本方加人參末、製蘆甘石。如吹藥即痛。去煨食鹽。

（十一）蝕鼻方

乾蟾蜍、川連各二錢。青黛八分。麝香少許。

此專治疳爛鼻梁之要藥。須用絲綿拭淨膿穢。吹敷立效。

（十二）代針散

膽星三分。人指甲二三寸。冰片五厘。硃砂少許。

此治乳蛾成膿不穿。將指甲用雙紅紙捲好。燈上燒炭。存性爲末。入辰砂、冰片、膽星。研和。吹入喉中。少頃。即出膿血自愈。

（十三）珍珠散

珍珠四分。龍骨三分。冰片一分五厘。象皮四分。兒茶四分。烏鰂骨四分。乳香、沒藥、硃砂各三分。老參、三七五分。降香節三分。

此專治牙宣。如牙縫出血不止。將新棉如指大。捏成條。蘸水。再捏扁。蘸藥。塞患處。以指抵之。勿動。一二次即止。如碎爛。用長肉藥。仍用本方。并用煎劑。看虛實。二火用之。

（十四）麝香散

麝香一錢。川連五分。冰片一分五厘。

此方治喉瘤之神劑。

（十五）開關散

牙皂一錢。殭蠶八分。

此專治牙喉關閉。吹之神效。

（十六）熏鼻方 原名玉鑰匙。

巴豆不拘多少。將巴豆壓紙上。取油。以紙撚成條。點火。吹滅。以烟熏入鼻中。流出清涕。牙關自開。

（十七）勝烟筒

蓖麻子仁二粒。巴豆肉二粒。麝香少許。

將三味同研。火紙捲燒。熏吸鼻中。牙關立開。此治喉閉不通之聖藥。〔謬按此數方可開後世內症用外治法無數法門。卽如溫熱症。痰蒙熱閉等。亦可用醋炭。或麝香。香油。撚紙捲。燒烟熏之。亦可開。〕

（十八）山甲散 原名天義散

穿山甲。煨研末。治誤食毒蟻生瘡之聖藥。獨敷卽愈。或加入鍾乳石散。亦可。

（十九）珠黃散

西黃五厘。濂珠四分。川連七分。硃砂三分。冰片。當門子各一分。西洋參一錢。兒茶八分。硼砂七分。腰黃八分。

專治爛舌之聖藥。如虛火上炎。吹之立效。

（二十）消標散

牙硝一分。硼砂五分。蒲黃。蜈蚣梅。腰黃各三分。青黛二分。冰片。麝香各五厘。烏梅肉四分。炙存性。

此方專治喉症。過服苦寒。以致喉間結一柱肉。或橫生。或直下。喉中稍疼。名爲喉標。此藥漸點。并內服滋陰之劑。靜養自愈。

（二十一）青靈丹

川柏一錢。青黛兒茶各六分。

此方專治口碎。加入柳仙散內。吹之神效。一謬按。凡用兒茶。不可用火煨。欲使之鬆脆。須日曬卽脆。

（二十二）紫雪丹

石膏、寒水石、滑石各八兩。升麻、犀角片、羚羊片各一兩。元參二兩。甘草八錢。沉香屑、木香屑各五錢。

右藥水煎。取濃汁。去渣。投入提淨朴硝三兩六錢。文火慢煎。俟水氣將盡。欲凝結時。納硃砂、冰片各三錢。金箔一百張。研細和勻。收儲聽用。

此方治重舌、木舌及口舌生瘡。或敷或服。均妙。一景華按。此卽局方紫雪。惟製法稍異。一謬按。此方治熱症內陷。瘧厥。用此可開。若熱症而偏於風者。用至寶。熱蒙心包而見譫語。用牛黃清心。若係痰蒙氣閉。則用蘇合香丸。一症有

一方。何今人一遇閉厥。輒手忙脚亂。恐嚇病家。不問其症之爲痰爲風爲氣爲熱。亂寫清心至寶。紫雪。誤人生命。毫釐千里。可不慎哉。」

（二十三）礪砂散 原名清溪祕傳北庭丹。

番礪砂、人中白各五分。瓦上青苔、塘雞矢、瓦松（即瓦花）各一錢。

右藥用銀罐子二個。將藥裝在罐內。上以空罐對口合住。鹽泥封固。炭火煨紅。三炷香爲度。候冷開罐。將藥取出。入麝香、冰片各一分。研細用之。此方專治舌菌。用磁針刺破。將此藥點上。再以蒲黃蓋之。其症最惡。初起如頭疼痛無皮。朝輕暮重。以此藥點之。自然消縮。若失治。至舌爛穿腮。大凶。百無一生。

（二十四）固齒白玉膏

宮粉一兩。珍珠三錢。麝香二錢。象牙硝五錢。以上四味。研末用。陽起石、龍骨各一兩。用殭蠶四十九條。防風、當歸、川芎、牙皂、青鹽、升麻、白芷、地骨皮各五錢。細辛、薑本各三錢。用長流水濃煎汁。去渣。將陽起石、龍骨火煨通紅。入藥汁內七次。焙乾。研末。再與宮粉等四味。同研極細。再用黃蠟三兩溶化。拌入前藥末。調和成膏。用時。攤油紙上。貼患處。閉口勿語而愈。

此方治牙宣。齒搖不固。將膏貼之。神效。

(二十五) 拔疔散

礞砂、白礬、硃砂、食鹽。

用鐵鏽刀燒紅。將礬、鹽放於刀上煨。各等分。擇丁日午時研末。專治牙縫生疔。腫起一粒如粟米狀。痛連腮項。若麻癢。破流血水。疼痛異常。即黑疔。屬腎火毒。俱用銀刀挑破見血。搽此藥即痊。內服黃連解毒湯效。

(二十六) 小薊散

小薊、百草霜、炒蒲黃、醋香附各五錢。

四味末之。治牙衄血出不止。即將此藥擦牙。即愈。

(二十七) 牢牙散

龍膽草一兩五錢。(酒浸)羌活、地骨皮各一兩。升麻四分。

四味末之。治牙宣齒動。將此藥擦之。立愈。

(二十八) 加味硝黃散 原名禁藥。

牙硝二錢。蒲黃五分。冰片一分五厘。殭蠶一分。(製)牙皂一分二厘。(製)白

芷一分。

此方專治一切喉症。如痰甚。加蜒蚰梅。

(二十九) 七味殭蠶散 原名金丹。

製殭蠶、白芷各一分。牛黃少許。牙硝一錢八分。生蒲黃四分。硼砂八分。冰片二分。加玉丹少許亦可。

(三十) 八味薄荷散 原名碧丹。

薄荷六分。玉丹四分。甘草、冰片各一分。牛黃多用。百草霜三分。燈草灰五厘。製牙皂少許。

此二方專治咽喉急症之神劑。若治喉風。宜用前方七分。本方三分。吹之立效。如痛緩。獨用本方。

(三十一) 銅綠散 原名紅袍。

銅綠五分。腰黃一錢。冰片七厘五毫。

此方專治腎經黑色鐵皮疳。及牙宣等症。如牙齦與口脣內皮爛如雲片。或齦中出血。或口碎。吹之立愈。(謬按 此方冰片不妨加重。市肆銅綠罕真。不如

代以畫家所用之石綠爲妥。青黛、黃柏均可加入。」

（三十二）加味銅綠散 原名綠袍。

銅綠一錢。腰黃五分。冰片一分五厘。炒食鹽六分。炙山甲一錢。

專治實火走馬牙疳腐爛。臭肉浮起。先吹此藥。候腐臭爛肉脫落後。再用地骨皮散吹之。即愈。

（三十三）紅棗散 原名紫袍。

大紅棗。用竹刀破開。去核。腰黃研末。填入棗內。瓦上炙脆。研末用。

此專治脾經各色口疳。齦腫腐爛。牙疔等症。如齦有毒。必用此丹拔毒。吹之立愈。

（三十四）地骨皮散 原名黃袍。

鮮地骨皮五分。洗淨。去黑衣。晒乾研末。煨中白一錢。蠶砂炙三分。冰片二分五厘。杜鹹橄欖一錢五分。瓦上炙。鳳凰衣一錢。瓦上炙。黃狗屎中元米一錢。洗淨晒乾。此方專治各種虛火口疳。腐爛不能飲食。又治初生小兒馬牙雪口二症。吹之立效。亦可長肉。

（三十五）白田螺散 原名白袍。

野荒田中白田螺殼三錢。洗淨研末。水飛。兒茶一錢。冰片二分。
此方專治肺疳。光亮而硬。或牙齦腐爛。色白。吹之即愈。

（三十六）人中白散

人中白一兩（煨）黃柏五錢。川連三分。蠶退紙三錢。（煨）冰片一錢。
專治痘後口疳要藥。（諤按 余用中白散。有兒茶、青黛、薄荷。無川連、蠶退紙。用之亦效。）

（三十七）抹口方

穀樹汁。抹患處立愈。此治鵝口效方。

（三十八）牛黃益金散

牛黃三分。冰片五厘。硼砂、製僵蠶、蜜炙黃柏各一錢半。
共研末。用蜜調和塗患處。或丸如龍眼大。含化。均愈。
專治虛火上炎。咽喉生瘡。破爛者。

（三十九）玉鑰匙

硼砂五錢。牙硝一兩五錢。製僵蠶二錢。冰片一分。

此方治風熱喉閉。及纏喉風之神劑。再加腰黃二錢。名金鎖匙。

（四十）喉癰神方

西黃、冰片各一分。山羊血二分。血珀三分。川連五分。硼砂一錢。青果核炭三分。燈草灰五分。

共研末。每一匙藥。用一匙蜜調之。放舌尖上。徐徐咽下。一日五次。如不見效。將本方加蜒蚰梅即愈。乃治喉癰之聖藥。

（四十一）喉風急救神方

土牛膝根。（俗名臭花娘根）洗淨搗汁。灌入口中。如不能咽。即令其人仰。以汁滴入鼻中。流至咽喉下。亦可望開。

專治一切喉風乳蛾等症。草雖輕淺。其功甚大。不可忽視。或秋月採根。陰乾研粉。再用鮮根打汁拌乾。以備急用。

（四十二）冰硼散

冰片一分五厘。硼砂三錢五分。製僵蠶三分。牙硝二錢五分。蒲黃七分。製膽礬五

分。

此方治一切急喉風。雙單乳蛾。喉癰。牙關緊閉等症。吹之愈。

（四十三）爛喉痧方

烏牛糞尖一個。（瓦上煨）人指甲一分。（男用女女用男）西黃一分。珍珠二分。青黛一錢。冰片二分。人中黃一錢。

此方治爛喉痧之神藥。吹入即愈。如咽喉碎腐。用薄蜜調之。含咽亦效。

（四十四）三黃散

生地黃、（君）生蒲黃、（臣）牛黃、（佐）冰片、（使）

右爲末。用芭蕉汁調敷患處。或用扁柏葉汁和蜜調塗。或用後方亦可。

（四十五）又方

生大黃一錢。生蒲黃一錢。冰片五厘。麝香三厘。

右爲末。加白蜜調入薑汁。葱汁。或芭蕉汁。側柏葉汁。均可。以上二方。專治頸癰面癰。如腫硬未消。氣滯血凝。或痰凝結毒不散。宜用薑葱汁調塗。此二方。并治小兒丹毒。神效。切勿入口爲要。

（四十六）熊膽冰黃散

胡黃連、兒茶、硼砂各三錢。熊膽、牛黃各七分。冰片三分。共爲末。專治喉痺腫痛。吹喉中痛處。立效。

（四十七）柳黃散

黃連、黃柏、蒲黃、青黛、硼砂、胡黃連、芒硝各等分。冰片少許。此方專治喉痛。口舌生瘡。破爛。吹之立效。

醫方論下

（一）上清丸

元明粉二錢。川連一錢。月石一錢五分。枯芩二錢。薄荷三錢。冰片四分。桔梗一錢五分。山豆根一錢五分。甘草八分。大黃三錢。右研末蜜丸。芡實大。每吞一九。重則連吞一九。將藥含口中化下。其腫漸消而愈。此丸專治實火。喉嚨腫痛之神藥也。

（二）噙化丸

大原地（煮）八錢。麥冬肉五錢。（烘乾）山豆根五錢。（煮爛）川黃柏三錢。（焙）天花粉五錢。煨食鹽三錢。真青黛一錢五分。元參四錢。（炒）白柿霜一兩。嫩玉竹二錢。冰片一錢五分。蒲黃三厘。

右爲末。如前和丸。蒲黃爲衣。含化下一丸。此丸專治虛火咽喉腫痛者。〔諤按上方着重在心肺胃。故治實火。此方注意在肝脾腎。故治虛火。醫家必備之藥也。〕

（三）百草膏

薄荷八分。玉丹五分。川貝一錢。燈草灰五厘。柿霜八分。甘草一分五厘。天花粉一錢。冰片二分。百草霜一分。

上藥研勻一處。用白蜜調膏頻咽。嚙之卽效。此膏專治喉癰及喉菌等症。若症重。兼服煎劑。並用吹丹。如治喉刺。玉丹、薄荷忌用。如見勞病已重。津竭火炎之候。亦不必用。

（四）內托護心散 防毒攻心。

真萊豆粉一兩。乳香（去油）五錢。燈心灰少許。〔諤按 余治溫邪挾毒。逆陷

心包。每用菴豆衣炒銀花、硃燈芯爲引方。甚效。可見用藥貴乎靈活。不可拘執一途也。」

（五）又方

硃砂、甘草各一錢。乳香淨末三錢。

上藥共研末。和勻。以生甘草一兩煎濃湯。調一匙。時時呷之。（諤按 此方不如前方清靈。擬加入翹心、山梔仁、菴豆衣等同煎較妥。如痰涎壅甚。可服控涎丹數分。）

（六）清肺飲 治痰溼氣逆咳嗽。

貝母、天花粉、甘草 上三味水煎服。

（七）犀角地黃湯 治胃熱火邪吐衄。

犀角、生地、白芍、丹皮。又方。再加解毒藥。名犀角解毒湯。（諤按 解毒。如銀花、生甘草、料豆衣之屬。）

右四味。先用三物水煎去渣。入犀角汁熱服。

（八）導赤散 治口糜淋痛瀉火。

生地、木通、甘草梢。

右三味水煎服。一方再加竹葉。

(九) 四物湯 通治血家百病。

當歸、熟地、川芎、白芍。

(十) 六一散 (一名天水散) 治表裏三焦濕熱瀉火。

滑石六兩。甘草一兩。研末。新汲水調服。或燈心湯下。

(十一) 蜜煎導法 治胃府無熱便閉者。不宜輕攻。用此法。

白蜜。納銅器中。微火煎如飴。勿令焦。俟可丸。捻作挺。如指許長。如橄欖樣。納入穀道中。以手急抱。欲大便時。乃去之。

(十二) 瀉黃散 治胃火口瘡。并治脾火。

防風、甘草、黑山梔、蘆香、石膏。

右味炒研末。蜜調服。

(十三) 錢乙瀉黃散 治胃熱火鬱。及口瘡。

升麻、防風、白芷、黃芩、枳殼、半夏、石斛、甘草。水煎服。

（十四）清咽太平丸 治膈熱咽痛。
薄荷、川芎、柿霜、甘草、防風、犀角、桔梗。

右爲末。蜜丸。

（十五）甘露飲 治胃熱口瘡吐衄。

生地、熟地、天冬、麥冬、甘草、石斛、黃芩、茵陳、枳殼、枇杷葉。一方加犀角。水煎服。

（十六）黃連解毒湯 涼血清熱解毒。口瘡可任之。

黃連、黃柏、黃芩。水煎服。此卽三黃湯也。

（十七）涼膈散 治膈上實熱。

酒浸大黃、芒硝、甘草、連翹、山梔、薄荷、黃芩、竹葉。開水泡去渣。澄清飲之。

（十八）清胃散 治齒齦出血。口瘡牙宣等症。

升麻、黃連、當歸、生地、丹皮、石膏。水煎服。

（十九）瀉白散 瀉肺火。

桑皮、地骨皮、甘草、粳米。水煎服。

一方加人參、雲茯苓、知母、黃芩。各加減瀉白散。

(二十) 涼肺湯 治肺中實熱。
知母、貝母、天冬、麥冬、黃芩、陳皮、甘草、桑皮。水煎服。

(二十一) 消毒犀角飲 治咽喉腫痛。毒氣壅甚者。
犀角、牛蒡、荊芥、防風、薄荷、桔梗。如內熱加黃芩、黃連。水煎服。

(二十二) 玉液上清丸 治風熱上壅。口舌生瘡。咽喉腫痛等症。
薄荷四兩。柿霜五兩。桔梗四兩五錢。甘草三兩五錢。川芎一兩八錢。百藥煎五錢四分。砂仁四錢五分。青黛三錢。冰片二錢。硼砂二錢。元明粉三錢。
右十一味。爲末。蜜丸。如雞豆大。每服一丸。不拘時嚙化。

(二十三) 清咽訶子丸 治咽喉煩渴。

訶子肉四錢。(薑汁拌麵煨) 葛根一兩二錢。冰片一分五厘。柿霜四錢。百藥煎三錢。甘草一錢。

右爲末。蜜丸。如芡實大。每服一丸。

(二十四) 柏母丸 治痰火鬱結。咽喉不利。
貝母六錢。川柏(蜜炙)一兩。冰片一錢。

蜜丸。如青豆大。每服一丸。

（二十五）柏花丸 治肺熱咳嗽。

貝母四錢。川柏（蜜炙）一錢。百合二錢。款冬花二錢五分。冰片三分。蜜丸。如青豆大。每服一丸。

（二十六）除瘡落菌膏（一名犀角膏） 余治童子出麻後。舌生瘡。

出血如泉。諸藥不效。一旦舌出菌者三。其子如狂。即用此方

噙服三五丸。即落。并治咽喉口舌生瘡生菌。噙此即效。

真血珀、生犀角、辰砂、茯神、冰片各一錢。人參、酸棗仁各二錢。

右研末蜜丸。如彈子大。每服一丸。麥冬湯下。

（二十七）利膈湯 治脾肺火熱。虛煩上壅。咽痛生瘡。

薄荷、荊芥、防風、桔梗、甘草、牛蒡、人參。或加僵蠶。

（二十八）玉屑無憂散 治纏喉風痺。咽喉腫痛。咽物有礙。或風涎壅

滯。口舌生瘡。及骨鯁屑塵。并除三尸。去八邪。辟瘟疫等症。

元參、荊芥、貫仲、山豆根、茯苓、滑石、甘草、黃連、礞砂各五錢。寒水石、砂仁各三錢。

右爲末。每服一錢。

（二十九）加味射干湯 治喉痺腫痛。
射干、生地各一錢。桔梗、連翹、黃芩、貝母、元參、甘草各七分。荆芥五分。牛蒡七分。水煎服。

（三十）滋陰消痺湯 治腫毒口瘡。兼治咳嗽聲啞。
當歸、生地、沙參、百部各一錢。射干、地骨皮、知母、麥冬、桔梗、炒黃芩各七分。元參、甘草各五分。水煎服。

（三十一）清肺散火湯 治肺中有伏火。因風寒閉鬱。或過服寒涼。火不得泄者。

杏仁、紫蘇各一錢。前胡、旋覆花、桑皮、貝母、麻黃、桔梗各七分。甘草五分。葱一莖。薑一片。水煎服。

（三十二）滋水開陰湯 治未成癆瘵。遽然聲啞。有痰嗽者。
沙參二錢。知母、貝母各一錢。甘草、石菖蒲各三分。蘇子、陳皮、升麻各七分。訶子肉五分。生薑一片。紅棗二枚。水煎服。

製藥

(一) 製玉丹法

生明礬打碎如指大。傾入銀罐內。炭火煅。以篴刺入罐底。攪之無塊爲度。次將上好牙硝打碎投下。約十分之三。再將礬砂打碎投下。亦十分之三。再將生礬逐漸投下。候其煇盡。照前投硝礬少許。如是逐層投完。待至鋪起。罐內發高如饅頭樣。止。方架炭火。燒至乾枯。然後用潔淨瓦一大片。覆罐上。一時取去。將牛黃少許爲末。用水四五匙調勻。滴丹上。將罐仍入內。火烘乾。卽取起。連罐覆潔淨地上。用紙襯地上。再將碗覆之。過七日。收儲聽用。輕鬆無堅紋者佳。如有堅紋。不堪用。或留作蜜調藥中用。煅時火候。初宜緩火。然亦不可過緩。恐致矾僵。不易溶化。後必堅實。中間及後。須用武火。又如礬未溶化。卽投硝礬。必不盡溶。勢必堅實。罐須煨透。不令爆炸。傾過銀者不用。此丹必多製。愈久愈妙。名曰玉丹。

(二) 製黑魚膽法

臘月取黑魚膽陰乾。或人身袋盛哺脆。研用。

(三) 製燈草灰法

擇白淨燈草。放於金漆桌上。噴清水。燈草上。用筆管一頭草住。將燈草用竹篸築於管中。再用紙塞一頭。放火中。燒竹通紅。收出。放在瓶中。用濕手巾覆之。待冷。取出去竹灰。收儲聽用。必要黑色而成團者佳。

(四) 製巴豆法

將巴豆淨肉。去衣用一兩。以麻油七錢。煮酒七錢同煎。油酒盡爲度。取起放於礬中。入銀罐內。炭火煨。以篸刺入罐底。攪之無塊爲佳。連罐覆潔淨地上。再用碗覆之。過七日。收儲聽用。

又法。明礬三錢。入銚溶化。投入巴豆肉三粒。待乾。去巴豆。研用。名曰巴礬。

(五) 製蜒蚰梅法

四月間買青梅子。搗碎去核。放碗內。投礬一層。捉蜒蚰。不拘多少。待礬、蜒蚰烱盡。再投梅礬一層。再捉蜒蚰投下。烱盡。至百日。傾入銀罐中。炭火煨之。以篸刺入罐底。攪之無塊爲度。待如饅頭樣發起者。即取下。連罐覆於地上。以碗蓋之。過七日。後火毒出盡。收儲用之。

又法。將青脆大梅子。去核打碎。鋪在碗底內。再將蜒蚰數條。鋪梅肉上。又將白礬末鋪於蜒蚰上。逐層鋪完。待其礬蚰化盡。日中晒梅極乾。研用。或瓦上炙脆爲末。如痰涎壅塞喉風等症。加入各吹藥中。皆效。或蜜湯同藥調和。滲下咽喉。亦可消痰神效。

(六) 製琥珀法

先用側柏子末入磁鍋中。再入琥珀於末中。用炭火煮。從巳至申。別有異光。卽取起。揚如粉重。研細極爲度。

(七) 製指甲法

用雙紅紙捲好指甲。燒灰存性。研末。

又法。將指甲入無名異中同炒。至指甲鬆脆。去無名異。研用。

(八) 製礪砂法

將礪砂研至無聲。水飛過。醋煮乾。如霜用。然礪砂能爛五金。化人心爲血。細閱本草。消食破瘀滯癥瘕。不可多服。

(九) 製螻蛄法

須五月間。取活螻蛄一個。將抱退鷄子軟白皮裹。入大蝦蟆口內。草縛泥固。煨過取出。研末聽用。

又法。將螻蛄置瓦上。煨存性。不用大蝦蟆亦可。

(十) 製煉鹽法

將食鹽入清水中。烱盡去泥脚。取水煎煉。再傾罐內。炭火煨透。白如霜者佳。留久聽用。

訂重 囊祕喉書附錄驗方

清 新陽 王景華士翹纂錄

鄞縣 曹赤電炳章圈點

喉風奪命丹 專治急喉風。痰湧氣逆。吹之立效。

真西黃、珍珠、當門子各一錢。辰砂四錢。鎗硝一兩五錢。（即牙硝）月石五錢。殭蠶一錢。雄精二錢。人中黃一錢。

九味各研細末。磁瓶收儲。勿泄氣。如遇急喉風。痰聲轆轤。呼吸氣促者。急吹此丹二三管。痰即隨藥而下。頃刻即愈。奪命神丹也。（景華按。急喉風。乃喉症之最險者。小兒每患之。其症必痰潮上湧。氣短欲絕。有初起寒熱。至三四日後發者。有一二日發者。有朝發夕死。夕發旦死者。總以痰湧氣促爲的候。如見此症。急用此丹。景華親試之。果驗。或用臭花娘根打汁灌之。亦妙。修園附刻急救方。有一方與此相類。其可異處。亦用鎗硝一兩五錢也。）

黑吹藥方 專治爛喉痧。

辰砂二錢。元寸、西黃、月石各三分。琥珀五分。珍珠、元明粉各二分。冰片一錢。皂莢五莢。（煨灰去筋子）燈草灰少許。方八三十粒。（煨黑存性）即番木鱉也。製猪膽六錢。肉灰五分。（此味肉灰可疑。未知何等肉灰。姑存之。）

製猪膽法

川連、殭蠶、月石、青黛、雄黃、牙硝、白礬、薄荷各五錢。

右八味研細末。用雄猪膽四個。將膽汁和藥拌勻。仍納猪膽殼內。立冬日放地坑中。春分日取起。再研。如遇爛喉痧。和入前方吹之。神效。輕者獨吹亦妙。

走馬疳方

元寸、青鹽、雄黃、珍珠、西黃、冰片各一分。月石四分。人中白五分。銅綠八分。

九味研末。加鱸血少許。

此方與陶廷昭走馬疳方同。如遇牙疳腐爛。吹之立效。

救急破棺丹

老猪婆糞。

須於冬天收取。置屋上。日晒夜露。約一月餘取下。放炭火上。煨至烟將絕時。

悶息聽用。候四五月間。採臭花娘根打汁。拌入煨過猪糞內晒乾。再拌再晒。如是七次。磁瓶收儲。凡遇喉蛾喉癰喉痺諸急症。痰涎壅塞。聲不能出。氣息欲絕者。此藥下咽即活。倘牙關緊閉。不能受藥。滴入鼻中亦效。又治暑天痧脹。腹痛欲絕者。涼水調下。又治下疳腐爛。麻油調敷。一景華按。此即南陽猪膚湯意。蓋猪水畜也。母猪陰類也。糞陰中之至濁者也。喉症半屬陰虛火亢。胃濁上蒸。取母猪糞以入陰降濁。又取牡牛膝根之升中有降。能吐能下。是以奏功甚速。至治痧症亦以濁攻濁意。然不如用馬糞煨灰爲妙。見吳鞠通溫病條辨。一譚按。士翹先生治爛喉痧。每用血清。血清西藥也。據傳係馬洩所提之精華也。服血清而效者固多。服血清而蒙其害者亦復不少。余見屢矣。然終不如此方之穩。」

王夢隱青龍白虎湯

橄欖生蘆菔水煎服。

自注云。此余自製方。橄欖色青。清足厥陰內寄之火風。而靖其上騰之焰。蘆菔色白。化手太陰外來之燥熱。而肅其下行之氣。合而爲劑。消經絡留滯之

囊秘喉書 附錄驗方

痰。解膏梁魚麵之毒。平時代茶。可內喉症。勿以平淡而忽諸。四

王跋

囊祕喉書一帙。無卷數。俞養浩先生得之某氏。辛丑冬。喉症盛行。迄於明年之夏。先生施藥之外。謀刊是書。以廣治法。因其文義躊躇。方名怪特。一似鈴醫所爲。爰命景華重加釐訂。謹就原文。鈎稽審覈。參以羣說。別爲八篇。刪取異名。歸諸爾雅。藥味銖兩。悉仍其舊。蕭君冬友。與參訂之役。商榷既定。竟付殺青。

光緒二十八年四月新陽王景華跋

張跋

咽喉一症。其來也速。其勢也猛。其致病之由也雜。醫者審證用藥。寒熱攻補。各有所宜。誠未可偏執一是也。顧自來治喉症者。無專書。臨證者卒鮮把握。自洞主仙師白喉忌表挾微之書出。治喉症者。遂相率而用寒涼。依方而用。效者害者互見。未可以爲盡善之書。曩者友人贈予囊秘喉書一冊。反覆研究。確有至理。取而用之。復有神效。噫。楊公之作是書也。無陳氏寶之固已失傳。然無王君爲之釐定。俞君爲之刊刻。則是書也。亦仍歸於泯滅而已。而謬也。雖有此重訂廣佈之願。亦無從着手。今幸編錄已臻完善。不敢忘諸君之德。故復贅數語。以爲跋。

民國四年乙卯八月海虞張謇汝偉書於壽石居南窗下

訂聖囊祕喉書增錄

清 補石師 著

常熟 張 謬 汝偉 纂錄

鄞縣 曹赤電 炳章 圈點

錄白喉治方二則并題詞

蠹簡蟬編赤綠字。千金龍史索洪濛。我從氣化求真諦。玉版金題叩素宮。

此症始於北而行於南。從前古法無可遵。不得已而取傷寒中一陰一陽結爲喉痺之方以治。創出養陰清肺一法。近人本此。雖不皆效。然妄汗搜風溫燥之弊可免。玉鑰之喻可無愧矣。但此書爲治喉必守之法。則可。若謂治喉之法已盡於此。則不可。(瑞)愚好自用。將會治白喉見愈之方抄錄。以免日久忘懷。并以此法示門下及兒輩。補石識。

此余受業師 唐均良先生之作也。偉增錄於此。揚先生之仁風。以拯天下之同胞也。門人張謬拜識。

石龍丹 治陰火上熾。形寒裏熱。大便堅結。咽嗌微痛。

太陰元精石

龍膽草

川柏

知母鹽水炒

元參

川貝母

丹皮

金銀花

淡竹葉

硃燈芯

冬瓜子

生苡米

各研細末。吹之。煎服亦可。惟元精石有商酌。分量隨症定。

珠燕南飛散 膏梁蘊熱。痰膠肺胃。

煨石燕

鎊羚羊

天竹黃

川貝母

上濂珠

烏犀尖

生枳殼

生白芍

細菖蒲

生決明

生蛤殼

天花粉

山梔仁

潼木通

滑石枰皮炒

右十五味。各研細末。貯用。

霹靂針 猪牙皂角一味。醋炒枯。研細用。一秒時即得大吐。

牙疳外治二方 症重者。爛口亦可。

大黃生三錢

萊豆粉炒二錢

公丁香研十粒

三味和勻。以開水塗兩足心。其患立瘥。效如神。

另用青葱管、蘇梗煎濃汁。熏洗兩足。

又方 清香餅、生香附、生半夏等分研。雞清調作餅。貼（男左女右）湧泉穴。初生小兒螻蛄子雪口鵝口均治。加入葱白麝香更妙。

馬培之先生柳華散 治一切風溫喉症。腫痛紅脹。單雙乳蛾。口疳牙疳等症。

人中白

碎金

蒲黃粉

月石

川柏

青黛

研末各等分。加冰片用之。

冰梅竹月丹 均良心得方。

天竹黃

月石

綠萼梅

冰片

研細用。

〔諤按 以上二方。皆係余家常日用之要藥。百試百驗之祕方。今特登出。以供衆採。庶幾不負救世之婆心也。〕

治喉之法。以上所錄。略可稱備。而病家往往於飲食之中。一不留意。以致復發而

成壞者。又不少。茲特錄出家常食物數種。以告患喉恙者。（汝偉誌）

海蜇 萊菔 西瓜皮 茶腿 醬鴨 淡菜 乾貝 腐衣 洋菜 菜乾
麒麟菜

以上菜品

挂麵 藕粉 山藥 冬瓜

以上點品

鹽水炒杏仁 西瓜子 梨 松子肉 青鹽陳皮 廣橘

以上雜食品

雨前 白殘花 生蛤殼 硃燈芯

以上代茶品

食物之可飲者固多。茲不過擇其食之無害有益者。略舉一二而已。如貧家以茶乾代茶。則尤為相宜。

訂重囊秘喉書終

後記

《口齒類要》明·薛己著。薛己，字新甫，號立齋，江蘇吳縣人，約生活于公于一四八八年至一五八八年間。世醫出身，通內、外、婦、兒、五官各科，尤精於瘍科。治病主張求本。明弘治年間被征入太醫院，正德年間選爲御醫。撰著和校注醫書很多，撰有《外科發揮》、《正體類要》、《內科摘要》、《癰瘍機要》、《女科撮要》、《保嬰撮要》等。其撰著及校注醫書收入《薛氏醫案》中，於明萬歷年間刊行。刊行以來，流傳頗廣，對後世醫界影響很大。

《口齒類要》爲中醫口腔科學現存的第一部專著。本書主要論述了口腔科疾患八種，其他疾患如諸蟲入耳等四種，并附方六十九首，各種疾患附有多則醫案。惟治諸鯁列咒法一則，無實用價值。全書內容精湛，選方用藥頗切臨床實用。

此次重刊，參照人民衛生出版社一九八三年版的《薛氏醫案選》，在保存《大成》本特色的前提下，正其錯訛。

《尤氏喉科秘書》一卷。據近代考證，撰作者為江蘇無錫人尤存隱，有些版本題為尤乘，有些抄本題為尤怡，均誤。

本書舊說為尤氏家傳喉科秘本，相傳數代，積累經驗，不斷充實而成。估計在公元七〇〇年到一七五〇年間逐漸趨于完整。此書的外傳約在乾隆年間，當時曾流行大量的手抄本。本書初刊于一六七五年（清代康熙十四年）。首列喉症總論及看法，次按咽喉、口、牙、舌、頸、面腮等門介紹各種病證的治法，再介紹制藥法則和用藥法，最後刊喉病驗方十六首。本書內容從臨床實踐出發，實用性很強，為中醫喉科臨床極為重要的參考書。

此次重刊，參考了江蘇科學技術出版社一九八三年版版本，對《大成》本之錯訛，作了訂正。

《咽喉脈證通論》 作者佚名，是清代許樾（珊林）的校訂本。全書

主要論述了鎖喉、重舌、氣癰、乳蛾、弄舌等喉科十八證的治療方法。有論、有方及治法，亦頗爲臨床實用。

《喉舌備要秘旨》作者佚名。印行于清代光緒年間，共列「喉部」、「口部」、「牙部」三大類病症近百種，并附以許多治法及方藥等內容。曹炳章認爲本書立方用藥有所偏倚之處，唯辨證有獨到創新之意。本書可作爲臨床喉科醫師的有價值的參考書籍。

《包氏喉證家寶》爲清代歸包安三鏢及其子包岩、衡村編著。有咽喉總論及各種喉科疾病之辨證以及方藥，并列咽喉十二證考。又有「攻洞天」一篇，爲包岩所撰，曹炳章先生所推重，認爲可救《白喉忌表抉微》之偏，被列爲首篇。本書除內服、外用之方藥外，尚有針灸、手術等治療方法，實爲中醫喉科之一冊重要的臨床論著。

《重訂囊秘喉書》二卷。清·楊龍九著。作者生平不詳。是書以清代道光年間陳坤培藏本，再由新陽王景華重新編訂，光緒壬寅年刻印，後再由張汝偉在民國四年加以評點，并增方六道，附刊于紹興醫藥學

報。總之，此書因由楊龍九之著，陳坤培之藏，王景華之編訂，張汝偉之評點，曹炳章之編校才得以發揚廣大。

是書分上下二卷，有診法、辨證、類證、治法、藥例、治方、醫方、制藥、附錄、增錄等內容，包括咽喉及口腔科範疇內之數十種病的診治，故爲內容非常豐富，臨床實用價值很大的一本喉科專著。

夏

翔

蔣永銘

書目

(一) 黃帝內經素問集註	(清) 張隱庵	(二) 黃帝內經靈樞集註	(清) 張隱庵	(三) 靈樞經	(清) 張隱庵	(四) 傷寒明理論	(清) 許叔微	(五) 傷寒九十論	(清) 王好古	(六) 陰證略例	(清) 張仲景	(七) 傷寒兼證析義	(清) 尤在涇	(八) 傷寒貫珠集	(清) 沈日南	(九) 傷寒六經辨證治法	(清) 張仲景	(十) 傷寒補例	(清) 周學海	(十一) 傷寒來蘇集	(清) 柯琴	(十二) 重刊金匱玉函經	(清) 趙謙	(十三) 沈註金匱要略	(清) 沈日南	(十四) 金匱要略心典	(清) 尤在涇	(十五) 金匱翼	(清) 尤在涇	(十六) 脈經	(清) 王叔和	(十七) 玉函經	(清) 杜光庭	(十八) 重訂太素脈秘訣	(清) 劉伯祥	(十九) 脈語	(清) 吳崑	(二十) 醫燈續焰	(清) 王紹隆	(二十一) 望診遵經	(清) 葉子剛	(二十二) 重訂診家直訣	(清) 周學海	(二十三) 臨證驗舌法	(清) 楊志峰	(二十四) 醫古辨證新法	(清) 劉恒瑞	(二十五) 脈學輯要評	(清) 吳有性	(二十六) 痘疫論	(清) 吳有性	(二十七) 醫門普度溫疫論	(清) 吳有性	(二十八) 張氏溫暑醫旨	(清) 吳有性	(二十九) 溫熱暑疫全書	(清) 吳有性	(三十) 溫證指歸	(清) 周約元	(三十一) 溫熱病指南集	(清) 陳平伯	(三十二) 南病別鑑	(清) 葉香岩	(三十三) 痧脹玉衡	(清) 郭石陶	(三十四) 溫時疫治療法	(清) 葉香岩	(三十五) 增評傷寒八書	(清) 葉香岩	(三十六) 伏氣解	(清) 葉香岩	(三十七) 伏邪新書	(清) 葉香岩	(三十八) 伏陰論	(清) 葉香岩	(三十九) 羊毛痘論	(清) 葉香岩	(四十) 溫熱逢源	(清) 葉香岩	(四十一) 隨息居霍亂論	(清) 葉香岩	(四十二) 霍亂霍亂答問	(清) 葉香岩	(四十三) 霍亂霍亂要	(清) 葉香岩	(四十四) 鼠疫快微	(清) 葉香岩	(四十五) 增補評註溫病條辨	(清) 葉香岩	(四十六) 九十藥神書	(清) 葉香岩	(四十七) 增訂十藥神書	(清) 葉香岩	(四十八) 痰火點雪	(清) 葉香岩	(四十九) 慎柔五書	(清) 葉香岩	(五十) 理虛元鑑	(清) 葉香岩	(五十一) 虛損啓微	(清) 葉香岩	(五十二) 何氏虛勞心傳	(清) 葉香岩	(五十三) 症因脈治	(清) 葉香岩	(五十四) 周慎齋遺書	(清) 葉香岩	(五十五) 醫原	(清) 葉香岩	(五十六) 脈因證治	(清) 葉香岩	(五十七) 韓氏醫通	(清) 葉香岩	(五十八) 醫林改錯	(清) 葉香岩	(五十九) 醫學舉要	(清) 葉香岩	(六十) 一草亭目科全書	(清) 葉香岩	(六十一) 異授眼科	(清) 葉香岩	(六十二) 銀海指南	(清) 葉香岩	(六十三) 口齒要	(清) 葉香岩	(六十四) 尤氏喉科秘書	(清) 葉香岩	(六十五) 咽喉脈證通論	(清) 葉香岩	(六十六) 喉舌備要秘旨	(清) 葉香岩	(六十七) 包氏喉證家寶	(清) 葉香岩	(六十八) 重訂喉證家寶	(清) 葉香岩	(六十九) 正體類要	(清) 葉香岩	(七十) 外科證治全生集	(清) 葉香岩	(七十一) 外科選要	(清) 葉香岩	(七十二) 外科醫鏡	(清) 葉香岩	(七十三) 外科全書	(清) 葉香岩	(七十四) 外科法門	(清) 葉香岩	(七十五) 徐評外科正宗	(清) 葉香岩	(七十六) 盤珠集胎產證治	(清) 葉香岩	(七十七) 胎產指南	(清) 葉香岩	(七十八) 重訂產孕集	(清) 葉香岩	(七十九) 女科切要	(清) 葉香岩	(八十) 經效產寶	(清) 葉香岩	(八十一) 女科經緯	(清) 葉香岩	(八十二) 校註婦人良方	(清) 葉香岩	(八十三) 慈幼新書	(清) 葉香岩	(八十四) 原精要論	(清) 葉香岩	(八十五) 麻疹備要方論	(清) 葉香岩	(八十六) 活幼心書	(清) 葉香岩	(八十七) 幼科直書	(清) 葉香岩	(八十八) 小兒衛生總微論方	(清) 葉香岩	(八十九) 幼幼集成	(清) 葉香岩	(九十) 針灸甲乙經	(清) 葉香岩	(九十一) 針灸宜法	(清) 葉香岩	(九十二) 針灸素難要旨	(清) 葉香岩	(九十三) 眉壽堂方案選存	(清) 葉香岩	(九十四) 徐批葉天士晚年方	(清) 葉香岩	(九十五) 案真本	(清) 葉香岩	(九十六) 孫文垣醫案	(清) 葉香岩	(九十七) 三家醫案合刻	(清) 葉香岩	(九十八) 張曉香醫案	(清) 葉香岩	(九十九) 程杏軒醫案	(清) 葉香岩	(一百) 何廉安醫案	(清) 葉香岩	(一百一) 邵蘭蓀醫案	(清) 葉香岩	(一百二) 吳鞠通醫案	(清) 葉香岩	(一百三) 冷庵醫話	(清) 葉香岩	(一百四) 柳洲醫話	(清) 葉香岩	(一百五) 鵲塘醫話	(清) 葉香岩	(一百六) 先哲醫話	(清) 葉香岩	(一百七) 濟齋醫話	(清) 葉香岩	(一百八) 友漁齋醫話	(清) 葉香岩	(一百九) 對山醫話	(清) 葉香岩	(一百十) 客塵醫話	(清) 葉香岩	(一百十一) 巢氏諸病源候總論	(清) 葉香岩	(一百十二) 儒門事親	(清) 葉香岩	(一百十三) 重訂靈蘭秘覽	(清) 葉香岩	(一百十四) 肯堂醫論	(清) 葉香岩	(一百十五) 知醫必辨	(清) 葉香岩	(一百十六) 研經言	(清) 葉香岩	(一百十七) 醫學讀書記	(清) 葉香岩	(一百十八) 讀醫隨筆	(清) 葉香岩	(一百十九) 市隱醫學雜著	(清) 葉香岩	(一百二十) 葉選醫衡	(清) 葉香岩	(一百二十一) 醫學源流論	(清) 葉香岩	(一百二十二) 慎疾畧言	(清) 葉香岩	(一百二十三) 醫學心悟	(清) 葉香岩	(一百二十四) 神農本草經	(清) 葉香岩	(一百二十五) 珍珠囊補遺藥性賦	(清) 葉香岩	(一百二十六) 雷公炮制藥性解	(清) 葉香岩	(一百二十七) 雷公本草衍義	(清) 葉香岩	(一百二十八) 藥微	(清) 葉香岩	(一百二十九) 藥微續編	(清) 葉香岩	(一百三十) 劉涓子鬼遺方	(清) 葉香岩	(一百三十一) 醫方考	(清) 葉香岩	(一百三十二) 聖濟總錄纂要	(清) 葉香岩
--------------	---------	--------------	---------	---------	---------	-----------	---------	-----------	---------	----------	---------	------------	---------	-----------	---------	--------------	---------	----------	---------	------------	--------	--------------	--------	-------------	---------	-------------	---------	----------	---------	---------	---------	----------	---------	--------------	---------	---------	--------	-----------	---------	------------	---------	--------------	---------	-------------	---------	--------------	---------	-------------	---------	-----------	---------	---------------	---------	--------------	---------	--------------	---------	-----------	---------	--------------	---------	------------	---------	------------	---------	--------------	---------	--------------	---------	-----------	---------	------------	---------	-----------	---------	------------	---------	-----------	---------	--------------	---------	--------------	---------	-------------	---------	------------	---------	----------------	---------	-------------	---------	--------------	---------	------------	---------	------------	---------	-----------	---------	------------	---------	--------------	---------	------------	---------	-------------	---------	----------	---------	------------	---------	------------	---------	------------	---------	------------	---------	--------------	---------	------------	---------	------------	---------	-----------	---------	--------------	---------	--------------	---------	--------------	---------	--------------	---------	--------------	---------	------------	---------	--------------	---------	------------	---------	------------	---------	------------	---------	------------	---------	--------------	---------	---------------	---------	------------	---------	-------------	---------	------------	---------	-----------	---------	------------	---------	--------------	---------	------------	---------	------------	---------	--------------	---------	------------	---------	------------	---------	----------------	---------	------------	---------	------------	---------	------------	---------	--------------	---------	---------------	---------	----------------	---------	-----------	---------	-------------	---------	--------------	---------	-------------	---------	-------------	---------	------------	---------	-------------	---------	-------------	---------	------------	---------	------------	---------	------------	---------	------------	---------	------------	---------	-------------	---------	------------	---------	------------	---------	-----------------	---------	-------------	---------	---------------	---------	-------------	---------	-------------	---------	------------	---------	--------------	---------	-------------	---------	---------------	---------	-------------	---------	---------------	---------	--------------	---------	--------------	---------	---------------	---------	------------------	---------	-----------------	---------	----------------	---------	------------	---------	--------------	---------	---------------	---------	-------------	---------	----------------	---------